

**MATEO-GAYABURBA-NUED**  
**MATEO**  
**GEBE-SOGLENAID**  
**Garda-nug**

Mateo we-garda narmaksad. Mateo, Levi'ye bimarbalid. Mateo, Judío-dule gued, Jesús-sapingan-warambe-gakabogwad-wargwenadid. Judío'mar bilebalid, Israel-dulemarye. E-gayabardi bileged, Hebreo-dulemarye.

*Mateo-Gardagi weyob sunmaklenaid*

Israel-dulemarga epenne Bab-Dummad sogsagusad, be-bendakegala, yoedse Dule-Wargwen an bega barmidagoye. We-dule, Griego-gayaba, Cristo'ye bileged, Hebreo-gayabardi, Mesías'ye bileged. We-dulede, Bab-Dummad-Machid, Jesús'ye-bimarbalid. Jesús we-napneggi gudigusgu, Judío'mar aku Jesús-daksa gusmalad, we, Bab-Dummad-Dule-Wargwen-Barmidagoed-Duleye.

Jesús we-napneggi-gudigu, deun, Roma-dulemar bela yar-ganikid. A-ulale, Mateo Jesús-sapinga-gued-iduale, Roma-dummadga Judío'margimani-gaedga arbadii gusad. Degine, Judío'maribe mani-atursabalid-dule dabalid.

Mateo, Bab-Dummad-Burba-Isligwaledba Judío'marga garda narmaksad, ega sogega, Jesús Bab-Dummad-dule-wargwen-barmidagoye-sogsad-dule-sunnadye.

Jesús Bab-Dummad-negdakmaidgi anmarga sunmaknonikid. Mateo anmarga soged, igi Jesús

dulemar-igued-ular, nakrusgi burgwisa, adi, dulemar Jesús'gi abonolemalagar. Mateo na e-uayagwar Jesús-sunmaksad itosad, degine, e-ibyangwar Jesús-ibmar-imaksad daksabalid.

We-garda weyob ilemakar narmakar naid:

1. Jesucristo-e-dad-dummagan, degi, e-gwalulesad (1:1–2:23).
  - 1a. Jesucristo-e-dad-dummagan (1:1-17).
  - 1b. Jesucristo-bipigwaun-gudigusad (1:18–2:23).
2. Jesús gebe e-arbaed-onoded (3:1–4:11).
  - 2a. Diigi-dule-oged-Juan, Bab-Dummad-igargi sunmaksad (3:1-12).
  - 2b. Diigi-dule-oged-Juan, diigi Jesús-ogsad (3:13-17).
  - 2c. Jesús, nia-sailase wilubdaklesad (4:1-11).
3. Jesús ibmar-dakdisurmalad imaksad (4:12–13:58).
  - 3a. Jesús gannar Galilea-yargi e-arbaed-onoded (4:12-25).
  - 3b. Jesús yarbirgi dulemar odurdaksad (5:1–7:29).
  - 3c. Jesús ibmar-dakdisurmalad imaksad (8:1–9:38).
  - 3d. Jesús, e-sapin-dummaganga igar-uksad (10:1–11:1).
  - 3e. Jesús baigan ibmar imaksad (11:2–12:50).
  - 3f. Jesús Bab-negsemaidgi burbar sunmaksad (13:1-58).
  - 3g. Diigi-dule-oged-Juan'ye-nugad, burgwisad (14:1-12).
4. Jesús, neggwebur-baid-baidgi arbaed imaksad (14:13–20:34).

- 4a. Jesús ibmar-dakdisulid baigan imaksad (14:13-17:27).
  - 4b. Dulemar-daed-igargi Jesús sunmaksad (18:1-20:34).
  5. Jesús, Jerusalén'gi napi gudigusad (21:1-23:39).
  6. Jesús, napneg-bergudanikidgi sunmaksad (24:1-25:46).
  7. Jesús'ga oburgwileged-igar-mesisad (26:1-27:66).
  8. Jesús gannar durgusad (28:1-20).
- Binsamardo, we-garda birga 37'gi narmakles-insaye.

Be itogua.

## **1. JESÚS-E-DAD-DUMMAGAN, DEGI, E-GWALULESAD**

(1:1-2:23)

### **1a. Jesucristo-e-dad-dummagan**

(1:1-17)

(Lucas 3:23-38)

<sup>1</sup> Jesucristo e-dadgansiki ilekwaa-danikid-e-garda. Jesucristo, David-e-wagwad, degi, Abraham-e-wagwabalid.

<sup>2</sup> Abraham-machidi, Isaac'ye nugad, Isaac-machidi, Jacob'ye nugad, Jacob-machidi, Judá'ye nugad, degi, e-masmala-baigan.

<sup>3</sup> Judá-machidi, Fares'ye nugad, degi, e-machi-baidi, Zara'ye nugad. We-machi-warbogwad-e-nandi, Tamar'ye nugad.

Fares-machidi, Esrom'ye nugad,

Esrom-machidi, Aram'ye nugad.

<sup>4</sup> Aram-machidi, Aminadab'ye nugad,  
Aminadab-machidi, Naasón'ye nugad,  
Naasón-machidi, Salmón'ye nugad.

<sup>5</sup> Salmón'di, Rahab-ebo Booz-baksad.  
Booz'di, Rut-ebo Obed-baksad.  
Obed-machidi, Isai'ye nugad.

<sup>6</sup> Isai-machidi, Rey-David'ye nugad,  
Rey-David-machidi, Salomón'ye nugad.

Salomón-e-nandi Uriás-e-omega-gusadid.

<sup>7</sup> Salomón-machidi, Roboam'ye nugad,  
Roboam-machidi, Abías'ye nugad,  
Abías-machidi, Asa'ye nugad,

<sup>8</sup> Asa-machidi, Josafat'ye nugad,  
Josafat-machidi, Joram'ye nugad,  
Joram-machidi, Uzías'ye nugad,

<sup>9</sup> Uzías-machidi, Jotam'ye nugad,  
Jotam-machidi, Acáz'ye nugad,  
Acáz-machidi, Ezequíás'ye nugad,

<sup>10</sup> Ezequíás-machidi, Manasés'ye nugad,  
Manasés-machidi, Amón'ye nugad,  
Amón-machidi, Josías'ye nugad.

<sup>11</sup> Judío'mar Babilonia'se gales ebipiles-  
margu, Josías machimala-nikunonikid:  
Jeconías, degi, e-masmala-baigan.

<sup>12</sup> Judío'mar gales Babilonia'se  
ebipilesmalad-sorba,  
Jeconías, Babilonia'gi e-machi-Salatiel-  
baknonikid.

Salatiel-machidi, Zorobabel'ye nugad.

<sup>13</sup> Zorobabel-machidi, Abiud'ye nugad,  
Abiud-machidi, Eliaquim'ye nugad,  
Eliaquim-machidi, Azor'ye nugad.

<sup>14</sup> Azor-machidi, Sadoc'ye nugad,  
Sadoc-machidi, Aquim'ye nugad,  
Aquim-machidi, Eliud'ye nugad.

<sup>15</sup> Eliud-machidi, Eleazar'ye nugad,  
Eleazar-machidi, Matán'ye nugad,  
Matán-machidi, Jacob'ye nugad.

<sup>16</sup> Jacob-machidi José'ye nugad.

José, María-e-suiga gusadid, geb agi Jesús  
gwalulesad.

We-Jesús, Cristo'ye nugad.

<sup>17</sup> Degisoggu, Jesús-e-dadgan, Abraham-akar,  
David'se, e-ambe-gakabake (14) gued.

Degi, David-akar, Judío'mar gales Babilonia'se-  
ebipilesmaladse, Jesús-e-dadgan e-ambe-  
gakabakebalid (14).

Degi, Judío'mar gales Babilonia'se  
ebipilesmalad-akar, Cristo'se, Jesús-e-dadgan e-  
ambe-gakabakebalid (14).

## **1b. Jesucristo-bipigwaun-gudigusad**

*(1:18-2:23)*

*(Lucas 2:1-7)*

<sup>18</sup> Jesucristo weyob gwalulesad: María,  
Jesús-e-nan, deun José-ebo igar nabosmalad na  
nikumaloye. Nikued-idu, María daklealid, Bab-  
Dummad-Burba-Isligwaled-egi-ataksadba bato  
gurgin-nika gudii.

<sup>19</sup> María-e-sui-José, dule-gwage-nuedsoggu,  
yapa-María-obingesaedba arbakee mete-  
sokalinad.

<sup>20</sup> Ar José degi-binsadii, gabgi Bab-Dummad-e-  
baliwitur ese nonikid, ega sognonikid: "David-  
wagwa-José, mer be dobgu. María be-omega-  
guga be abingae. Ar María-bonigwar be dakedi,

Bab-Dummad-Burba-Isligwaled-sogedba deyob gusad.

<sup>21</sup> María, machi-wargwen nikuoed, Jesús'ye be onugsaoed, ar ade, isguedgi e-neggwebur abongoed."

<sup>22</sup> Weyob bela ibmar-gusadi, deyob gusad, adi, Bab-Dummad na e-gayaburba-barsogedba ibmar-sogsadba guegar, deun sogsagusgu:

<sup>23</sup> "Emi be dake, yagwa-wargwen gurgin-nika guoed, goe nikunonikoed.  
Emanuel'ye onugsaoed."

Isaías 7:14

Emanuel sogleged, "Bab-Dummad an-marba gudiiye."

<sup>24</sup> José gabdakmai ataksagu, ar igi Bab-Dummad-e-baliwitur ega sogsa, deyob imaksad. José, María-nikunonisunnad.

<sup>25</sup> Degi-inigwele, amba María'se gochasurgweled. José, María-machi-gebe-nikusad-sorba geb María'se gochad. Machigwa-gwalulesadi, Jesús'ye onugsasad.

## 2

*Girmar-dad-nakwe-dorgan  
ataknimalad*

*Jesús'se*

<sup>1</sup> Jesús Judea-yalagi Belén-neggweburgi gwalulesgu, deun Rey-Herodes-negdakmaidgi, girmar-dad-nakwe-dorgan-ibmar-nue-wisimalad Jerusalén'se nonimalad,

<sup>2</sup> sognonimalad:

—¿Bia Judío'mar-E-Rey-gwalulesad mai? Ar ade, anmar dad-nakwedba e-niisgwa daksamalad. Anmar e-nug-odummogega ese danimalad.

<sup>3</sup> Rey-Herodes degi-soge-itoargu, surbinsa itonaded, degi, bela Jerusalén'gi-bukmalad eba surbinsa itonadmarmogad.

<sup>4</sup> Herodes, bela dule-irwa-Bab-Dummadse-gormalad-e-dummaganse, degi, Garda-Narmaked-Dulemarse-gochagu, amarse egichialid, bia Cristo gwalulegoye.

<sup>5</sup> Amar, abin-imakdemalad:

—Cristo Judea-yalagi Belén-neggweburgi gwalulegoed. Ar deyob Bab-Dummad-gayaburba-barsoged-narmakar-maid sognaid:

<sup>6</sup> “Be, Belén-neggwebur, Judea-yalagi-siid, be baisur-dakle-inigwele, ar neggwebur-baiganba be bur nue nug nikad.

Ar ade, begi dule-neggwebur-seoed nodagoed, adi, an-dulemar-Israel-akwegar.”

Miqueas 5:2

<sup>7</sup> Degi, Herodes, girmar-dad-nakwe-dorganse arbakee gochagua, ese nue-egichialid, emarde sana nue-niisgwa daksamarye. Herodes'ga-sogsamargu,

<sup>8</sup> Herodes Belén-neggweburse amar-barminai gualid. Amarga sogded:

—Webá Belén-neggweburse be namar, nue be mimmi-amimalo. Ar be amismalale, an-owisononiko, adi, an ese namogagar, an e-nug odummonamogagar.

<sup>9</sup> Girmar-dad-nakwe-dorgan, degi-ega Rey-Herodes-soge-itosmargu, nadmarsunnad. Amar dad-nakwedba-niisgwa-daksamalad, a-niisgwa e-idu-nadapi gualid. Geb mosmargu, bia-mimmi-mai, agi niisgwa bogi nagunonikid.

10 Girmar-dad-nakwe-dorgan niisgwa-daksamargu, bela nue-weligwar itosmalad.

11 Girmar-dad-nakwe-dorgan, negyabadoqdemargu, mimmi e-nan-María-walik-gudii dakdapmalad, degi, mimmi-e-nug-odummomalaga yokorgi-sindigar sigidmalad. Degine, girmar-dad-nakwe-dorgan mimmiga ibmar-nuegan-ukmalaga e-ulu egadmalad. Ega we-ibmarmar uksamalad: Olo, ibmar-wawadik-yapanned, degine, sapi-gunnugiid-wawadikmalad-mirra'ye-nugad.

12 Bab-Dummad, gabgi girmar-dad-nakwe-dorgan owisosad, melle gannar Herodes'se bar namaloye. Degisoggu, girmar-dad-nakwe-dorgan igar-baidba e-neggweburse nadmalad.

*Herodes goe-susmar-oburgwisad*

13 Ar girmar-dad-nakwe-dorgan-naded-sorba, agi, Bab-Dummad-e-baliwitur gabgi José'se non-ikid, ega sognonikid: “Be gwisgu, mimmi be sue, e-nan be sue, Egipto'se be wakinmar. An-begasogedse be weba gudigumalo. Ar ade, Herodes mimmi-oburgwega mimmi-amidagoed.”

14 José atakargu, mimmi, degi, e-nanbo, yog sear imaksad. A-mutikidba Egipto'se ega wakitesunad.

15 Agi Herodes-burgwisadse gudigusmalad. Bab-Dummad-ibmar-sogsadba-guegala, deyob gusad. Deun Bab-Dummad-gayaburba-barsoged sogsagusgu:

“Egipto-yar-akale, an-machise an gochagusad.”

Oseas 11:1

16 Herodes dakdegu, girmar-dada-nakwe-dorgan e-yar-daksa, nue sae-itoded. Degisoggu,



a-ulale, bela Belén-neggweburgi, degi, neggwebur-dikarbarmalad machimala-birgabo-akuar-nikmalad-oburgoye igar uksasunnad. Ar ade, Herodes nue-itosad, mimmi birgabosaar nikargebye.

<sup>17</sup> Herodes mimmigan-oburgwisad. Ar igi Bab-Dummad-gayaburba-barsoged-Jeremías sogsgusa, deyob gusad. Deun sogsgusgu:

<sup>18</sup> “Dulemar Ramá’gi binnasuli-oimake itoleged, dulemar ise-boale, degi, nunmakedba-bukib-binsae itoleged.

Wede Raquel, e-mimmiganga bonaid,  
dule-e-gwage-gadi-gadi-imaked abesulid,  
e-mimmigana bela ei girgusad.”

Jeremías 31:15

<sup>19</sup> Herodes-burgwisad-sorba, Bab-Dummad-baliwitur-wargwen, Egipto’gi José’sé gabgi nonikid,

<sup>20</sup> ega sognonikid: “Be gwisgu, mimmi, e-nanbo be sede. Israel-yalase be nae, ar dulemar-mimmi-oburgwebi-gusmaladi bato bela burgwismalad.”

<sup>21</sup> Geb degi, José gwisgussunnad. Geb mimmi, e-nanbo sessunnad, agi geb Israel-yalase nonikid.

<sup>22</sup> Ar José itoargu, Arquelao Judea-yalagi e-bab-Herodes-sorba negdakmaiye, ase dobe naegualid. Ar gabgi Bab-Dummad-ega-sogsadba José, Galilea-yarse nadsunnad.

<sup>23</sup> José Galilea-yarse nonigua, neggwebur-Nazaret’ye-nugadse megnonikid, adi, Bab-Dummad-gayaburba-barsogmalad-sogsamaladba guega, deun sogsamargu: “Nazaret’ginedye bilegoye.”

## 2. JESÚS GEBE E-ARBAED-ONODED

### 3

(3:1-4:11)

#### 2a. Diigi-dule-oged-Juan, Bab-Dummad-igargi sunmaksad (3:1-12)

*Juan dulemarga sunmaksad*

(*Marcos 1:1-8; Lucas 3:1-9, 15-17; Juan 1:19-28*)

<sup>1</sup> Deun a-ibagangi, Diigi-dule-oged-Juan Bab-Dummad-igargi Judea-yargi, nega-dulesulidganba sunmaknonikid.

<sup>2</sup> Weyob sognonikid: “Be-isguedga na be ulubgi bukib-binsamar, be-daed be ogwamarsun, ar Bab-Dummad-e-negdakmaid bemar-mosad.”

<sup>3</sup> Ar Bab-Dummad-gayaburba-barsoged-Isaías, deun weyob Juan’nik sogsagusgu:

“Dule-wargwen nega-dulesulidganba binnasur sunmaknonikoed, dulemarga sognonikoed:

‘Dule-Dummad-idu igar mayemar, igar swilidik mesmar.’ ”

Isaías 40:3

<sup>4</sup> We-dule, Diigi-dule-oged-Juan, moli-yargan-mureged-e-absar na e-morga imakdii gualid, degi, e-molidubga moli-uka imakdii guarbalid. Geb ses-nabir-gulleged, degi, achanis, e-masga imakdii gusbalid.

<sup>5</sup> Jerusalén’ginmalad, bela Judea-yalaganbarmalad, degi, Jordán-diwar-dikarba-dulemar-bukmalad, Juan’sé duurmaknonimalad.

<sup>6</sup> E-isgudiid na dugin-dukin barsognanai guar-malad. Geb Juan Bab-Dummad-diigi-ogleged-igar Jordán-diwargi imaknai gualid.

<sup>7</sup> Juan dakalid, Fariseo-sordamar, degi, Saduceo-sordamar, bukidar ese Bab-Dummad-diigi-ogleged-igar imakdaniki, amarga sogded: “¿Ar bemar naibe-bulegan-e-mimmiganyob gumalad! ¿Ar doa bega sogsamala, bemar Bab-Dummad-nue-urwedanikoedgi sunna be wakinmaloye?

<sup>8</sup> Degisoggu, be-isguedga na be bukib-binsasmaladba-nue-gwagsamaladi, be-daedgi na be oyomarsun.

<sup>9</sup>”Mer unnila na be sogmalo: ‘Anmar Abraham-wagan gumarye.’ Ar an bemarga soded: ‘Ar Bab-Dummad sunna we-akwamar Abraham-e-waganga imaked.’

<sup>10</sup>”Deginbali, ar bato akan guar sapi-maligi yoid. Degisoggu, sapi nue-sanmaksulile, a-sapi ogumaklegega siklegoed, soogi melledoed.

<sup>11</sup>”Ar andi Bab-Dummad-diigi-ogleged-igar-imakedi, unnila bemar isgusmaladgi-bukib-binsaed-oyogegalad. Ar dule-an-sorba-danikiddi, anba bur dule-dummadsoeggu, e-sapatse-bakar, geg an ega seed. Ar we-dule, Bab-Dummad-Burba-Isligwaledgi, degi, soogi be-ogonikoed.

<sup>12</sup>”Dule-an-sorba-danikidi, igi-dule burwa-abin oros-uka-miega bigbi guagwar-ganiki, deyob we-dule bigbi-gani gwichid. Geb trigo-gwagdi suoed, e-ukadi soogi ogumakoed. Ar we-soode, geg soo ginnedid.”

## **2b. Diigi-dule-oged-Juan, diigi Jesús-ogsad**

(3:13-3:17)

(*Marcos 1:9-11; Lucas 3:21-22*)

<sup>13</sup> Degi, Jesús, Galilea-akale, Jordán-diwarse non-ikid, adi, Juan diigi e-ogegar.

<sup>14</sup> Ar Juan'di Jesús'ga sokalinad, an diigi be-ogosurye. Ega weyob sognai gualid:

—Ar be bur, Bab-Dummad-diigi-ogleged-igargi be an-ogedinad. Ar be bur anba dummadid. ¿Degite, be anse danide?

<sup>15</sup> Jesús abin-sogded:

—Ar emigindi, anmar deyob saergebed, igar-maidba anmar imakergebed.

Degisoggu, Juan Bab-Dummad-diigi-ogleged-igargi Jesús-ogsasunnad.

<sup>16</sup> Ar Jesús Bab-Dummad-diigi-ogleged-igar-imaksad-sorba, diwargi-gwichi nakwiarsunnad. Geb agi nibneg ega argaded, degi, Jesús, Bab-Dummad-Burba-Isligwaled nuuyobi egi aidedani daksad.

<sup>17</sup> Geb degi nibneg-akar gayaburba gollalid, sogded: “We, An-Machi-sabed-sunnad gued, weba weligwar an itoged.”

## 4

### 2c. Jesús, nia-sailase wilubdaklesad

(4:1-11)

(*Marcos 1:12-13; Lucas 4:1-13*)

<sup>1</sup> Juan Bab-Dummad-diigi-ogleged-igargi Jesús-ogsad-sorbali, Bab-Dummad-Burba-Isligwaled, Jesús nia-sailase-wilubdaklegega, nega-dulesulidganba Jesús-sessunnad.

<sup>2</sup> Jesús Bab-Dummadse-golegala, iba-dulabogus (40) mutikidba, degi, ibginedba mas-gunsuli gudii gusad. A-sorba, ukur itoalid.

<sup>3</sup> Degi, nia-saila-emar-wilubdaked ese nonikid, ega sognonikid:

—Ar be Bab-Dummad-Machi-sunnadiile, we-akwamarga be soge: ‘Maduga be binyeye.’

<sup>4</sup> Jesús, nia-saila-abin sogded:

—Noar be soged. Ar Bab-Dummad-Gardagi narmakar maid:

‘Dule maduginbi dula-gudii guosulid,  
bela Bab-Dummad-gayaburba-itogedgi dula  
gudigubaloed.’

Deuteronomio 8:3

<sup>5</sup> Geb degi, nia-saila Jerusalén-neggwebur-islidikidse Jesús-sesad. Agi Bab-Dummadse-goled-neg-uas-birgi ogwisdapgu,

<sup>6</sup> Jesús’ga sogded:

—Ar be Bab-Dummad-Machi-sunnadiile, be nase ichomakdo. Ar Bab-Dummad-Gardagi narmakar maid:

‘Na e-baliwiturmar bega barmidagoed,  
e-argangi be-gamalagar,  
adi, melle be akwagi gowarmakegar.’

Salmo 91:11-12

<sup>7</sup> Jesús, nia-saila-abin sogded:

—Nabir be sogendo. Ar Bab-Dummad-Gardagi narmakar maibalid:

‘Melle Bab-Dummad-be-Dummad, be wilubdako.’

Deuteronomio 6:16

<sup>8</sup> Geb degi gannar nia-saila yar-matusulidse Jesús-sesbalid. Agi belagwable napa-naid, degi, e-gangumalad ese oyosgu,

<sup>9</sup> Jesús’ga sogded:

—An-nug-odummogega be sindigar an-asabin sigele, geb we-ibmar belagwapa an bega ukoed.

<sup>10</sup> Geb degi, Jesús, abin-sogded:

—Nia-saila-Satanás, be angi bangu. Ar Bab-Dummad-Gardagi narmakar maid:

‘Bab-Dummad-be-Dummad-e-nug be odummodii nanao.

Unnila agarbi be ibmar imako.’

Deuteronomio 6:13

<sup>11</sup> Geb degi, nia-saila Jesús’gi bangussunnad. Asorba, baliwiturmar Jesús’sé nonikid, ega ibmar imaknonimalad.

### 3. JESÚS IBMAR-DAKDISURMALAD IMAKSAD

(4:12-13:58)

#### 3a. Jesús gannar Galilea-yargi e-arbaed-onoded

(4:12-25)

*Jesús e-arbaedgi onoded*

(*Marcos 1:14-15; Lucas 4:14-15*)

<sup>12</sup> Jesús itoargu, Diigi-dule-oged-Juan esgaryagi mellesiiye, Jesús gannar Galilea-yarse nonikid.

<sup>13</sup> Nazaret-neggweburgi-maid bangudgu, Capernaúm-neggweburgi megnonikid. Weneggwebur, Zabulón-yar-naidgi, degi, Neftalí-yar-naidgi mata-dummad-naid-walik siid.

<sup>14</sup> Ar epenne Bab-Dummad-gayaburba-barsoged-Isaías-sogsagusadba-guegala, deyob gunonikid. Deun sogsgagusgu:

<sup>15</sup> “Zabulón-yala, degi, Neftalí-yala, mata-dummad-naidsik, Jordán-diwar-obakar-bukmalad,

Galilea-dolad, Judío'surmalad.

<sup>16</sup> Dulemar-negsichidgi-gudigusmaladi,  
neg-meegwad daksamalad.  
Negsichidgi-bukwagusmaladga,  
neg mee gunonikid.”

Isaías 9:1-2

<sup>17</sup> Degi, agi Jesús Bab-Dummad-gayaburbagi sunmakarsunnad. Weyob sogded: “Ar Bab-Dummad-e-negdakmaid bemarse warmaksad. Degisoggu, be-isgudiidga na be bukib binsamar. Be-daed na be ogwamar.”

*Jesús ua-gamalad-warbakegwadse gochad  
(Marcos 1:16-20; Lucas 5:1-11)*

<sup>18</sup> Jesús Galilea-mata-dummad-gakaba nadapgu, dule e-urba-ebo mata-dummadgi sakinai dakalid. Gwensak Simón'ye nugad. A-dule, Pedro'ye nugbalid. E-urbadi, Andrés'ye nugad. Amarde gusgu ua-gaedgi arbamaladid.

<sup>19</sup> Jesús amarga sogded:

—Anba be dagmar. Igi bemar ua-gae, deyobi, dulemar-anba-nagumalaga, dulemar-gaega an be-imakmaloed.

<sup>20</sup> Simón, degi, Andrés, e-saki abga yog-indakar imaksamalad, Jesús'ba yog-naar imaksamalad.

<sup>21</sup> Jesús sikwas nadbargu, Jacobo, e-urba-Juan'bo, urgi e-bab-Zebedeo'mala saki-matumakbukwa dakdapid. Jesús, ebadagega, e-sapinganga-guega, amar-ebogwadse gochamogad.

<sup>22</sup> Amar, Jesús'ba-naegala, yog ur-mete, degi, e-bab-Zebedeo-mete nadmalad.

*Jesús dulemar-bukidar-nudaksad  
(Lucas 6:17-19)*

<sup>23</sup> Jesús bela Galilea-yargi, Judío'mar-onmakedneggi dulemar-odurdakdii gusad, Bab-Dummad-e-negdakmaid-gayaburba-nuedgi sunmakdii gusad. Degine, bela dule-uellemalad, degi, galagwensuli ibmar-nunmak-itomalad-nudakdii gusad.

<sup>24</sup> Jesús dulemar-nudakdiidba, bela Siria-yalase e-nug dunguded. A-ular, dulemar bela ibmar-naibi-itodimalad, galagwensuli-gegudimalad, abagan-nunmakdimalad, niasamalad, suu-itodimalad, abagan-burgwarmalad, Jesús'se senonimalad. Bela Jesús amar-nudaksad.

<sup>25</sup> Dule-bukidar Jesús'ba duurmaknadap gusmalad:

Galilea-dorgan,  
Neggwebur-Gwaambe-bukmaladginmalad  
(10),  
Jerusalén'ginmalad,  
Judea'ginmalad,  
degi, Jordán-diwar-obakarmalad,  
amar Jesús'ba duurmaknadap gusmalad.

## 5

### **3b. Jesús yarbirgi dulemar odurdaksad (5:1-7:29)**

*Jesús Dulegi-bur-nued-binsalegedgi sunmaksad  
(Lucas 6:20-23)*

<sup>1</sup> Jesús dulemar-bukidar ese duurmakdanidakdegu, yar-birse nakwisad. Agi sigisgu, e-sapingan ese nonimalad.

<sup>2</sup> Degi, Jesús dulemar-odurdakdegu, sogded:



- 3 “Dulemar bela-belad Bab-Dummad-  
 abedidimaladi, amargi nued binsalesad.  
 Ar ade, Bab-Dummad-e-negdakmaid amarga-  
 did.
- 4 Dulemar-bodidimalad, amargi nued binsalesad.  
 Ar amar-bodidimaladi, bar bukib-binsasuli  
 guoed.
- 5 Dulemar-na-san-dummarba-imaksurmalad,  
 amargi nued binsalesad.  
 Ar amar we-napneg-naid egadga guoed.
- 6 Dulemar igar-napiragwadbina mas-  
 gunbiedyob-itodimalad, degi, igar-  
 napiragwadbina uku-uku-itodimalad,  
 amargi nued binsalesad.  
 Ar Bab-Dummad, amar nabir igar-  
 innikigwad-imaked imakoed.
- 7 Dulemar-nue-wile-emar-daked, amargi nued  
 binsalesad.  
 Ar amar wile daklemogoed.
- 8 Dulemar-gwage-swilidikmalad, amargi nued  
 binsalesad.  
 Ar amar Bab-Dummad-dakmaloed.
- 9 Dulemar emar-gwage-bogidik-imakmalad,  
 amargi nued binsalesad.  
 Ar amar Bab-Dummad-mimmiganye  
 bilenonimaloed.
- 10 Dulemar igar-innikigwadbina baregilledi-  
 malad, amargi nued binsalesad.  
 Ar ade, Bab-Dummad-e-negdakmaid amarga-  
 did.
- 11 ”Dulemar an-nug-ular be-ichoarmalar, be-  
 bareginnarmalar, degi, galagwensuli binsa  
 gakansaar begi sunmakarmalar, bemargi nued  
 binsalesad.

<sup>12</sup> Bemar yeer itomar, wergumar, ar nibneggi bemarga ibmar-uklegoed dummarbad. Ar ayobi, Bab-Dummad-gayaburba-barsogmalad epenne bemar-idu baregillesmarmogad.”

*Bemar baluyob gumalad*  
(*Marcos 9:50; Lucas 14:34-35*)

<sup>13</sup> Jesús sogdebalid: “Bemar we-napneggi baluyob gumalad. Ar balu e-gagbid-surgudele, ¿igi bar balu-balu guosunna? Geg bar ibnuedga gued. Unnila, igargi-milegega gued, dulemar-egi-annaega gued.”

*Bemar gwallu-meegwadyob gumalad*

<sup>14</sup> Jesús sogdebalid: “Bemar we-napneggi gwallu-meegwadga gumalad. Ar neggwebur-gwagwen yar-birgi siile, geg we-neggwebur dukued.

<sup>15</sup> Degine, gwallu, ulu-urba-sigega ogalesulid. Gwallu, e-siged-birgi-sigega ogaleged, adi, bela dulemar-neg-yagi-bukmaladga neg-mee saegar.

<sup>16</sup> Debayobi, gwallu gaeyobi, bemar dulemar-asabin damarmogo, adi, dule-baigan be-ibmar-nuegan-imakdiid dakmalagar, degine, be-Bab-Dummad-nibneggi-maid-e-nug ogannomalagar.”

*Jesús, Moisés-Igar-Mesisadba-daega nonikid*

<sup>17</sup> Jesús sogdebalid: “Mer be binsamalo, an Moisés-Igar-Mesisad-osulolega noniye. An Bab-Dummad-gayaburba-barsogmalad-igar-mesisad-osulogegarbardibeye. Suli, an aga nonisulid. An nonikidi, a-igar gatik bur-nue-odulogega an nonikid.

18 "Ar napira an bemarga soged, we-napneg-naid-bergued-idu, degi, nibneg-naid-bergued-idu, Moisés-Igar-Narmakar-Naid e-bichugwad-bur-bipigwad gwen bipisaar wis ogwalegosulid. Ar bela narmakar-naidba guedsegad.

19 Degisoggu, ar doa-dule we-Igar-Maidgi wis bipisaar egi gwatirisale, degine, ar deyob dulemar-odurdakele, a-dule, dule-bipigwadye Bab-Dummad-e-negdakmaidgi bilegoed. Ar dule bela Moisés-Igar-Maidba daele, degine, ar deyob dulemar-odurdakbalile, we-dule, dule-dummadye Bab-Dummad-e-negdakmaidgi bilemogoed.

20 "Ar napira an bemarga soged, bemarkar-igar-napiragwad-imaked, Garda-Narmaked-Dulemarba, degi, Fariseo'marba bur nuedsulile, Bab-Dummad-e-negdakmaidse bemarkar gwen dogosurmalad."

*Jesús urwed-igargi sunmaksad  
(Lucas 12:57-59)*

21 Degi, Jesús sogdebalid: "Be itosmalad, epenne igi serganga soglesgusa:  
'Melle be dule-oburgo.'

Éxodo 20:13

'Ar dule-wargwen dule-oburgwisale,  
a-dulega odurdakleged-igar ega megnon-ikoed.'

Éxodo 21:12

22 "Ar andi an bemarga soged, ar dule-wargwen binsarsunna-sae-itoge e-gwenadse urwedibe, a-dulega igar-itoleged megoed. Ar doa-dule e-gwenadga sogdibe, 'Be gegewa an be-dakye,'

a-dulega Judío-dummagan ega igar-amiega igar-itogoed. Ar doa-dule e-gwenadga sogdibe, 'Be akargubi an be-dakye,' a-dule soo-sailase odurdakleged bur-nabirid.

<sup>23</sup> "Degisoggu, Bab-Dummadga be ibmar-uksokalid e-ukleged-ailase be sedanikir, agi be be-gwenad-begi-gwatirisad be ebinsaalile,

<sup>24</sup> be ibmar-Bab-Dummadga-uksokalid, e-ukleged-ailagi be obes imako, be-gwenadbo be igar nabonagwer. Geb degi, a-sorba, gannar be dagoed, be Bab-Dummadga-ibmar-uksokalid geb be ukoed.

<sup>25</sup> "Dule-bebo-igar-gwatirnaidbo amba-igarbanadapidgi gwae ebo be igar naboge. Ar degi be imaksulile, abakalegi dule igar-naboged-dummadga be-ukalile, degi, a-dulemoga, suar-ibedga be-ukarmogale. Ar degiile, a esgaryagi be-metoed.

<sup>26</sup> Napira an bega soged, be esgaryagi mellesiidi, be noosurguoed. Bela begi-mani-galesad be ben-nukedsegad."

### *Jesús abirgunagwarsuli-nanamalad-igargi sunmaksad*

<sup>27</sup> Jesús sogdebalid: "Ar be itosmalad, igi serganga soglesa:

'Melle be be-abirginsulid-ebo galagwensuli nanao.'

Éxodo 20:14

<sup>28</sup> "Ar andi an soged: Ar dule-wargwen e-ulubgi sunnasur ome-wargwengi binsasale, bato we-dule na abirgunagwarsuli negsichigi omegi yolesdo.

29 Degisoggu, be-ibya-nuedsikid, be-gwage-ichogega be-imakdibe, bur be onodo, bikiin be metedo. Ar bur be-san bela soo-sailagi mellegedba bur nabirsursi, unnila be-sangi-akanaid-gwensak bei yoggued.

30 Ar be-argan-nued be-gwage-ichogega be-imakdibe, bur be sikdo, bikiin be metedo. Ar bur be-san bela soo-sailagi mellegedba bur nabirsursi, unnila be-sangi-akanaid-gwensak bei yoggued.”

*Jesús ome-meted-igargi sunmaksad*

*(Mateo 19:1-12; Marcos 10:1-12; Lucas 16:18)*

31 Jesús sogdebalid: “Bemar itosmalad, igi epenne bemar-serganga soglesbali: ‘Ar dule-wargwen ome-metele, omega ome-meted-garda ukoed.’

Deuteronomio 24:1

32 ”Ar andi an soged: Ar dule-wargwen unnila e-ome e-dikarba nosarbi sunna ome-meted. Ar degisulile, ome-meted-igar ega gwen maisulid. Ar dule ome-metele, degiir ome negsichigi-yolegega imako-itole, degine, dule ome-melleded-nikusale, a-dule ome-dikarba negsichigi yoledimodo.”

*Ise-sogar-sogleged-igar*

33 Jesús sogdebalid: “Degine, bemar itosbalid, igi epenne bemar-serganga soglesbali:

‘Be ibmar-ise-sogar-sogsadi, be imako, mer be imaksuli guo.

Ar Bab-Dummad-asabin be ibmar-imakoye-sogsadi,

imakedse be sao.’

Levítico 19:12; Números 30:2; Deuteronomio 23:21

<sup>34</sup> "Ar andi an soged: Mer bipisaagwale ibmar-nug-gaale be ise-sogar sogo, an napira imakoye. Mer be ise-sogar sogbalo: We-nibneg-naid-ular an sogye, ar ade, nibneg Bab-Dummad-siged-ologanad.

<sup>35</sup> "Mer be ise-sogar sogbalo, we-napneg-naid-ular napira an sogye an imakoye, ar ade, napneg Bab-Dummad-e-nag-onakwed-ganad. Mer be ise-sogar sogbalo, Jerusalén-neggwebur-ular an napira sogye an imakoye, ar ade, Jerusalén Rey-Dummad-e-neggwebur gued.

<sup>36</sup> Degine, mer be-sanse-bakar, egi be ise-sogar sogo, an-san-ular an napira ibmar imakoye, ar be-sailagiabela geg be gagwensaagwar sipuu imaked, geg sichii imakbalid.

<sup>37</sup> "Ar unnila be soqe, eyeye, an imakoye. Be sogodibe, an imakosurye. Ar weyob-sogsadgi bur bule be obulosale, adi, niagi danidaed."

*Jesús buged-imaklegedgi sunmaksad  
(Lucas 6:29-30)*

<sup>38</sup> Jesús sogdebalid: "Ar bemar itosmarbalid, epenne be-serganga soglesad:

'Ibya-gwagwen dule bei onosale, buged maiye,  
degi, nugar-wargwen dule bei bichisale,  
buged maibarye.'

Éxodo 21:24; Levítico 24:20; Deuteronomio 19:21

<sup>39</sup> "Ar andi an soged: Dule-igsawana sabsur-be-imakalile, mer be abin-imako. Dule-wargwen be-wagar-nuedsikid bei bibyosale, baid-wagar ega be oyobardo.

<sup>40</sup> Ar dule-wargwen bei-mor-dummad-suega igar-itogedgi bebo abin-abin imakardibe, ega be be-mor-baid ukxa be imakbalo.

<sup>41</sup> Ar dule-wargwen ise-barmiar wachi-abalasaar ega-ibmar-seedbi be abedibe, ega bur wachi-irgwen ibmar-seded be sae.

<sup>42</sup> Ar dule bese ibmar egichialir, ega be uke. Dule bega sokalir, wis anga be ibmar udagwerye, an gannar bega ukbaloye, dulegi mer be ibmar nalleguo.”

*Jesús soged, be-isdarmalad be sabgumarye  
(Lucas 6:27-28, 32-36)*

<sup>43</sup> Jesús sogdebalid: “Ar bemar itosmalad, epenne be-serganga soglesad: ‘Be dule-baigan-sabgumar, dule-be-isdaraddi, isdar be dakoed.’

Levítico 19:18

<sup>44</sup> ”Ar andi an soged: Be-isdarmalad be sabgumar. Dulemar-be-nug-ichodimaladga, degi, be-baregindimaladga Bab-Dummadse ega be gormar.

<sup>45</sup> Adi, bemar, be-Bab-nibneggi-maid-e-mimmiganga gumalagar, ar Bab-Dummaddi bela dulemar-nuegan, degi, dulemar-isganaga, dad-ibeler ogamaid. Degine, Bab-Dummad bela dulemar igar-innikii-imakmaladga, degi, igar-innikii-imaksurmaladga, dii owimaibalid.

<sup>46</sup> ”Ar dule-be-sabmaladbi be sabguele, ¿ar ibunued egi be amiosunna? Ibmarnued egi be amiosuli. Ar dule-isganamar, Roma-dummadga-manigaedgi-arbamalad, ¿deyob na imakmarmosursi?

<sup>47</sup> Ar be-gwenadgangarbi be soger, ‘be nued sogeye,’ ¿ar ibu-bur-nued be imakmarsunna?

Gwen ibmar-bur-nued be imaksulid. ¿Ar deyob dulemar-Bab-Dummad-wissurmalad imakmarmosursi? Eye, ar deyob imakmarmogad.

<sup>48</sup> Ar be-Bab-nibneggi-maid ibmar-nuegan imaksoggu, a-ular, bemar ulubgi dule-nueganga gumarmosundo.”

## 6

### *Dule-wileganaga mani-ukleged*

<sup>1</sup> Jesús sogdebalid: “Mer yamo-be-dakmalaga dulemar-asabinbi igar-napiragwad-imaked be sao. Ar deyob be daele, be-Bab-nibneggi-maid bega-ibmar-ukoed bar bega ukosulid.

<sup>2</sup> ”Degisoggu, be dule-wileganaga mani-uksokalile, mer be gar-trompeta binnasur-ogornai be sao. Ar dulemar-wagar-darbodamaladdi, Judío’mar-onmakedneggi, degi, igarba mani-ukmalaga gar-binnasur-ogornai damalad, adi, dulemar e-nug ogannomalagar. Ar napira an bemarga soged, ar a-dulemardi bato e-nug ogannolesmalad, degisoggu, Bab-Dummad bar amar-nug ogannogosulid.

<sup>3</sup> ”Ar bedi wileganga be mani-uknair, be-ibmar-imaknaid mer be dule-baiganga soge-soge dao.

<sup>4</sup> Adi, be wileganaga-mani-uksad mer dule-baigan be-wisgugar. Ar be-Bab bela-odukuar-be-ibmar-imaksad be-daksasoggu, na e emar-wagab bega ibmar-ukoed.”

*Jesús, Babse-goledgi dulemar-odurdaksad  
(Lucas 11:1-4)*



<sup>5</sup> Jesús sogdebalid: “Ar bemar Bab-Dummadse gollalile, mer bemar dulemar-wagar-darbo-damaladyob be damalo. Ar amardi, Bab-Dummadse-gormalaga, gusgu Judío’mar-onmakedneggi yamo gwisgusdamalad, degine, yamo igar-abingunaidgi gwisgus damarbalid, adi, dulemar e-dakmalagar. Ar napira an bemarga soged, ar a-dulemardi bato ega ibmar uklesad. Degisoggu, Bab-Dummad bar amarga ibmar ukosulid.

<sup>6</sup> ”Ar bedi Bab-Dummadse be gollalile, be-negyaba be doge, nue yawagak edis be imako, be-Bab-Dummadbo-apinni be sunmako. Ar be-Bab bela-be-dukuar-ibmar-imaked be-daksoggu, na e emar-wagab bega ibmar ukoed.

<sup>7</sup> ”Ar Bab-Dummadse be gollarmalale, melle be dulemar-Bab-Dummad-wissurmaladyob gannar-gannar ibmar be sogo. Ar amardi binsamalad, gannar-gannar ibmar-sogedba Bab-Dummad e-itogoye.

<sup>8</sup> Degisoggu, mer dulemar-Bab-Dummad-wissurmalad-damaladyob be damalo. Ar be-Bab amba yoo ese be ibmar egise, bato bemar-wisid, ibu be abemala.

<sup>9</sup> Degisoggu, bemar weyob Bab-Dummadse be gormalo:

‘Anmar-Bab-nibneggi-maid, be-nug swilidik obar-iledii gusun.

<sup>10</sup> Be-neg-dakmaid anmarse be sedage.

Igi nibneggi be-sogedba be ibmar imake, deyob, we-napneggi be imakdamo.

<sup>11</sup> Emi-ibagi mas unnitibali anmarga be udage.

12 Igi dulemar anmargi nosale, anmargi-nossulidyob anmar dakdae, deyobi, anmar-begi-isgusad begi-isgussuliyob be anmar-dakmo.

13 Isguedgi-wilubdaklegedse mer warmaked be anmar-imak. Bur isguedgi-obined be anmar-sae.

Birga-miliba degisadegu, be-neg-dakmaid bega-did.

Be-gangued, degi, be-gangued-yeerdakleged, be-gadbalid.

Deyob gusun.' ”

14 Jesús sogdebalid: “Ar dulemar-beginodimalad, begi nossuliyob be dakele, deyobi, be-Bab-Nibneggi-Maid be-dakmogoed. Be-isgusad bega osulogoed, egi-nossuliyobi be-dakmogoed.

15 Ar dulemar-begi-yoledimalad begi nossuliyob be dakurmogale, be-Bab bega isgued osulogosurmogad, egi-nossuliyob be-dakosurmogad.”

### *Mas-gunsuli-gued-igar*

16 Jesús sogdebalid: “Ar bemar Bab-Dummadse-golega mas-gunsuli-gudiile, mer bemar dulemar-wagar-darbodamalad-imakedyob, wagar bukib-binsa na be imakmalo. Ar amardi yamo e-wagar ogwadamalad, adi, dulemar e-dakega, emardi Bab-Dummadse-golega mas-gunsuli gudiye. Ar napira an bemarga soged, amardi bato ibmar nikusmalad.

17 ”Ar bedi Bab-Dummadse-golega mas-gunsuli gudiile, na be nono gwallu-wawagi mage, degi, be wagar nue enukbalo.

18 Adi, dulemar mer be-dakmalagar, Bab-Dummadse-golega mas-gunsuli be gudiiye. Unnila be-Babgarbi be oyogoed, ar egi ibmar dukumaisursoggu, na e dulemar-abargi bega ibmar ukoed.”

*Nibneggi-ibmar-nuegan-nikulegoed*  
(Lucas 12:33-34)

19 Jesús sogdebalid: “Mer we-napneggined-ibmar-nuegan-saboleged be we-napneggi sabomar. Ar we-napneggi amardi udumesed, saa-biin gued, degi, atursamalad we-ibmar atursamalad.

20 Ar bemardi bur nibneggi ibmar-nuegan be sabomar. Ar agindi geg ibmar udumesed, ibmar geg saa-biin gubalid, degine, atursamalad, ibmar-atursaega geg dogmarbalid.

21 ”Ar be-ibmar-nuegan nibneggi sabolesiile, nibneggi be binsadii gudoed. Ar be-ibmar-nuegan we-napneggi-sabolesiirdi, adi, be we-napneggi binsadii gudoed.”

*Ibya anmar-sangi gwalluyob gumogad*  
(Lucas 11:33-36)

22 Jesús sogdebalid: “Ibya anmar-sanga gwal-luga gued. Ar be-ibya nuedile, bela be-san ibeg-war naido.

23 Ar be-ibya isganale, bela be-san negsichidgi gudido. Degisoggu, begi neg-meegwad-naidi sichigwalele, geg be nue ataked. Ar negsichid-bursunna, bur bule goro be insae.

24 ”Dule geg dummad-warboga maileged. Ar unnila wargwen sabgudoed, baididi, isdar dakdoed. Wargwenga nue-alamaknai guoed, baididi,

mesagwar dakoed. Degisoggu, geg be Bab-Dummad-maiga gued, deginbali, geg be maniga mailenai gubalid.”

*Mer surbinsa be itogo  
(Lucas 12:22-31)*

<sup>25</sup> Jesús sogdebalid: “Degisoggu, an bemarga soged, na be-san-dula-gudiidgi mer surbinsa be itomar, ibu an gunnodibeye, ibu an gobodibeye. Degine, mer be-sangi be binsabar, ibu mor an yoodibeye. ¿Ar be-san-burbade mas-gunnedba bur nuedsursi? ¿Ar be-sande mor-yoedba bur nuedsursi?

<sup>26</sup> ”Ar nue be dakmalana, sikwimar-nibagukudimalad, gwen ibmar-gwag digdisurmalad, degi, gwen ibmar-gwag wedisurmarbalid. Deginbali, ibmar-gwag-urbed-negine ibmar-gwag gwen urbedisurmarbalid. Degite, be-Bab-Nibneggi-Maid mas ega ukmaid. ¿Ar bemarkede sikwimarba bur bule nuedsurmarsis? Eye, bur-nuedi.

<sup>27</sup> ¿Ar doa-dule na gatik egi binsaedbali sunna na e-san bisgigwen osugusar be insae? Suli, geg osugue.

<sup>28</sup> ”¿Ibige mor-yoedbina, surbinsa be itomala? Ar be dakmalana, sapur-dutumardi arbasurmar-inigwele, degi, na e-mor sobsurmar-inigwele, degite, dungumai daed.

<sup>29</sup> An bemarga sogmardo, degite, Salomón’bela, mor-yeerdaklemalad-yosan-inigwele, ar dutumaryob gwen mor yossurgusad. Ar dutumar bur Salomón-morba yeer dakleged.

<sup>30</sup> Be daksundo, ar Bab-Dummadde gagan-sapurbarmalad deyob-dakle-imakinigwele, banedgi a-gaganmarde soo-yagi bato ogumaklesiid. Emide be, ¿Bab-Dummadgi benmarde? ¿Ar bemarga bur bule Bab-Dummad geg mor ukde?

<sup>31</sup> Degisoggu, mer surbinsa be itomar, mer be sogmar: ‘¿Ar ibu an gunmaloe? ¿Ibu an gobmaloe? ¿Ibu an yomaloe?’

<sup>32</sup> Ar dulemar-Bab-Dummad-wissurmalad wegiid-ibmar bela amididimalad. Ar be-Bab-Nibneggi-Maiddi bela we-ibmarmar-be-abemalad bemark-wisid.

<sup>33</sup> ”Bur be Bab-Dummad-e-negdakmaid-inse be amimar, e-igar-napiragwad-imaked-inse be amimar. Geb agi, Bab-Dummad, belagwapa we-ibmarmar bemarga ukdagoed.

<sup>34</sup> Degisoggu, bane-bega-ibmar-guodba mer surbinsa be itomar, ar ade, baneddina, na egad-surbinsa-itoged sedanimogod. Ar iba-irbali na e-bonigan egad-egad nikamalad.”

## 7

*Mer yogasaar be sogo, we dule-isganaye  
(Lucas 6:37-38, 41-42)*

<sup>1</sup> Jesús sogdebalid: “Mer yogsaar be sogo, we-dule, dule-isganaye, adi, melle deyob begi soglemogagar.

<sup>2</sup> Ar dulemargi be sogsadyobi, begi soglemogod, degine, dulemarga be igar-mesisadyobi, bega igar-megnonimogod.

<sup>3</sup> ”¿Ar ibiga be-gwenad-ibyagi durgan-maid magari be dake? Ar be-ibya-yabardi suar-maiddi aku be daked.

<sup>4</sup> ¿Ar igi be-gwenadgardi be sogoe: ‘Be-ibya-yaba durgan-maid an bega onogwelo?’ Ar be-ibya-yabardi suar-maiddi aku be daked.

<sup>5</sup> ”¿Ar bema wagar-darbomaladid! Suar be-ibya-yaba-maid-inse be onoge, geb agi nabir be atakoed. Ar deyob geb be be-gwenad-ibya-yaba-durgan-maid onogoed.

<sup>6</sup> ”Mer be ibmar-nuegan-islidikmalad achumarga ukmar. Ar abakalegi begi aibinnarmalale, be-san ichimakarmalale. Degine, dimmurgiid-e-akwa-yeerdaklemalad mer be sinmarga mimar, ar abakalegi egi dii-dii annaarmalale.”

*Bab-Dummadse ibmar-egisleged  
(Lucas 11:9-13)*

<sup>7</sup> Jesús sogdebalid: “Be Bab-Dummadse ibmar egismar, ar Bab-Dummad bemarga ukoed. Be Bab-Dummadgi ibmar amimar, be amimaloed. Be Bab-Dummadse gole, bega Bab-Dummad yawagak egaoed.

<sup>8</sup> ”Ar dule ibmar-bela-egiser, ibmar nikued. Ar dule ibmar-amier, ibmar amioed. Ar dule yawagakgi-dulese-golele, ega yawagak egalegoed.

<sup>9</sup> ”¿Ar doa-dule, e-mimmi ese madu-egichialile, ega akwa ukode?

<sup>10</sup> ¿Ar ua ese egichiardibe, ega naibe ukode? Gege uked.

<sup>11</sup> Ar bemaarde dule-isgana-gumar-inigwele, degite, be-mimmiganga ibmar-nuegan ukmalad.

Ar be-Bab-nibneggi-maid-bulesunna, ¿dulemar-ese-ibmar-egismaladga ibmar-nuegan ukosur be insade? Ukergebed.

<sup>12</sup> "Degisoggu, dulemar igi bega ibmar-imakbi be abege, deyob ega be imakmodo. Ar weyob Moisés Igar-Mesisad, degi, weyob Bab-Dummad-gayaburba-barsogmalad sogsamogad."

*Yawagak-osogwad  
(Lucas 13:23-24)*

<sup>13</sup> Jesús sogdebalid: "Yawagak-yaa-osogwadba be dogmar. Ar yawagak-yaa-dummaddi, e-igar mata-bipisulid. A-igardi, yoggued-negse dulemar-semaid, degine, bukidar agi dulemar bur dogmalad.

<sup>14</sup> "Ar burba-geg-bergued-nikadsedi yawagak-yaa-osogwadba, degine, igar-warakwagwadba dogleged. Dulemar ichee a-yawagak amimalad."

*Dule, e-daedgi mag be dakmaloed  
(Lucas 6:43-45)*

<sup>15</sup> Jesús sogdebalid: "Bab-Dummad-gayaburba-barsogmalad-sunnadsurmaladgi nue salakarmar. Ar amar yamo sibat-wawaadyob nonimaloed. Ar e-ulubgindi, achu-burburudyob sabsur-damalad-dulemalad.

<sup>16</sup> "A-dulemar e-daedgi be dakmaloed. ¿Ar uva'de, iko-sapigi-sanmaksí? ¿Ar higo'de, iko-sapigi welesi? Degisulid.

<sup>17</sup> Ar deyobdo. Sapi-nuegana, e-durba nueganbi sanmaked. Ar sapi-isganadi, e-durba-sanmaked isganabimogad.

<sup>18</sup> Ar sapi-nuedi geg e-durba isgana sanmaked. Degine, sapi-isgana, geg e-durba nued sanmakmogad.

<sup>19</sup> "Ar sapimar e-durba nued sanmaksulile, olalegodo, soogi ogumaklegodo.

<sup>20</sup> Degisoggu, Bab-Dummad-gayaburba-barsogmalad-sunnadsurmalad e-daedgi mag be dakmaloed."

*Bab-negse bela dulemar dogosulid*

*(Lucas 13:22-27)*

<sup>21</sup> Jesús sogdebalid: "Ar bela dulemar anga 'Dummadye, Dummadye' sokedba, Bab-Dummad-e-negdakmaidse gwen dogosulid. Unnila, dulemar an-Bab-nibneggi-maid-sokedba ibmar-saedi nibneggi dogmaloed.

<sup>22</sup> "Bukidar a-ibagangi anga sogdamaloed. 'Dummad, ¿ar anmarde be-nuggi sunmaksasursi? ¿Ar anmarde be-nuggi bukidar niamar-onosmarsursi? ¿Ar anmarde be-nuggine bukidar ibmar-dakledisurmalad imaksasursi?'

<sup>23</sup> Geb degi an abin-sogoed: 'Aku an be-dake. Angi be bangumar. Bemar, unnila ibmar-isgana-saedginbi arbadimalad.' "

*Dule-binsaed-nikadaed, degi, dule-binsaedsulidaed*

*(Marcos 1:22; Lucas 6:46-49)*

<sup>24</sup> Jesús sogdebalid: "Ar doa-dule we-an-sunmaked itosale, degine, eba daele, we-dule, dule-binsaed-nikadaed na e-neg akwa-birgi-sobsayobidid.

<sup>25</sup> Dii-wiargu, diwarmar noalid, burwamar bin-nasur gollalid. Bela-bela a-neggi signonigu, a-neg



gwen aimukussulid, ar ade, neg akwa-birgi sobar siid.

<sup>26</sup> "Degine, ar doa-dule we-an-sunmaked itos-ale, degite, eba ibmar-imbaksasulile, we-dule, dule-binsaedsulid na e-neg ukub-birgi-sobsayobidid.

<sup>27</sup> Dii-wiargu, diwarmar noalid, burwamar bin-nasur gollalid. Bela-bela a-neggi signonigu, e-neg ayarided, a-neg nue-dummad bisgenonikid."

<sup>28</sup> Ar Jesús weyob-ibmar-sogsad-sorba, dulemar Jesús-weyob-e-ibmar-odurdaked geger daksa gusmalad.

<sup>29</sup> Ar ade, Jesús e-ibmar-odurdakedi, Garda-Narmaked-Dulemar-odurdakeyob odurdaksulid. Edi na gangued-nika odurdaked.

## 8

### 3c. Jesús ibmar-dakdisurmalad imaksad

(8:1-9:38)

*Jesús, dule-naibe-buna-yaa-maleged-nikad nudaksad*

(*Marcos 1:40-45; Lucas 5:12-16*)

<sup>1</sup> Jesús yar-birgi-sii aideargu, dulemar-bukidar eba duurmakdani gusmalad.

<sup>2</sup> Agi dule-wargwen, naibe-buna-yaa-maleged-nikad ese sindigar signonikid, ega sognonikid:

—Dummad, an wisi, be an-nudakbier, sunna be an-nudaked.

<sup>3</sup> Jesús e-argan oyodgu, e-argangi ebusgu, ega sogded:

—Nugubi an be-abe. ¡Be nugusun!

Dule-naibe-buna-yaa-maleged-nikad yog  
nugar naded.

<sup>4</sup> Geb degi Jesús dulega sogdebalid:

—Mer dule-baiganga be-nugusad be sogo. Unnila be nae, dule-irwa-Bab-Dummadse-gormaladga na be-san oyona. Ar igi Moisés Igar-Mesisa, a-sogedba be ibmar imakna, adi, dulemar nue-be-nugusad mag be-dakegar.

*Jesús, Roma-sorda-dummad-e-mai-nudaksad  
(Lucas 7:1-10; Juan 4:46-54)*

<sup>5</sup> Jesús Capernaúm-neggweburse dogsagu, Roma-dule-sorda-dulatar-sediid-wargwen (100) ese nonikid, egi wilenonikid,

<sup>6</sup> ega sognonikid:

—Dummadye, an-mai neggi bela abagan-burgwar maid, nue bela-bela nunmaked itomaid.

<sup>7</sup> Geb degi Jesús, abin-sogde:

—An daknao. Bega an be-mai nudaknao.

<sup>8</sup> Degi, Roma-dule-sorda-dulatar-sediid (100), Jesús-abin sogded:

—Dummad, ¿ande doasunna an-negse be dog-naer? Unnila ibmar be sogsa-sae, agi an-mai yog nugar naoed.

<sup>9</sup> Amba an dummad-nikmogad, degine, ani, an dummadmogad, sordamar ani an sediid. Ar wargwenga an sogdibe, ‘Be nae,’ yog naardaed. Baidga an sogbardibe, ‘Be dage,’ yog dagardaed. Degine, an-maiga an sogdibe, ‘We be imake,’ yog imakar-daed. Ar deyobmogad, unnila be sogsa-sae, agi an-mai yog nugar naoed.

<sup>10</sup> Jesús weyob Roma-sorda-dummad ega soge itoargu, geger-ito naded, geb degi, dulemar-esorba-duurmakdanimaladga sogdesun:

—Napira an bemarga soged, Israel-dulemargi weyob dule nue an-bensulid an dakdisulid.

<sup>11</sup> "Ar an bega sogdo, bukidar dad-nakwedsik, degine, dad-argwanedsik dule-Judío'surmalad Bab-Dummad-negdakmaidse nonimaloed, adi, Abraham'ba, Isaac'ba, degine, Jacob'ba mas gunmalagar.

<sup>12</sup> Ar dulemar Bab-Dummad-e-negdakmaidse-dogmaloenadi, dogosurmalad, negsichidgi mag-aba melledmaloed. Agi bosii gumaloed, nun-makedba nugar-ogorsii gumaloed."

<sup>13</sup> Geb degi Jesús Roma-dule-sorda-dulatar-sediidga sogded:

"Be nae, ar be bengussursoggu, be-mai an bega nudaksasun."

A-wachigi dummad-e-mai-uellemaid yog nugar naded.

*Jesús, Simón-Pedro-e-sakbunder-uellemaid-nudaksad  
(Marcos 1:29-34; Lucas 4:38-41)*

<sup>14</sup> Jesús Pedro-negse nonigu, daknonikid, Pedro-e-sakbunder nue uellemai.

<sup>15</sup> Jesús Pedro-sakbunder-e-argangi-ebusgu, uelleged yog surguar naded. Degi, Pedro-e-sakbunder yog gwisguar imaksad, geb a-sorba, Jesús'ga yog ibmar-imakar naded.

<sup>16</sup> A-ibagi, neg-sedosgu, dulemar bukidar ese niaburba-nikmalad senonimalad. Jesús unnila e-sunmakedgi niaburbamar-onosad, degi, bela dulemar-uellemalad nudaksabalid.

<sup>17</sup> We-ibmar-gusadi, ar Bab-Dummad-gayaburba-barsoged-Isaías epenne sogsagusadba guegalad. Deun sogsagusgu:

"Anmarga anmar-bonigan sesad,

anmar-anar, anmar-nunmaked itosad.”

Isaías 53:4

*Jesús'ba nabigusmalanad*

*(Lucas 9:57-62)*

<sup>18</sup> Jesús dulemar-bukidar e-dikarba-gudii daksoggu, e-sapinganga igar uksad, adi, mata-dummad-obakar namalagar.

<sup>19</sup> Degine, geb garda-narmaked-dule-wargwen Jesús'se nonikid, ega sognonikid:

—Odurdaked-saila, ar bia be naoe, an beba nauquodo.

<sup>20</sup> Jesús abin-sogded:

—Ar usmardi na e-gubya nikamalad, sikwimardi e-uu nikamarmogad. Ar andi, Dule-Machi, neg sated. Anyob be unni nanamogale, anba be dagodo.

<sup>21</sup> E-sapin-baid Jesús'ga sogdemogad:

—Dummad, bina an-babse an nagwelo, an-bab-burgwedse geb beba an naoed.

<sup>22</sup> Jesús, abin-sogded:

—An-sapinga-guega anba be dage. Ar dule-baigan, e-dule-burgwarmalad digoed.

*Jesús burwa-dummad obogilesad*

*(Marcos 4:35-41; Lucas 8:22-25)*

<sup>23</sup> Agine, Jesús urgi nakwis imaksad. E-sapingan eba nadmarmosunnad.

<sup>24</sup> Mata-abargusgu, burwa-dummad egi noalid. Ar demar bipisursoggu, bela ur demarba doged gualid. Jesús'di uryagi ise-gabar maid.

<sup>25</sup> Geb degi, e-sapingan Jesús-gabmaidse nad-malad, odaksamalad, ega binnasur sogdemalad:

—¡Dummad! Anmar-ur dogmai, be anmar-bendake. Anmar bergumaloed.

<sup>26</sup> Jesús abin-sogded:

—¿Ar ibi be dobmala? ¿Ar be an-benmarsi? Bemar dobguewilubsulinad.

Degine, geb Jesús gwisgusgua, burwaga, degi, demarga sabsur sogded: “Be bogidik gumar.” Geb degi, bela neg bogidik nadsunnad.

<sup>27</sup> Bela e-sapingan geger dakdemalad:

—¿Ar we-dulede doasunna, burwase-bakale, demarse-bakale, eba ibsaed?

*Jesús Gadara-dorgan-warbogwadgi niamar-onosad*

*(Marcos 5:1-20; Lucas 8:26-39)*

<sup>28</sup> Jesús, degi, e-sapingan, mata-dummad obak-samargu, Gadara-yalase modapmalad. Napase aidesmargu, walabo dule-niasamalad ese non-imalad, neg-uangi gudii noarmalad. Ar we-ebogwad gadi urwemarsoggu, dulemar geg a-igarba nanamalad.

<sup>29</sup> Niasamalad-warbogwad binnasur gotemalad, sogdemalad:

—Jesús Bab-Dummad-Machi, ¿ibiga be anmargi yoledaniki? ¿Ar be anmarse danikidi, amba yoo anmar-odurdaked-ibagan-moed-iduar bato be sabsur anmar-odurdakega daniki?

<sup>30</sup> Emar-gunaidgi undar-banguedgi deun sinmar bukidar mas-mananaid.

<sup>31</sup> Niamar Jesús’gi wilenai gusmalad, ega sogdemalad:

—Ar dulegi be anmar-onogele, weba-sinmar-bukidar-mas-mananaidse be anmar-barmide.

<sup>32</sup> Jesús ega sogded:

—Eye, sinmarse be dognamar.

Niamar dulegi nodgu, sinmarse nadmarsunad, agi ubodapmalad. Bela sinmar-ichesulid, danagwen yar-weregedgi babatidmalad. Demarse sinmar bela batismargu, bela gundilegar burgwismalad.

<sup>33</sup> Sin-edarbemalad dobguar duurmakdemalad. Neggweburse modapmargu, bela sogdapmalad, igi sinmar gundilegar burgwismala, degine, igi warbo niasamalad nugusmarbali.

<sup>34</sup> Degi-itosmargua, bela a-neggweburginmalad Jesús-abin ainiarmalad. Jesús-daksamargu, egi wile-naigusmalad, adi, e-yargi naegar. Agi Jesús urgi nakwissunnad.

## 9

### *Jesús dule-abagan-burgwar-nikad-nudaksad (Marcos 2:1-12; Lucas 5:17-26)*

<sup>1</sup> Degi, Jesús urgi nakwisgu, mata-dummad-gaka-baidse nadsunnad, na e-neggweburse non-isunnad.

<sup>2</sup> Agi dule-wargwen, bela-abagan-burgwar-nikad ese dule-megedgi-mai senonimalad. Ar Jesús dule-senonimalad-egi-gwen-bensulidakdegu, dule-abagan-burgwaledga sogded:

—An-ai, gandik na be imako. Be-isgued an bega elisun.

<sup>3</sup> Degi, Garda-Narmaked-Dulemar gwenna-gwenna ulubgi sogdemalad: “We-dule, Bab-Dummad-nuggi nue dodonaid.”

<sup>4</sup> Ar Jesús dulemar-ulubgi-binsanaid sunna mag daksoggu, ega sogded:

—¿Ar ibiga bemar na be-gwagegi ichakwa bin-sanai? ¿Geg-isgued-osulo be an-insae?

<sup>5</sup> Be anga sogmardo, biti bur baisursunna soglege: ‘Be-isgunaid an bega osulos.’ An sog-barsundibe: ‘Be nugu, be gwisgu, be nae.’ Suli, ebobela baisursunna imaklesulid.

<sup>6</sup> Degisoggu, ani Dule-Machi, dule-bonigwaled an nudakoed, adi, be wisgumalagar, igi an dule-bonigwaled sunna nudake, debayobi we-napneggi dule-gwage-isgued an sunna nudakbalid.

Deги, Jesús dule-abagan-burgwar-nikadga sogdesun:

—Be gwisgu, be-meged be sede. Be-negse be nasun.

<sup>7</sup> Geb degi, dule-bonigwaled yog gwisguar imaksad, e-negse nadsunnad.

<sup>8</sup> Ar dulemar dule-nugusad-dakdegu, geger dakdemalad. Bab-Dummad dulega we-gangued-uksadba, dulemar Bab-Dummad-nug odummodmarsunnad.

*Jesús, Mateo'se gochad*  
(*Marcos 2:13-17; Lucas 5:27-32*)

<sup>9</sup> Jesús dule-nudaksadgi-gwichi nadgu, dule-wargwen-Mateo'ye-nugad dakalid. A-dulede, Roma-dummadga-mani-galeged-neggi, mani-gaedgi arbasiid. Jesús, Mateo'se goted, ega sogded:

—An-sapinga-guega anba be dage.

Deги, Mateo gwisgusgu, eba yog naar imaksad.

10 Jesús, e-sapinganmala Mateo-neggi mas gunsigu, dulemar-Roma-dummadga-mani-gaedgi-arbamalad, degi, dule-baigan-galagwensuli-isgudimalad eba mas-gunbukwa gusmarmogad.

11 Fariseo'mar, Jesús-dakarmargu, dule-isganamarba mas-gunsii, Jesús-sapinganga sogdemalad:

—¿Ar ibiga bemar-odurdaked-saila dulemar-Roma-dummadga-mani-gaedgi-arbamaladba, degi, dule-baigan-isgudimaladba wede mas gunne?

12 Jesús, deyob Fariseo'mar-soge-itosgu, sogded:

—Dulemar-gegusurmalad ina-duled abesulid, unnila gegumaladbi ina-duled abe damalad.

13 Degisoggu, be namar, be baraminamar, igi-Bab-Dummad na E-Gardagi sogbie, deun sogsagu: 'Anga ibmar-ogumakar-ukedba nue-wile-emar-daked bur an abeged.'

Oseas 6:6

"Ar we- napnegse an nonikidi, dule-nueganse, isgudisur-itomaladse-golega an nonisulid. An nonikidi, dule-isgudimaladse-golega an nonikid."

*Mas-gunsuli-gudigued-igar*

*(Marcos 2:18-22; Lucas 5:33-39)*

14 Agi Juan-sapingan Jesús'se nonimalad, ega sognonimalad:

—Anmar, degi, Fariseo'mar, imbagwenar Bab-Dummadse-golega mas-gunsuli gudidamalad. ¿Ar ibiga be-sapingandi Bab-Dummadse-golega gwen mas-gunsuli gudidasurmala?

15 Jesús, abin-sogded:



—Dulemar ome-nikued-ibagi masgullegedse nonikile, ar dule-ome-nikuoed e-abargi-siir, ¿bukib binsamalo be insae? Geg bukib binsaed. Ar dule-ome-nikunaid e-idu-seledoed-ibagan nonikoed. A-ibagan-nonikile, agindi, Bab-Dummadse-golega mas-gunsuli gudigumalodo.

<sup>16</sup> Jesús sogdebalid: “Ar dule morgoa-binid matuga mor-seredgi-nasikega gwen imakdisulid. Degir, morgoa-binid sinnii nadele, mor-sered aka bur bule achirmakdo-itole.

<sup>17</sup> ”Deginbali, vino-binid gwen ibmar-uka-bugluga-sobaled-seredgi baliledisulid. Degir, vino-binid mudele, buglu-sered esirmako-itole. Degir binsa vino-binid milego-itole, degi, buglusebakar binsa miledo-itole. A-ulale, vino-binid buglu-binidgi baliledo, adi, ebobela nabir igarga guegar.”

*Jairo-bunolo-durgusad, degi, ome-nugusad  
(Marcos 5:21-43; Lucas 8:40-56)*

<sup>18</sup> Jesús wegi-sunmaksii, machered-wargwen, dule-nue-nug-nikagwad ese abarmaknonikid, yokorgi sindigar asabin signonikid, ega sognonikid:

—An-bunolo emiskwaa burgwisad. Anba be dage. An-bunologi be-argan be mesdage, adi, gannar durguegar.

<sup>19</sup> Jesús gwisgus-imalsagu, eba naded. E-sapinganmar eba nadmarmogad.

<sup>20</sup> Degine, ome-gwensak birgambe-gakabogus (12) boni-nalur-nika-gudiid, Jesús-yarganba nonikid, e-morduku ebunonikid.

<sup>21</sup> Ome na ulubgi binsaed: “Ar unnila Jesús-mordukubi an ebusale, an nudaklegoye.”

<sup>22</sup> Ar Jesús aibiris imaksagu, ome-gwichi dakalid. Geb ega sogded:

—Omegwa, mer be dobgu. Ar be nue an-bengussursoggu, be nugussun.

Agine, ome yog nugar naded.

<sup>23</sup> Jesús dule-nug-nikagwad-negse modap-sunnad. Agi dogdegu, dakded, dulemar-garogormalad bato guagwar bukwa, degi, dulemar bukidar oimakbukwa.

<sup>24</sup> Jesús amarga sogded:

—Bemar ainirmar. Ar bunolo burgwar maisulid, unnila gabmaid.

Dulemar, Jesús'gi dododmar.

<sup>25</sup> Jesús bela dulemar-onisgua, geb negyaba bunolo-maidse dogded. Jesús bunolo-argangi-gadapgu, ogwichis imaksad.

<sup>26</sup> Bela a-yargi Jesús-bunolo-odurgusad, wisgunoni gusmalad.

*Jesús dulemar-warbo-ibyasurmalad-nudaksad*

<sup>27</sup> Jesús bunolo-neggi nodgu, dulemar-warbo ibyasurmalad Jesús-sorba dani gusmalad, binnasur-gordani gusmalad:

—Be David-wagwa, be dule-dummadid, wile be anmar-dake.

<sup>28</sup> Degi, Jesús negse dogsagu, dulemar-warbo-ibyasurmalad ese nonimalad. Jesús amarga sogded:

—¿Ar bemar insagua, sunna an bemar-nudak be insamala?

Amar abin-sogdemalad:

—Dummad, eye, sunna be anmar-nudake.

<sup>29</sup> Geb degi, Jesús amar-ibya ebusad. Amarga sogded:

—Ar bemar an-bensurmarsoggu, be nugumar-sun.

<sup>30</sup> Geb degi, amar nabir ataknadsunnad. Geb Jesús amarga ise-sogar imaksad:

—Melle an-bemar-nudaksad dule-baiganga be sogmalo.

<sup>31</sup> Ar dule-warbogwad-nugusmalad a-neggi nodmargu, bela neggwebur-iliba sogdemalad, igi Jesús e-onudaksa.

*Jesús, dule-geg-sunmaked osunmaksad*

<sup>32</sup> Ar ibya-nugusmalad nodmargu, Jesús'se dule-niasaed-geg-sunmaked senonimalad.

<sup>33</sup> Jesús a-dulegi nia-onosgua, dule-geg-sunmaked nabir sunmaknaded. Dulemar-bukidar geger dakdemalad, sogdemalad:

—Ar Israel-yargi wegiid-ibmar iduar gwen dakledisulid.

<sup>34</sup> Ar Fariseo'mardi sogdemalad:

—Ar wedi, nia-sailaba niamar-onodiid.

*Jesús dulemar-nue-wiledaked*

<sup>35</sup> Jesús bela neggweburmar-dummaganbananadii gusad, degi, neggweburmar-burwiganaba-nanadii gusbalid, Judío'maronmakedneggi dulemar-odurdakdii gusbalid, Bab-Dummad-e-negdakmaid, a-e-gayaburbanuedgi sunmakdii gusbalid, degine, dulemar-abargi bela galagwensuli-gegumalad, degi, uellemalad-nudakdii gusbalid.

<sup>36</sup> Ar Jesús dulemar-bukidar-dakdegu, nue wile amar-dakded, ar ade, dulemar e-bendaked-sate-gudidii daked, degine, e-idued sate dakbalid, igi sibad-wawaad e-idued-sate-gudii damalayob.

<sup>37</sup> Geb degi, Jesús burbar e-sapinganga sogded:

—Napira an bemarga soged, nainugi ibmar-gwag-weleged bukidarad, ar e-weemaladdina ichee gued.

<sup>38</sup> Degisoggu, nainugi-ibmar-gwag-weleged-e-ibedse be wilesakwaa egismar, adi, e-nainuse ibmar-gwag-wemalad barmidagegar.

## 10

### 3d. Jesús, e-sapin-dummaganga igar-uksad

*(10:1-11:1)*

*Jesús, e-ambe-gakabo (12) e-sapin-bur-dummaganga-guega susad*

*(Marcos 3:13-19; Lucas 6:12-16)*

<sup>1</sup> Degi, Jesús na e-sapingan-ambe-gakabogwadse (12) gochagua, ega gangued uksad, adi, niaburbamar onogega, dule-galagwensuli-gegumalad nudakega, degi, bela uellemalad nudakegarbar.

<sup>2</sup> Jesús na e-sapingan-bur-dummagan-ambe-gakabogwad (12) weyob nugmalad:

Gebedgi, Simón, Pedro'ye nugbalid.

Agine, Andrés, Simón-e-urba.

Zebedeo-machimala: Jacobo, degine, e-urba-Juan.

<sup>3</sup> Degine, Felipe, Bartolomé, Tomás.

Deginbali, Mateo, Roma-dummadga-manigaedgi-arbasad.

Jacobo, Alfeo-machid.

Lebeo, Tadeo'ye nugbalid.

<sup>4</sup> Simón, a-dule Cananeo-sordad.

Degine, Judas-Isariote, darba-Jesús-uksad-dule.

*Jesús-sapin-dummagan, Bab-Dummad-e-negdakmaidgi sunmakapid*  
(*Marcos 6:7-13; Lucas 9:1-6*)

<sup>5</sup> Jesús wemar, e-ambe-gakabogwad (12) barmisad, ega igar uksad: “Mer Judío’surmaladse be namalo, degine, Samaria-neggweburmargi mer dogmarbalo.

<sup>6</sup> Ar bur be Israel-dulemar sibat-wawaadyob-yoggus-gudimaladse be namaloed.

<sup>7</sup> ”Ar be nadmalale, Bab-Dummad-gayaburbagi be weyob sunmakmaloed: ‘Emigindi, Bab-Dummad-e-negdakmaid anmarse warmaksasunye.’

<sup>8</sup> Degine, dule-uellemalad be nudakmaloed, dule-naibe-buna-yaa-maleged-nikmalad be nudakmarbaloed.

Dulemar-burgwar-mamaid be gannar odur-gumaloed,  
dulemargi be niamar onomaloed.

”Ar we-gangued manigi bemarga uklessur-soggu, binsa bemar aimar-bendakmarmogoed, mer egi mani gamarmogo.

<sup>9</sup> ”Degine, olo, mani, esnon-mani, mer be sagu-yaba sedmalo.

<sup>10</sup> Mordukwa amba igarba be sedosurmarbalid, amba mor gobo sedosurbalid, amba sapat-ogwaed satebar, amba gaapoled sedosurbar. Ar ade, dule-arbaedi na e-arbaedgi mas gunnergebed. Degisoggu, dulemarga be-ibmar-saoedi, a-dulemar masgi bemar-ogunnoed.

11 "Ar ibu-neggwebur-dummadse be dogdapdibe, neggwebur-bipigwadse be dogdapdibe, dule-nabir-be-sunmaked-abingaoed be amimaloed. A-neggi be a-neggweburgi-noedse be megmaloed.

12 Ar bemar a-negyase dogdapile, neg-ibedse be golo, ega sogo, bemar nued sogeye.

13 Ar a-negginmalad nued-egi-be-binsaed abingaele, a-negyagi dulemar neg-bogidikid ega nangunonikoed. Ar degisulirdi, neg-bogidikid nikuo-sulid.

14 "Ar dule-wargwen be-abingasulile, degine, be-sunmaked itosurbalile, a-neggindibe, a-neggweburgindibe, be nodagoed. Agi be noalile, be-naggi-olli-nanaid nue eli-eli be imakoed, oyogega, ese bemar bar dagosurye.

15 Napira an bemarga soged, Bab-Dummad-igar-nabirogoed-ibagi, we-neggweburginmalad-be-abingassurmalad, Sodoma-neggweburginmaladba, degi, Gomorra-neggweburginmaladba bur bule sabsur odurdaklemaloed."

*Jesús bonigan-abargi e-sapingan-barmisad  
(Marcos 13:9-13; Lucas 21:12-19)*

16 Jesús, e-sapinganga sogded: "Emigi bemar, sibad-wawaadyob, achu-burburumalad-abargi an na be-barmidmar. Degisoggu, naibeyob bemar guagwar gudimaloed. Deginbali, baisursunna nuu-daeyob be damarbaload.

17 Dulemargi nue salakarmar. Ar amar, Judío-dummagan-igar-nabiromaladga be-ukmaload, degine, Judío'mar-onmakedneggine, sabsur be-bibyomarbaload.

18 Degine, ar be an-sapingan-gusoggu, dulemar, dummagan-negdakmamaid-asabin, degi, reymar-asabin be-ebipidmaloed, adi, dummaganga, degi, Judío'surmaladga bemar angi sunmakmalagar.

19 "Ar dulemar a-dummaganga be-uksamalale, mer be bukib binsamalo, igi an sogodibeye. Ar be sunmak-sokalile, Bab bega binsaed ukoed, igi be sogoe.

20 Ar ade, bemar sunmakosulid, Bab-Dummad-Burba-Isligwaled bemarba sunmakoed."

21 Jesús, e-sapinganga sogdebalid: "Dulemar e-gwenadgan-oburgwega na muchub-muchub urmaknanai gumaloed. Bab na mimmigi aibinnai guoed. Mimmigan babgangi gwisgunanai gumoed. Na oburgwenanai gumaloed.

22 Bemar an-sapingan-gumarsoggu, a-ular, bela dulemar isdar be-dakmaloed. Ar galakussurmaladdina, igar-bulegan-berguedse nue abonolemaloed.

23 "Ar neggwebur-gwensakgi be-bareginnarmalale, baid-neggweburse be idu wakinmalo. Ar napira an bemarga soked, amba yoo Israel-neggweburmar-bela-onoge, ani Dule-Machi, an danikoed.

24 "Ar bemar wisid, ar e-sailaba bur sapin dum-madsulid, degine, e-ibedba bur mai dummad-sur-balid.

25 Degisoggu, sapin e-sailayob-gusale bato gusbindo, degine, mai e-ibedyob-gusmogale, bato yeer itogewilubmodo. Ar dulemar an-annik sogmalad, ande Nia-Saila-Beelzebú'ye, ¿ar bembursunna? Deyob bemarse gorlemarmogodo."

*Bab-Dummad bur be dobgumar  
(Lucas 12:2-9)*

<sup>26</sup> Jesús sogdebar: “Degisoggu, dule-isdar-be-dakmalad mer be dobgumar. Ar bipisaale ibmar-dukuar-imaklegedi, magadse buud noosurdeeye gwen soglesulid. Degi, ar emi amba ibmar-dukualed wisgulegosurdeeye gwen soglesurbalid. Ar wisgulegedsegad.

<sup>27</sup> Ar begarbi an-ibmar-sogedi, bela dulemarga be sogmala. Ar unnila be uaya-nabarbi an bega ibmar-sogedi, bela dulemarga gatik be sog-maloed.

<sup>28</sup> ”Dulemar-be-oburgwebimalad, mer be dobgumar, ar be-burbadi oburgosurmalad. Bur Bab-Dummad be dobgumar, ar adi, sunna soo-sailagi dule-burba, degi, dule-san meted.

<sup>29</sup> ”¿Ar ade, sikwi-gwabo, esnon-gwagwengi uk-lesursi? Ar degite, sikwi-gwagwensaale napase be-Bab-sogsuli gwen argwanosulid.

<sup>30</sup> Ar bemar-sailagiase-bakar, be-Bab-Dummad bela ebisar sediid.

<sup>31</sup> Degisoggu, mer be dobgumar, ar bemar bur bule sikwimarba bur ibmar-nueganad.

<sup>32</sup> ”Ar doa-dule dulemar-asabin na sogdibe, ‘an Cristo’ba naiye,’ an-Bab-nibneggi-maid-asabin an sogmogodo, ‘we-dule an-sapinye.’

<sup>33</sup> Ar doa-dule dulemar-asabin an-osulosardi, adi, an-Bab-nibneggi-maid-asabin an a-dule osu-lomogodo.”

*Jesús-ular, dulemar muchub-muchub urwenai  
gumaloed  
(Lucas 12:49-53; 14:25-33)*



<sup>34</sup> Jesús sogdebalid: “Mer be binsamalo, we-napnegse an neg-bogidik-saega an noniye. Neg-bogidik-saega an nonisulid. An nonikidi, urwed-onogega an nonikid.

<sup>35</sup> ‘An nonikidi, dule na e-bab-ebo ourwega an nonikid,  
 bunagwa na e-nan-ebo ourwega an nonikid,  
 bala na e-saka-bundor-ebo ourwega an nonikid.

<sup>36</sup> Ar neguyaginmalad na e-isdarmaladga gunonimaloed.’

Miqueas 7:6

<sup>37</sup> ”Ar dule, an-sabedba bur bule e-bab-sabele, e-nan-sabele, we-dule an-sapinga gege gued. Ar dule an-sabedba bur bule e-bunagwa-sabele, e-machigwa-sabele, an-sapinga gege gued.

<sup>38</sup> Igi dule burgwegala, nakrus semadae, deyobi, dule guakwaa burgwega anba nanasulile, a-dule an-sapinga gege gued.

<sup>39</sup> ”Ar dule-wargwen na e-san-bendakedgi binsaele, e-san-burba ei berguoed. Ar anba-naidular, burgwenonikirdi, adi, e-san-burba benda-knonikoed.”

*Bab-Dummad ibmar-nuegan ukoed*  
*(Marcos 9:41)*

<sup>40</sup> Jesús sogdebalid: “Ar dule bemar-abingaele, an-abinganaido. Ar dule an-abingaele, Bab-Dummad-an-barmialid-abinganaido.

<sup>41</sup> Ar dule Bab-gayaburba-barsoged-abingaele, ar Bab-gayaburba-barsoged-ibmar-abingaeyobi, Bab-Dummad ega ibmar-nuegan ukmogoed. Degine, dule, dule-innikidaed-abingaele, ar dule-innikidaed-ibmar-abingaeyobi, Bab-Dummad ega ibmar-nuegan ukmogoed.”

<sup>42</sup> Jesús sogdebalid: “Ar doa-dule dule-bipigwadga nog-gwagwen dii-diopigwad uksadibe, ar dule-bipigwad-an-sapingusoggu, napira an bemarga soged, Bab-Dummad ibmar-nuegan ega ukosurdeeye soglesurdo, ega ukedsedo.”

## 11

*Diigi-dule-oged-Juan, Jesús'se e-sapingan-barmialid*  
(Lucas 7:18-35)

<sup>1</sup> Jesús, e-sapingan-ambe-gakabo-guedga (12) igar-uksad-bergusad-sorbali, Galilea-neggweburmarse, Bab-Dummad-gayaburbagi sunmakega, degine, dulemar-odurdakega, nade gusad.

### **3e. Jesús baigan ibmar imaksad**

(11:2-12:50)

<sup>2</sup> Diigi-dule-oged-Juan esgaryagi-mellesigua, Cristo-ibmar-imakdiid itoalid. Geb agi, Juan, e-sapingan-warbo Cristo'se barmialid,

<sup>3</sup> adi, ese egisegar:

—Ar epenne Bab-Dummad-sogsad, yoedse dule-wargwen an bemarga barmidagoye, ¿ar be a-dule? ¿Anmar dule-baid amba edarbemaloe?

<sup>4</sup> Jesús, abin-sogded:

—Be namar, Juan'ga be ibmar-itosmalad sognamar, be ibmar-daksamalad sognamar:

<sup>5</sup> Dulemar-ibyasurmalad, emisgi mag-atakmalad, dulemar-muya-muya-nanamalad, nabir-nanamalad,

dulemar-naibe-buna-yaa-maleged-  
 nikmalad, swilidik gusmalad,  
 dulemar-uaya-yallirmalad, nabir-mag-ito  
 gudmalad,  
 dulemar-burgwismalad, gannar durgud-  
 malad,  
 degine, dulemar-wileganaga, Bab-Dummad-  
 Gayaburba-Nuedgi ega sunmakleded.

<sup>6</sup> "Degine, Juan'ga be sogbalo: 'Ar dule-an-  
 bensulidgindi, nued egi binsalesye.' "

<sup>7</sup> Juan-sapingan-warbogwad nadmargu,  
 Jesús, Diigi-dule-oged-Juan'gi dulemarga  
 sunmakded. Sogded: "¿Ar ibi-dakega bemar  
 nega-dulesulidganba arbimarsunna? ¿Nargammu  
 burwaba-aibangwichi-dakega be arbimala? Suli,  
 a-dakega be arbisurmalad.

<sup>8</sup> ¿Degite, ar ibi-dakega be arbimarsunna?  
 ¿Dule-wargwen mor-nued-yoi-gudiid-dakega be  
 arbimala? Suli, a-dakega be arbisurmalad. Ar  
 dulemar-mor-nued-yoi-gudimaladdi, reymar-  
 negyagi gudidimalad.

<sup>9</sup> Ar degite, ¿ibi-dakega be arbimarsunna? ¿Bab-  
 Dummad-gayaburba-barsoged-dakegala? Eye, an  
 bemarga sogmar, a be daksamalad. Degine,  
 Bab-Dummad-gayaburba-barsogedba bur dule-  
 dummad be daksamalad.

<sup>10</sup> Ar we-dulegine bato narmakar Bab-Dummad  
 sognaid:

'Be-iduale, anga-gayaburba-berbegeg an barmi-  
 doed,  
 Adi, be-iduar bega igar-mayegar.'

Malaquías 3:1

11 "Napira an bemarga soged: Dulemar-we-napneggi-gwalulemaid Diigi-dule-oged-Juan'ba-bur-dummad sulid, ar degite, Bab-Dummad-e-negdakmaidgi bur-dule-bipigwadi, a-dule, Diigi-dule-oged-Juan'ba bur dule-dummadid.

12 "Diigi-dule-oged-Juan-akale, emi-ibadsega, Bab-Dummad-e-negdakmaidse-dogegala, dutusulidgi dogleged, unnila dulemar-dutusurmaladbi ese dogmaloed.

13 Ar bela Bab-Dummad-gayaburba-barsogmalad, degi, Moisés-Igar-Mesisad, Diigi-dule-oged-Juan-nonikidse Bab-Dummad-gayaburbagi sunmaksamalad.

14 Ar bemarga-an-soged bemar abingabiele, Diigi-dule-oged-Juan, we Elías-danikoye-soglesad-duledo.

15 Bemar mag nue-itobiele, an bemarga ibmar soged nue-itomar."

16 Geb degi, Jesús sogdebalid: "Degite, emi we-dulemar-bukmaladde, ¿doasunnaa damar be insae? Wemar-damaladi, machimala neg-magaba ambikuedgi-ambikumaladyobid, muchub-muchub agi gorbukdamalad,

17 ega sogbukdamalad:

'An bemarga gar-ogochamalad,  
degite, gwen be dodossurmalad.

An bemarga bukib-binsa namaksamalad,  
degite, gwen be bossurmalad.'

18 "Ar Juan we-napnegse-nonigu, dule-baigan-mas-gunnedyob mas-gunsuli gudigusad, dule-baigan-gobedyob gobsuli gudigusad. Egi be sogsagusmalad, 'Wedi nia naiye.'

19 Ani Dule-Machi, andi nonigu, mas gunnonikid, gobnonibalid. Emide, angi be sogmalad: ‘We-dule be dakmalana, gadi-masgunned-duled, gadi-vino-gobed-duled.’ Deginbali, be sogmarbalid: ‘Dulemar-Romadummadga-mani-gaedgi-arbamalad-e-aiye, degine, dulemar-galagwensuli-isgudimalad-e-aiye.’ ”

Geb degine, Jesús sogdesunnad: “Ar dule-Bab-Dummad-ibmar-wisidi, ibmar-nuegan-imakedgi mag-dakle daed.”

*Jesús neggweburmar-sabsur-odurdaklegoedgi sunmaksad*

*(Lucas 10:13-15)*

20 Geb degi, Jesús neggweburmargi-bukidar-ibmar-dakledisurmalad-imaksadgi sabsur ega ibmar sokarsunnad. Ar ade, a-neggweburginmalad na e-isgudiidga gwen bukib binsasurmalad, e-isgudiid gwen iesurmalad.

21 Jesús sogdesunnad: “¡Corazín-dorgan, be duledar-wilesmar! ¡Betsaida-dorgan, be duledar-wilesmar! Ar bemar Bab-Dummadse sabsur-odurdaklenonimaloed. Ar Tiro-neggweburgi, degi, Sidón-neggweburgi we-ibmar-dakledisurmalad imaklesana, a-neggweburmar bato dikasurgus wile-itoged-mor yosmalanad, degine, burugi obsamarbalinad, adi, oyogega, emarde na e-isguedga bukib ulubgi nueitosmarye.

22 Degisoggu, an bemarga sogsun, Bab-Dummad-igar-nabogoed-ibagangi, bemar burbule Tiro-dorganba, degi, Sidón-dorganba sabsur odurdaklemaloed.

<sup>23</sup> ”Emide, bemar Capernaúm-dorgan, ¿nibneggi, nued abingalegoye be binsamala? Suli. Aka be nega-uluba odurdakleged-negse be balimelled-maloed.” Ar Sodoma-neggweburgi we-ibmardakledisurmalad be-neggweburgi-imaklesadyob imaklesana, we-Sodoma-neggwebur amba emi-ibaganse siinad.

<sup>24</sup> Degisoggu, an bemarga sogsun, Bab-Dummad-igar-naboged-ibagangi, bemar bur bule Sodoma-dorganba sabsur odurdaklemaloed.”

*Anse be dagmar, anse be obunnodamar  
(Lucas 10:21-22)*

<sup>25</sup> A-ibagangi, Jesús Bab-Dummadgasunmakdegua, sogded: “Baba, an be-nug odummosun, bedi nibnegsemaidid, we- napneg-e-Dummadbalid. Ar bedi dule-ibmarwismaladgi, dule-ibmar-magar-itomaladgi, an-we-ibmarmar-imaksad aku-ito be imaksad. Dule-baisursunnagwadmargardi bur be osanalosad, adi, amar magar itomalagar.

<sup>26</sup> Eye, Baba, ar deyob be abesad.”

<sup>27</sup> Jesús sogdebalid: “An-Bab anga bela ibmarmar uksad. Dulemar-wargwensaar Bab-Dummad-Machi-mag-daked satemalad, unnila Babbi mag daked. Degi, dulemar Bab-akudakmarbalid, unnila E-Machibi mag Bab-daked. Ar doaga E-Machi na e-Bab-osanalobie, agarbi na osanaloged.

<sup>28</sup> ”Bela bemar-yegus-alamaknaimalad, degi, yegus-itodidimalad, anse be dagmar, ani an bemarga obunnoged ukoed.

<sup>29</sup> An-igar-maid be sumar. Moli-bebe-nikad warbo-ebo-arbaegala, suar-biir e-dukargi edin-damaladyob be angi akamar. Angi be durdakmar, ar an san-dummarba imaksulid, degine, an gwage-eikwaa-daed-duled. Agi na be-burbagala, be obunnoged amioed.

<sup>30</sup> Ar an-igar-maid dutusursulid, nollogwad, degine, an-ibmar-seed ukubalid.”

## 12

*Jesús-sapingan obunnoged-ibagi ibmar-gwag gwachamalad*

*(Marcos 2:23-28; Lucas 6:1-5)*

<sup>1</sup> Deun a-ibagangine, Jesús obunnoged-ibagi orosgi-dakleged-digaled-imbaba nadapgu, e-sapingan ukur itoarmargu, ibmar-digaled-gunnega gwane-gwane imaksamalad.

<sup>2</sup> Fariseo'mar-Jesús'ba-nadapmalad deyob dakarmargu, Jesús'ga sogdemalad:

—Be dakena, be-sapingan obunnoged-ibagi ibmar-ise-imakleged imaknadapmalad.

<sup>3</sup> Jesús, Fariseo'mar-abin sogded:

—¿Ar bemarkede Bab-garda absodisurmarsi, igi David imaksa, deun David, degi, e-sordamar ukumecharmargu?

<sup>4</sup> A-ibagi David Bab-Dummadse-goled-negse dognonigusad, degi, madu-Bab-Dummadga-uklesad guchagusad. Ar David, degi, e-sordamar, a-madu gunnedsulid, ar ade, madu isedid. ¿Ar we-madu unnila dule-irwa-Bab-Dummadse-gormaladbi gunnoye igar-mainsursi? Degisoggu, an-sapingan nabir imaksamarmodo.

<sup>5</sup> Deginbali, ¿ar bemarde Moisés-Igar-Maid absodisurmarsi? Agi igi-dule-irwa-Bab-Dummadse-gormalad, Bab-Dummadse-goled-neggi, obunnoged-ibagi annadimala, ¿ar degite amar igar-noar imakdimala? Suli, igar-noar imakdisurmala.

<sup>6</sup> Inniki an bemarga soged, wegi Bab-Dummadse-goled-negba dule-bur-dummad gudiid.

<sup>7</sup> Ar bemar Bab-Dummad-soged nue mag itomana ibu we obare:  
‘Anga ibmar-ogumakar-ukedba nue wile-emar-daked bur an abeged.’

Oseas 6:6

”Ar we be insamalana, an-sordamar noar-ibmar-imaknaiye be sogosurmalanad.

<sup>8</sup> Degisoggu, be wisgumalagar, ani Dule-Machi, Obunnoged-Iba-e-Dummadid.”

*Jesús dule-argan-burgwaled-nudaksad  
(Marcos 3:1-6; Lucas 6:6-11)*

<sup>9</sup> Jesús, a-nainu-naidgi nadgu, Judío’mar-onmakednegse nonikid.

<sup>10</sup> Agine dule-wargwen-argan-burgwaled sii gusmogad. Jesús’gi gwisgugala, yamo ese egichiarmalad. Ega sogdemalad:

—¿Ar obunnoged-ibagi sunna dule nudaklege?

<sup>11</sup> Jesús abin-sogded:

—¿Ar doa-dule, bemar na sibad-wawaad-wargwen nikadibe, ar bei obunnoged-ibagi yaa-gureged-yaba argwachale, be onossurmala? Be onosmalale.



<sup>12</sup> Ar degite, ¿dule, siband-wawaadba bur-ibmar-nuedsursi? Ar degisoggu, obunnoged-ibagi ibmar-nued-imaked, sunna imaked.

<sup>13</sup> Geb degi, Jesús dule-argan-burgwaledga sogdesunnad:

—Be-argan be onak.

Dule e-argan onakwidgu, yog nugar naded. Ar igi e-argan-baid nuedi, deyob e-argan gunonikid.

<sup>14</sup> Fariseo'mar Judío'mar-onmakedneggi-bukmalad yog ainiar imaksamalad. Geb igar amiarmalad, igi-saele Jesús-oburgwemalodibeye.

### *Bab-Dummad ega arbaega Jesús-susad*

<sup>15</sup> Ar Jesús, Fariseo'mar-e-oburgwebied wisoggu, agi-gudiidgi bangudsunnad. Dulemar-bukidar eba nadeagusmalad. Degine, geb Jesús dulemar-uellemalad bela nudaksad.

<sup>16</sup> Jesús dulemar-nudaksadga igar uksad, mer an-barsogmaloye, an doa guye.

<sup>17</sup> Ar epenne, Bab-Dummad-gayaburba-barsoged-Isaías idu-sogsagusadba guega, deyob gusad. Deun sogsagusgu, Bab-Dummad sogye:

<sup>18</sup> “We an-mai, anga arbaega an susad.

An nue na sabed, an egi nue-weligwar itoged. An-Burba an ega ukoed,

ar dulemar-yar-baid-baidgi-bukmaladga igar-naboged-igargi sunmakoed.

<sup>19</sup> A-dule gwen urwosulid, degi, binnasur golosurbalid.

Ar neg-imbaba binnasur-gordii, e-gaya dule gwen itogosulid.

<sup>20</sup> Ar gammu-maraled gwen hisgosulid,

degine, gwallu-gwillo-binna-gamaid, gwen oginnosulid, igar-napiragwad imakedsegad.

<sup>21</sup> Ar bela-dulemar-yar-baid-baidgi-bukmalad e-bendakega, a-dule-edarbebukwa gumaloed.”

Isaías 42:1-4

*Jesús nia-saila-sogedba niamar-onodiye e-annik sogmalad*

*(Marcos 3:20-30; Lucas 11:14-23; 12:10)*

<sup>22</sup> Geb degi Jesús'se dule-niasaed senonimalad. We-dulede, geg-ataked, degine, geg-sunmakbalid. Jesús a-dule-nudaksad. Degisoggu, nabir-atake, degi, nabir-sunmake gussunnad.

<sup>23</sup> Jesús-dule-nudaksad bela dulemar geger dakdemalad, sogdemarsunnad: “¿Ar we-dulede, inso David-wagwa-yoedse-danikoye-soglesad-sunnad be insae?”

<sup>24</sup> Ar Fariseo'mardi degi-dulemar-sogeitoarmargu, sogdemalad: “Suli, we Mesías'suli. Wede niamar-e-dummad-Beelzebú'ye-nugadba, niamar-onodiid.”

<sup>25</sup> Ar Jesús, Fariseo'mar-binsanaid mag daksoggu, amarga sogded: “Rey-gwensak-neggwebur-dakmaidgi, e-sordamar na dukin-dukin aibinnarmalale, we-neggwebur bergudeled. Degine, ar neggweburdibe, neg-yaginidibe, e-neg-yaginmalad na egi aibinnarmalale, we-neg bergudeled.

<sup>26</sup> Ar nia-saila-Satanás e-sapingan-onodele, ar na dukin egi aibinna-itole. Ar degiile, ¿igi e-neg-na-dakmaid degisadeguosunna? Suli, e-neg bergudele.

27 "Ar ani, nia-saila-Beelzebú-nuggi an niamar-onodiile, ¿be-sapingandi doa-nuggi niamar-onodimarmosunna? Ar be sogmardibe Bab-Dummad ega gargangued ukye. Degisoggu, bemarga oyolenaido, be noar sogdimalad, nia-saila-sogedba an niamar-onodiye.

28 "Ar an Bab-Dummad-Burba-Isligwaledgi niamar-onodiile, we bemarga oyonado, Bab-Dummad-e-negdakmaid bemarse warmaknoniye.

29 "Ar dule, dule-dutusulid-negyaba ibmar-atursaega dule-dutusulid-edingwelergebed. Deyob imaksulile, gege atursaed. Deyobi, an nia-sailagi-nakwisadba niamar-onodiid.

30 "Ar dule anba dasulile, angi gwisgudido. Ar dule anga dulemar-anba-naguega danar urbedisulile, bur we-dule, angi dule-banguega imakdido.

31 "Ar degisoggu, an bemarga sogsun, ar bela dulemar-e-igsawed, degine, dulemar-galagwensuli Bab-Dummadgi-dodoar-sunmaked, Bab-Dummad sunna amarga isgued elioed. Ar dulemar Bab-Dummad-Burbagi galagwensuli dodoar-sunmaksardi, Bab-Dummad gege ega isgued elied.

32 Ar doa-dule galagwensuli Dule-Machigi dodoar sunmaksadibe, Bab-Dummad sunna amarga isgued elioed. Ar dule Bab-Dummad-Burba-Isligwaledgi galagwensuli egi dodoar sunmaksardi, Bab-Dummad ega e-igsawed emi, degi, yoedse, gwen eliosulid.

33 "Ar sapi nuedile, e-durbamaked nuedmodo. Sapi isganale, e-durbamaked isganamodo. Ar ade,

sapi e-sanmakedgi dakleged, sapi-nueddibe, sapi-isganadibe. Dulemar deyobmodo, e-daedgine mag daklenonimogoed.

<sup>34</sup> "iAr bemar naibe-bulegan-e-mimmiganyob gumalad! Ar bemar isgana damarsoggu, degite, ¿ar igi ibmar-nuegangi be sunmakmalosunna? Geg ibmar-nuegangi be sunmakmala. Ar ade, dule gwagegi-binsaedba sunmakdaed.

<sup>35</sup> "Ar dule, dule-nuedile, e-gwage-nuedba ibmar-nued sunmakdo. Ar dule, dule-isganale, e-gwage-isganaba ibmar-isgana sunmakmodo.

<sup>36</sup> Ar andi an bemarga sogdo, ar dule yogasaar galagwensuli sunmaksale, Bab-Dummad-igar-nabogoed-ibagangine, Bab-Dummadga na dukin barsoggwichi gumalodo.

<sup>37</sup> Ar be sunmaksadbali, bega soglegoed, be sab-sur odurdaklegoye. Bega soglegodibe, be sabsur-odurdaklegosurye."

*Ibmar-dakledisurmalad dakbimalad*  
(*Marcos 8:11-13; Lucas 11:29-32*)

<sup>38</sup> Agi geb gwen-gwen Garda-Narmaked-Dulemar, degi, Fariseo'mar, Jesús'ga sogdemalad:

—Odurdaked-saila, anmar-wagab ibmar-wilubgan-dakledisulid anmarga be imake, adi, anmar mag dakega, be Bab-Dummad-nuggi-sunmaked napiragwadi.

<sup>39</sup> Jesús, abin-sogded:

—Be, dule-isganamalad. Be, negsichigi-galagwensuli-yoledimaladid. Be, Bab-Dummadgi nodimaladid. Emide, be ibmar-wilubgan-dakledisulid bega imaked be abemalad. Ar an bega sogmar, wilubgan bega oyolegosulid.

Unnila bemarga-oyolegoedi, Bab-Dummad-gaya-barsoged-Jonás'ye-nugad-gusadyob bega oyolegoed.

<sup>40</sup> "Ar igi Jonás ua-dummad-saban-yaba ibapaa ibginedba, degi, mutikidba megisa, ayobi, ani Dule-Machi, napa-urba ibapaa ibginedba, degi, mutikidba megmogoed.

<sup>41</sup> Bab-Dummad-igar-nabogoed-ibagangi, Nínive'ginmalad, bemar-emi-dula-gudidimaladgi gwisgudamalogua, bemar-sabsur-odurdakye sogdamaloed. Ar ade, Jonás Bab-Dummad-igargi sunmaksagu, Nínive-dorgan na e-isguedga bukib-binsas gusmalad, e-daed gwagsa gusmalad. Ar emigindi, Jonás'ba bur bule dule-dummad wegi bemar-abargi gudiinad. Ar degite, bemar be-isguedga na be bukib binsasurmalad, be-daed na be ogwasurmalad.

<sup>42</sup> "Rey-bundor-dad-nakwed-argan-nuedsikid-yar-dakmaid Bab-Dummad-igar-nabogoed-ibagangi bemar-emi-dula-gudidimaladgi gwisgudagogu, bemar-sabsur-odurdakye sogdagoed. Ar ade, we-omegwa dad-Salomón-dule-binsaed-ibed-nikad-itogega bela-bela-dikasur danigusad. Ar emigindi, Salomón'ba bur bule dule-binsaed-nikadi, wegi bemar-abargi gudiinad. Ar degite, bemar an-itobisurmalad."

*Burba-isgana-nosad, gannarse nonidaed  
(Lucas 11:24-26)*

<sup>43</sup> Ar Jesús sogdebalid: "Ar niaburba dulegi nodele, neg-dinnaganaba obunnoged-neg amidii daed. Ar neg-obunnoged amisursoggu,

<sup>44</sup> sogdasunnoed, ‘An-neg-an-mete-alidse gannar an dognaoye.’ Ar na e-negse modapogu, dakdapoed, neg ollobi sii, nue durwiar sii, degi, nue nudakar sibali.

<sup>45</sup> ”Geb degi, niaburba deyob dak-sale, e-sordamar-walagugle (7) eba-bur bulegandamalad-sedagega gannar naoed. Niaburbamar a-negse dognonimalogu, na e-negga imakdemaloed. Geb we-dule epenne-e-daedba aka bur bule isgudsunnoed. Ayobi bemar-emi-dula-gudidimalad-isganamalad gumarmogoed.”

*Jesús-e-nan, degi, Jesús-e-urbamar, Jesús-aminonimalad*  
(*Marcos 3:31-35; Lucas 8:19-21*)

<sup>46</sup> Ar amba Jesús dulemarga sunmaksiidgine, Jesús-e-nan, degine, Jesús-e-urbamar Jesús’bosunmakmalaga neg-magaba Jesús-edarbebukwagusmalad.

<sup>47</sup> Geb dule-wargwen Jesús’ga sognonikid:

—Emi be-nan, be-urbamar, neg-magaba bedarbebukmalad, bebo sunmakbimalad.

<sup>48</sup> Jesús, dule-deyob-ega-sogedga abin-sogded:

—¿Ar doa an-nan-sunna? ¿Doamar an-urbamar-sunna?

<sup>49</sup> Jesús na e-argan e-sapingansik-oyodgua, sogded:

—Wemar an-nanad, wemar an-urbamalad.

<sup>50</sup> Ar doa-dule an-Bab-nibneggi-maidba, ibmar imakele, ar a, an-nando, a, an-bundo, a, an-urbamardo.

# 13

## 3f. Jesús, Bab-negsemaidgi burbar sunmaksad

(13:1-58)

*Jesús, ibmar-gwag-diglegedgi burbar sunmaksad*

(*Marcos 4:1-9; Lucas 8:4-8*)

<sup>1</sup> A-ibagi Jesús negyagi-sii nodgua, mata-dummad-gakase nadegusad. Geb agi sigdapid.

<sup>2</sup> Geb dulemar-bukidar ese nonimalad. Jesús dulemar-odurdakega, urgi-nakwis imaksasunnad. Geb uryagi sigisad. Dulemardi, Jesús-itogegala, bela mata-dummad-gakagi ambikusmalad.

<sup>3</sup> Jesús bukidar ibmar-burbarmaladgi akar-akar dulemarga sunmaksii gusad, dulemar-odurdaksii gusad.

Jesús weyob sogde gusad: “Ibagwengine, dule-wargwen-ibmar-gwag-digedi, ibmar-gwag dignaded.

<sup>4</sup> Ibmar-gwag-dignaigusgu, abala igargi babatidapid. Sikwimar nonigua, ibmar-gwag-igargi-babatismalad manonimalad.

<sup>5</sup> ”Ibmar-gwag abala napa-asginegwadgi akwa-yaisulidgi babatismalad. Agi ibmar-gwag gwae-gwae ainialid, ar ade, napa asginegwad.

<sup>6</sup> Dad gaargu, ibmar-gwag gummakded, ar ade, e-maligan asginesoggu, dinguded.

<sup>7</sup> ”Ibmar-gwag abala iko-abargi babatisad. Ibmar-gwag dungudgu, ikomar ichosad, degisoggu, gwen sanmaksasursunnad.

<sup>8</sup> ”Ar ibmar-gwag-napa-nuedgi-babatismaladdi, nue-sanmaksamalad:

Ibmar-gwag-abala, wilubba sanmaksamalah.  
 Abala, nued-mergu sanmaksamalah.  
 Abala, bela-belagwad sanmaksamalah.”

<sup>9</sup> Geb Jesús sogdebalid: “An-bemarga-ibmar-soged bema mag nue-itobiele, nue-itomar.”

*Ibga Jesús burbar sunmakdae*  
*(Marcos 4:10-12; Lucas 8:9-10)*

<sup>10</sup> Geb degi, Jesús-e-sapingan Jesús’s nonimargu, ega sogdemalah:

—¿Ar ibga be dulemarga burbar ibmar sogdae?

<sup>11</sup> Jesús abin-sogded:

—Ar bemargardi, Bab-Dummad-e-negdakmaid igar-burbar-mamaid osanalogoye maid. Dule-baigangardi, ega osanalegosulid.

<sup>12</sup> Ar dule-ibmar-nikadga, amba ega ibmar-uklebalodo, adi, bur bule gatik ibmar-nikuegar. Ar dule-ibmar-suliddina, ar bipi-wis-ibmar-nikadi, aka bur e-annik sulegoed. We sogleged, bemaardi bur bule ibmar-mag-ito guoye.

<sup>13</sup> A-ular, we-dulemarga burbar an sunmak-daed:

‘Ar amba dakmar-inigwele, aku dakmalah.

Ar itomar-inigwele, aku itomalah.’

<sup>14</sup> ”Ar degisoggu, igi epenne Bab-Dummad-gayaburba-barsoged-Isaías sogsagusa, ar deyob gunonisundo, deun sogsagusgu:

‘Ar na e-uayagwar itomalo-inigwele, aku itomaloed.

Ar na e-ibyangwar dakmalo-inigwele, amba aku dakmaloed.

<sup>15</sup> Ar we-dulemar an-itobisurmalah,  
 ar na e-uayagi nue aku-itomalah,  
 ar e-ibya na murdik imaksamalah.



Ar adi, mer na e-ibyagi mag dakmalagar,  
 degi, mer na e-uayagi mag itomalagar,  
 deginbali, mer e-ulubgi mag itomalagar.

Ar degiile, Bab-Dummad sik namalo-itole,  
 ar degiile, an nudak dakledagoed.'

Isaías 6:9-10

<sup>16</sup> "Ar bemargindi, nued binsalesmalad, ar bema-  
 r-ibyadi, magar ibmar daked. Bema-  
 uayadi, magar neg-itobalid.

<sup>17</sup> Ar napira an bemarga soged, buki-  
 dar Bab-Dummad-gayaburba-barsogmalad,  
 degi, buki dar dule-innikidamalad, emi-bema-  
 r-ibmar-daknanaid aisaar dakbigusmalanad,  
 emide, gwen daksasurgusmalad. Degi,  
 emi-bema-r-ibmar-itoged, aisaar itobi-  
 gusmalanad, emide, gwen itossurgusmalad."

*Jesús, ibmar-gwag-digedgi-burbar-sunmaksad  
 odulosad*

*(Marcos 4:13-20; Lucas 8:11-15)*

<sup>18</sup> Jesús sogdebalid: "Emisgi, ibmar-gwag-  
 digedgi an-bemarga-sunmaksad-e-burba be nue  
 itomarsun:

<sup>19</sup> Ar dule-wargwen Bab-Dummad-gayaburba-  
 itosad aku-itodibe, nia-saila nonikogua, a-dule-  
 gwagegi gayaburba-nued-diglesad ei ungenon-  
 ikoed. Ar we sogleged, we ibmar-gwag igargi  
 diglesadye.

<sup>20</sup> "Ar ibmar-gwag-akwa-imbaba-  
 babatismaladdi, adi, Bab-Dummad-gayaburba  
 itosmargu, nue weligwar abingasmalanad.

21 Ar wemar unnila asginbi Bab-abingasmarsoggu, ibmar-gwag-digaled-emaligan asgine digaleyobid. Degisoggu, Bab-Dummad-gayaburba-ular wilearmargu, degine, dulemar sabsur e-imakarmargu, Bab-Dummadgi bangudmalad.

22 "Ar ikomar-abargi-batismaladdi, we-dulemar Bab-Dummad-gayaburba abingasmalando, ar we-napneggi ibmarbina bukib-binsaedbali, degi, maniginbi bur binsamarsoggu, binsaed-galedmalad, abali, Bab-Dummad-gayaburba-e-gwagegi-naid iedmarsunnad. Degisoggu, amar ibmar-gwag gwen sanmaksasulidyob gunonisunnad.

23 "Ar ibmar-gwag-napa-nuedgi-diglesmaladdi, we-dulemardi Bab-Dummad-gayaburba-itosmargu, magasar nue itosmalad. Degisoggu, amar ibmar-gwag-nue-sanmaksamaladyob gunonisunnad:

Amar-abala, wilubba sanmaksamalad.

Amar-abala, nued-mergu sanmaksamalad.

Amar-abala, bela-belagwad sanmaksamalad."

### *Jesús, burbar gagan-isganagi sunmaksad*

24 Jesús burbar dulemarga sunmakdebalid. Sogdebalid: "Bab-Dummad-e-negdakmaid-igar weyob gued: Dule-wargwen na e-nainugi ibmar-gwag-nued digsad.

25 Ar dulemar gabidmargu, e-isdarad orosgiid-digaled-abargi gagan-isgana dignonimogad. Geb degine, naded.

26 "Ibmar-gwag nue aramaksagu, sanmakargu, gagan-iscana abargi daklearmogad.

27 "Ar e-maigan nainu-ibedse nonimalad, ega sognonimalad: 'Dummad, ¿ar be-nainugi ibmar-gwag-nued be digsasursi? ¿Ar degite, bia we-gagan-iscanamarde danisunna?'

28 Nainu-ibed, abin-sogded: 'An-isdarad we-gagan-iscana digsad.' E-maigan, abin-sogdemarmogad: '¿We-gagan-iscana ungenabi be anmar-abege?'

29 "Nainu-ibed, abin-sogded: 'Suli, mer be ungenamalo. Ar abakalegi gagan-iscana-bemar-ungenaidgi be orosgi-dakleged ungiarbalile.

30 Bur ebobela, ibmar-gwag-weleged-ibaganse itoba na dungumamaimaloed. A-ibangani ibmar-gwag-weemaladga an sogoed, bina gagan-iscana-inse be weemargwerye, ogumakega danar-danar edinmarye. Orosgi-daklegeddi, be an-ibmar-gwag-urbilegedse urbanamaloye.' "

*Jesús, burbar mostaza-e-gwaggi sunmaksad  
(Marcos 4:30-32; Lucas 13:18-19)*

31 Jesús, baid-igar-burbar-sunmaklegedgi sunmakdebalid. Sogdebalid: "Bab-Dummad-e-negdakmaid-igar, dule-wargwen e-nainugi mostaza-e-gwag-digsayob gued.

32 Ar mostaza-gwag ibmar-gwagba bur-bipi-inigwele, ar dunguderdi, ibmar-dubaled-masgagued-birgi obitedaed. Degisoggu, ar sapiga gunonikogu, sikwimar-niba-gukudimalad, sunna e-anangani gabmalad."

*Jesús, burbar madubur-inagi sunmaksad  
(Lucas 13:20-21)*

<sup>33</sup> Jesús baid-igar-burbar-sunmaklegedgi sunmakdebalid. Sogdebalid: “Bab-Dummad-e-negdakmaid-igar weyob gued: Ar igi ome-wargwen ilapaa-madubur-wilubsaedgi, madubur-ina obatisa, geb degi madubur-ina binna-binna bela omuedse madubur-ganonidaed.”

*Ibiga Jesús burbar-sunmakleged-igargi sunmakdedae*  
(*Marcos 4:33-34*)

<sup>34</sup> Ar bela Jesús burbar-sunmaklegedgi dulemarga sunmakdedaed, burbar-sunmaksuli gwen gussulid.

<sup>35</sup> Ar Bab-Dummad-gayaburba-barsoged sogsgusadba guegala, deyob Jesús sunmakdii gusad, deun sogsgusgu:

“An sunmakdogu, burbar an sunmakoed,  
negasaila-akar ibmar-dukuar-mamaid an  
odulogea, burbar an sunmakoed.”

Salmo 78:2

*Jesús, burbar-gagan-iskanagi-sunmaksad osanalosad*

<sup>36</sup> Geb degi dulemar Jesús’gi-bangudgua, Jesús negyaba dogdegusad. E-sapingan Jesús’sé walikgunonimargu, ega sogdemalad:

—Gagan-iskanagi be burbar-anmarga-sunmaksad, anmarga be oduloge, ar wede ibi obare.

<sup>37</sup> Jesús abin-sogded:

—Dule-ibmar-gwag-nued-digedi, we Dule-Machid.

<sup>38</sup> Nainu-obaredi, we-napneg gued.

Ibmar-gwag-nuedi, we Bab-Dummad-e-negdakmaid-e-mimmigan gued.

Gagan-isganadi, we nia-saila-e-mimmigan gued.

<sup>39</sup> Ar dule-isdarad-gagan-isgana-digsadi, nia-saila gued.

Ibmar-gwag-weleged-ibagan, we- napneg-berguod-ibaganad.

Dulemar-ibmar-gwag-weemaladi, baliwiturmar gued.

<sup>40</sup> ”Ar igi gagan-isgana unnulege, degi, ogumaklege, deyobi, we-napneg-berguedse guod.

<sup>41</sup> Ar Dule-Machi na e-baliwiturmar-barmidagoed, e-negdakmaidgi dulemar-ibmar-ichodimalad, degi, ibmar-isgana-imakdimalad, soo-sailase-ogumaknaega, weenonikoed.

<sup>42</sup> Agi amar bobukwa, degi, beedse-wilebukwadba nugar-ogorbukwa, gumaloed.

<sup>43</sup> Geb degi, dule-ibmar-inniki-imakmaladdi, e-Bab-negdakmaidgi dad-ibeler-gaeyob mag dak-lenonikoed. Ar dulemar magar-itobiele, an-ibmar-soged nue itomar.”

*Jesús, or-nuegan-gargerbad-odukuar-siidgi sunmaksad*

<sup>44</sup> Jesús sogdebalid: “Aginbali, Bab-Dummad-e-negdakmaiddi, or-nuegan nainugi odukuar-bukwadyob gued. Dule-wargwen a-or-nuegan amisgu, gannar odokusad. Or-amisadba, weligwar-ito nadegusad. Geb a-nainu-bakega, bela na e-ibmar-nikadi uksad, adi, a-or-nuegan na egadga imakegar.”

*Jesús, burbar dimmurgiid-e-akwa-yeerdaklegedgi sunmaksad*

<sup>45</sup> Jesús sogdebalid: “Bab-Dummad-e-negdakmaid, dule-wargwen-ibmar-baked dimmurgiid-e-akwa-yeerdakleged-amidiidyob gued.

<sup>46</sup> We-dule, dimmurgiid-e-akwa-yeerdakleged-amisgua, nadegusad. Na ibmar-nikadi, bela ukса gusad, agi dimmurgiid-e-akwa-yeerdakleged baknonikid.”

*Jesús, burbar sakigi sunmaksad*

<sup>47</sup> Jesús sogdebalid: “Amba deyobbardo, Bab-Dummad-e-negdakmaid sakiyob gubalid. Saki demargi-miledogua, bela galagwensuli uamar egi galeded.

<sup>48</sup> Saki ua-ena-gusale, demar-gakase saki-sedmaload. Dulemar ambikudmalogu, uamar-nueganbi garbagi urbedamaloed. Uamar-isganadi, miledoad.

<sup>49</sup> ”Ar debayobi, we-napneg-berguedse guoad. Baliwiturmar ainidogua, dule-inniki-ibmar-imakmalad, dule-isganamargi bachik urbenonikoed.

<sup>50</sup> Geb soo-sailase, dule-isganamar-midmaload. Agi dule-isganamar bobukwa, degi, beedse-wilebukwadba, nugar-ogorbukwa gumaloed.”

*Jesús, ibmar-binidgi, degi, ibmar-sergangi sunmaksad*

<sup>51</sup> Jesús geb e-sapinganga sogded:

—¿Ar bela Bab-Dummad-e-negdakmaidgi an-bega-sunmaksamalad mag be itomala?

Jesús-abin, sogdemalad:

—Eye, Dummad. Anmar bela mag itomalad.

<sup>52</sup> Jesús sogdebalid:

—Ar Garda-Narmaked-Dule-wargwen bela Bab-Dummad-e-negdakmaid-igar nue-wisgunonikile, bab-neguya-sediid-gwensakyob gued. Igi we-bab na e-ulu-ibmar-sabogedgi ibmar-binigan, degi, ibmar-sergan, onodae, deyobi, we-dule-nue-igar-wisid, baigan-odurdakega, ibmar-epenne-durdaksad, degine, ibmar-bini-durdaksad, ebumogad.

*Jesús, Nazaret'gi gudii gusad*  
(*Marcos 6:1-6; Lucas 4:16-30*)

<sup>53</sup> Jesús igar-burbamaladgi-sunmaksiiid-bergusad-sorba, nade gusad.

<sup>54</sup> Jesús e-dungusad-neggweburse nonigu, Judío'mar-onmakedneggi emar-odurdaksigisad. Bukidar agi geger dakdemalad, sogdemalad:

“¿Ar wede, bia binsaed-nuegan amidae? ¿Ar ibiga nabir wede, ibmar-dakledisurmamad imak-dae?”

<sup>55</sup> ¿Ar wede, urgogi-arbaed-dule-machisursi? ¿Ar e-nande, María'ye-nugsursi? ¿Santiago'de, José'de, Simón'de, degine, Judas'de, e-urbamarsursi?

<sup>56</sup> ¿Ar bela-e-bunmarde, anmar-abargi gudisursi? Ar degite, wede, ¿bia we ibmarmar durdak-sasunna?”

<sup>57</sup> Degisoggu, a-ular, dulemar geger Jesús-dakdemalad, Jesús'gi uludmarsunnad. Ar Jesús'di amarga sogded:

“Bela-neggwebur-baigangi Bab-Dummad-gayaburba-barsogmaladbina nue sogdamalad. Ar e-neggweburginmaladbi, degi, e-neg-yaurginmaladbi baisur dakdamalad. Agala, bemar an-abingassurmarmogad.”

58 Degisoggu, a-ulale, Jesús, ibmar-dakledisurmalad Nazaret'gi dogdar imaksasulid, ar bukidar egi benmalad.

## 14

### **3g. Diigi-dule-oged-Juan'ye-nugad, burgwisad**

*(14:1-12)*

*(Marcos 6:14-29; Lucas 9:7-9)*

<sup>1</sup> Deun, a-ibagangi, Rey-Herodes itoalid, bela dulemar Jesús'gi sunmakedbimala.

<sup>2</sup> Agi Herodes e-maiganga sogded: “We-dule-gudiid, we Diigi-dule-oged-Juan'ye-nugadid. Ar wede, gannar durgus gudiid. A-ulale, nabir ibmar-dakledisulid imaked.”

<sup>3</sup> Ar ade, Herodes, Herodías-ular Diigi-dule-oged-Juan'ye-nugad gasa gusad. Esgoro-dubgi-edicha, esgaryagi metegusad. Herodías'di, Felipe-omenad. Geb Herodes e-urba-Felipe'gi ome-egwacha gusad.

<sup>4</sup> Ar ade, Juan Herodes'ga sogsa gusad: “We-ome be nikuedsulinye.”

<sup>5</sup> Deun, Herodes Juan-oburgwebien-inigwele, dulemar-dobedba geg oburgwe gusad. Ar ade, dulemar Juan'gi binsamalad, we Bab-Dummad-gayaburba-barsogedye.

<sup>6</sup> Deun, Herodes-gwalulesad-ibagi iba-ononanaigua, Herodías-e-sisgwa emar-abargi-dodosgua, Herodes, nue-yeer daksagusad.

<sup>7</sup> Deyob-daksadbali, Herodes bunagwaga sogdegusad: “Napira ise-sogar an bega soged, ar ibu be anse egishie, an bega ukoed.”



8 Geb a-bunagwade, e-nan-ega-sogedba Herodes'ga sogded:

—Diigi-dule-oged-Juan'ye-nugad-e-nono be bategi anga udaye.

9 Rey-Herodes deyob bunagwa-ega-sogeditosgua, nue-bukib-ito naded, ar bato bunagwaga sogsasoggu, “Napira an bega sogye, ar ibu be anse egisbiele, an bega ukoye,” degine, dulemar-eba-mese-naba-siid e-itosmarmosoggu, Herodes e-sordamarga sogdesunnad: “Bunagwaga Diigi-dule-oged-Juan'ye-nugad-e-nono ukmarye.”

10 Degisoggu, Herodes, Diigi-dule-oged-Juan-esgaryagi-mellesiid-e-dukar-egwannega igar-uksasunnad.

11 Sordamar Diigi-dule-oged-Juan'ye-nugad-e-nono bategi senonimargu, bunagwaga uknonimarsunnad, geb degi bunagwa e-nanga uksamosunnad.

12 Geb degi, Juan-sapingan, Juan-e-san sunonimalad, geb neg-uangi digsamarsunnad. Degine, Juan-e-sapingan Jesús'se-nadmargu, ega sogdapmalad, igi Juan burgwisa.

## 4. JESÚS, NEGGWEBUR-BAID-BAIDGI ARBAED IMAKSAD

(14:13-20:34)

### 4a. Jesús ibmar-dakdisulid baigan imaksad

(14:13-17:27)

*Jesús, dule-miliatar (5,000) masgi oguchad  
(Marcos 6:30-44; Lucas 9:10-17; Juan 6:1-15)*

13 Jesús Diigi-dule-oged-Juan-burgwisad-wisgusgu, dulemargi banguded, bachikii negadulesulidgansik urgi nadegusad. Ar dulemar Jesús-naded-wisgusmargu, e-neggweburmar-akar nagab ese nadegusmalad.

14 Jesús urgi aidesgu, dulemar-bukidar e-idu bukwa dakalid. Nue-wile dulemar-dakded, degine, dulemar-uellemalad bela nudaksad.

15 Bato neg-sedodgu, e-sapingana Jesús'se nonimalad, ega sogdemalad:

—Anmar negadulesulidgangi bukwamalad, degine, bato neg-sedodbalid. Degisoggu, dulemar be barmid, adi, neggweburmarse namalagar, agi masgunned na bakmaloed.

16 Jesús e-sapingan-abin sogded:

—Wemar naed abesulid. Bemar ega masgunned ukmala.

17 E-sapingan, abin-sogdemalad:

—Anmar wegi mas sated. Unnila madu gwaatar, degi, ua ukabo nikmalad. Degisoggu, geg anmar masgi ogunned.

18 Jesús e-sapinganga sogded:

—Be anga madu sedamar, ua be anga sedabar.

19 Geb degi, Jesús gagan-birgi dulemar-oambikuega imaksad. Jesús madu-gwaataled, degi, ua-ukabogwad-susgua, niba atakdegu, Bab-Dummadga dog-nuedye sogsad. Geb degi, Jesús madu, degi, ua bisge-bisge imaksagu, e-sapinganga ukded. Degi, e-sapingan dulemarga ukdemosunnad.

20 Degine, bela-dulemar-gudidimalad nue-immeles mas guchamalad. Jesús-sapingan mas-obichad-wesmargu, garba-gwaambe-gakabomergu (12) enosmalad.

21 Dulemar-mas-guchamalad, unnila macherganbi miliatarsaar (5,000) mergued. Omegandi, degi, mimmigandi, obarilesulid.

*Jesús demar-birgi nanasad  
(Marcos 6:45-52; Juan 6:16-21)*

22 Geb degi, Jesús e-sapingan-urugi-gwae-nakwega imaksad, adi, e-iduar mata-dummad-gaka-obakar namalagar. Edi, dulemar-napidakega besgweled.

23 Jesús bela dulemar-barmisgu, Bab-Dummadse golega yar-birse walagwen-nakwisad. Neg-mutikgudgu, walagwen Bab-Dummadse gorsigisad.

24 Ur Jesús-sapingan-egi-nadapiddi mataba demar-dummadba omukulenadapid, ar ade, burwa asabin gormaid.

25 Bolegoedba, Jesús e-sapinganse mata-dummad-birgi ganna-ganna nadegusad.

26 Jesús-sapingan, mata-dummad-birgi dule-dani-dakarmargua, bela-bela gwakidmalad, dobedba binnasur gotemalad. Sogdemalad:

—¡Girmar anmargi dani!

27 Degisoggu, a-ular, Jesús e-sapinganse yog gotebin imaksad. Ega sogded:

—¡Mer be dobgumar! ¡Be gandik imakmar! ¡Ani an gudii!

28 Geb degi, Pedro, abin-sogded:

—Dummad, ar beele, an bese mata-dummad-birgi ganna-ganna-daged be an-imakdo.

<sup>29</sup> Jesús Pedro'ga sogded:

—Be dagdena.

Pedro urgi-siid mata-dummadgi-aidesgu, mata-birgi ganna-ganna Jesús'se nadegusad.

<sup>30</sup> Pedro burwa-binnasur-gormai dakdegu, dobe-ito naded. Geb degi, matagi dogdegu, binnasur goted, sogded:

—¡Dummad! ¡An-bendake!

<sup>31</sup> Geb degi, Jesús argangi Pedro-gasgu, Pedro'ga sogded:

—Ibiyob be an-bengue. ¿Ar ibiga be an-bengusa?

<sup>32</sup> Ar Jesús, Pedro-ebo urgi nakwismargu, burwa bogidik naded.

<sup>33</sup> Degine, urgi-bukwamaladi bela deyob daksamargu, Jesús-nug odummodmarsunnad. Jesús-abin dulluu nono-imaksamalad. Geb Jesús'ga sogdemalad:

—Ar nue be Bab-Dummad-Machi-sunnadid.

*Jesús, Genesaret-neggweburgi uellemalad nudaksad*

*(Marcos 6:53-56)*

<sup>34</sup> Geb degi, Jesús e-sapinganmala mata-dummad obaksamargua, Genesaret-neggweburse nonimarsunnad.

<sup>35</sup> Dulemar-a-neggweburginmalad Jesús-gudiid mag daksamargu, neggwebur-dikarbarmaladse gayaburba-mimidmalad. Geb bela dulemar-uellemalad Jesús'se senonimalad.

<sup>36</sup> Dulemar Jesús'gi wilenaigus damalad. Ega sognai damalad: “Unnila be mordukubi wis

ebuged be anmar-imakye.” Ar bela e-morduku-  
ebusmalale, bela nugusdamalad.

## 15

*Ibi bur dulemar-gwage ichodae*  
*(Marcos 7:1-23)*

<sup>1</sup> Geb degi, Garda-Narmaked-Dulemar,  
Fariseo'mar-Jerusalén'gi-danimalad Jesús'se  
nonimargu, Jesús'ga sogdemalad:

<sup>2</sup> —¿Ibiga be-sapingan dadgan-Igar-Maidgi-wede  
yoledimala? ¿Ar ibiga be-sapingan masgunned-  
iduar argan enukdasurmala?

<sup>3</sup> Jesús abin-sogded:

—¿Ar ibiga bemarmode dadgan-igar-maidba-  
daed-ular, Bab-Dummad-Igar-Maidgi yoledimar-  
mosunna?

<sup>4</sup> Ar Bab-Dummad sogsad:

‘Be-bab-nug-odummodii,  
degi, be-nan-nug-odummodii be nanamalo.’

Éxodo 20:12; Deuteronomio 5:16

Degine:

‘Dule, e-bab-ukabsasale, e-nan-ukabsasale,  
we-dule, oburgwilegoed.’

Éxodo 21:17; Levítico 20:9

<sup>5</sup> ”Ar emigindi, bemardi soged: ‘Ar doa e-babga  
sogdibe, e-nanga sogdibe: Geg an be-bendakye,  
ar bela-an-ibmar-nikadi, bato an Bab-Dummadga  
uksaye.

<sup>6</sup> Degisoggu, a-dule, e-bab-bar-bendaksulir,  
degi, e-nan-bar-bendaksulir, gwen akarsurye.’  
Ar weyob be be-dadgan-igar-maidba-daed-ular,  
Bab-Dummad-Igar-Maidgi be yoledimardo.

<sup>7</sup> ¡Bemar wagar-darbodamalad! Ar nabir Bab-Dummad-gayaburba-barsoged-Isaías, epenne bemarnik sogsagusad, deun Bab-Dummad-sogye sogsagusgu:

<sup>8</sup> ‘We-dulemar unnila asginbi an-nug odummo-malad,  
ar e-gwage-ulubgindi angi gwen binsasur-malad.

<sup>9</sup> Ar binsa asginbi an-nug odummodimalad.  
E-igar-maid odurdakedi, dulemar-igar-mesisadba bur odurdakmalad.’ ”

Isaías 29:13

<sup>10</sup> Degi, Jesús dulemar-bukidar-bukwadse gotegu, amarga sogded:

—Nue bela be an-itomalo:

<sup>11</sup> Ar masgunned dule-oichosulid. Dule galagwensuli-sunmakerdi, adi, dule-oichodo.

<sup>12</sup> Geb degi, e-sapingan Jesús’s e walik-gunonigua, ega sogdemalad:

—¿Be wisi, emi Fariseo’mar weyob be-ibmar-soge-itoarmargu, sae-itodmalad?

<sup>13</sup> Jesús, abin-sogded:

—Ar an-Bab-nibneggi-maid sapi-digsasulidi, e-sailanagase a-sapi ungoed.

<sup>14</sup> Mer be Fariseo’mar bai-dake. Ar ibyasuliyob gudidimalad, amar aku-atakmalad-iduedmalad. Ar dule-ibyasulid, dule-ibyasulid-idumaile, ebo-bela neg-gullu-dummadgi argwanmaloed.

<sup>15</sup> Pedro, Jesús-abin sogded:

—We, be ibmar-burbar-soged, masgunned-dule-oichosulid, wede, ¿ibu obare? Anmarga be oduloge.

<sup>16</sup> Jesús abin-sogded:

—¿Ar bemarmode amba aku-itomarmoga?

<sup>17</sup> ¿Ar bemar aku-itoge, bela masgunned, un-  
nila sabanse uboddaed, degi, geb gannar miledda-  
balid?

<sup>18</sup> Ar dule-galagwensuli-sunmakeddi, e-  
gwagegi deyob-binsaed noardaed. Degisoggu,  
deyob-sunmakeddi, dule-oichosundo.

<sup>19</sup> Ar dule-gwagegi binsaed-isganamar  
ainiardaed: Iblomalad, ome-dikarba  
yolemalad, degi, sui-dikarba yolemalad, na  
abirgunagwarsuli negsichigi nanamalad, ibmar-  
atursamalad, gakansaar aimar-barsoged, isdar-  
dulemargi-sunmaked.

<sup>20</sup> Ar we-ibmarmardi, dule-oichomaladdo.  
Dule argan-enuksuli-mas-gunneddi, dule-  
oichogedsulid.

*Ome-Cananea'gined Jesús'gi bengussulid*  
*(Marcos 7:24-30)*

<sup>21</sup> Jesús Genesaret'gi-gudiid, Tiro-yarse, degi,  
Sidón-yarse nade gusad.

<sup>22</sup> Agi ome-wargwen, Judío'sulid,  
Cananea'gined, a-yalaganba-daniki, binnasur  
Jesús'se gordani gusad. Weyob ese gordani gusad:

—¡Dummad, David-Wagwa, wile be an-dake! An-  
bunagwa sabsur niasamaid.

<sup>23</sup> Ar Jesús'di gwen abin-imaksasulid. Geb degi,  
Jesús-sapingan Jesús'se nonimargu, egi wilenaigus-  
malad, ega sogdemalad:

—We-omega be soqe, be naye. Ar anmar-sorba  
binnasur gordanikid.

<sup>24</sup> Jesús abin-sogded:

—An barmilealidi, dulemar-baiganse an barmilearsulid. Unnila Israel-dulemar-sibad-wawaadyob-yoggus-gudimaladse an barmilealid.

<sup>25</sup> Degi, geb ome Jesús-abin yokorgi signonikid, ega sognonikid:

—¡Dummad, be an-bendake, anga an-bunolo be nudake!

<sup>26</sup> Jesús abin-sogded:

—Be Judío'sursoggu, an be-bendakele, mimmigan-mas achuga-uknaiyob an imako-itole. Ar mimmigan-mas achuga be ukoye igar maisulid.

<sup>27</sup> Ome, Jesús-abin sogded:

—Dummad, nabir be sogendo. Ar degi-inigwele, achumarse-bakar, sunna mimmigan-mas mese-urba-batemamaid gunmogad.

<sup>28</sup> Geb Jesús, ome-abin sogded:

—Ome, ibibayobi be an-bensuli. An bega be-bunolo an nudakoed. Degisoggu, deyob be ibmar-egisnaid gusun.

Ar a-wachigi e-bunolo yog nuguar naded.

### *Jesús, dulemar-bukidar-nudaksad*

<sup>29</sup> Jesús Tiro-yargi, degi, Sidón-yargi, bangudgua, Galilea-mata-dummad-naidse nonikid. Geb degi, Jesús yargi-nakwisgu, agi sigidapid.

<sup>30</sup> Agi dulemar-bukidar Jesús'se nonimalad, ese senonimalad:

Dulemar-muya-muya-nanamalad,  
 dulemar-ibyasurmalad,  
 dulemar-geg-sunmakmalad,  
 swida-burgwarmalad,  
 degi, bukidar dulemar-galagwensuli-  
 uellemalad.



Bela wemala, Jesús-nagaba mesnoni-malad. Jesús amar bela nudaksagusad.

<sup>31</sup> Degisoggu, bela dulemar-bukwamalad dakdegu,

Jesús, dulemar-geg-sunmakmalad sunmak imaksa,  
dulema-swida-burgwarmalad nudaksa,  
dulema-muya-muya-nanamalad nabir-nanae imaksa,  
dulema-ibyasurmalad mag-dake imaksa,  
dulema, geger dakdemalad.

Degisoggu, Israel-Bab-Dummad-nug odummodmarsunnad.

*Jesús, dule-milibake (4,000) masgi oguchad  
(Marcos 8:1-10)*

<sup>32</sup> Degi, Jesús e-sapinganse gochagua, amarga sogded:

—We-dulema an nue-wile daked. Ar ibapaagus anmarba bipirmakdanimad, masgunned sate gudimalad. Degisoggu, an mas-gunsuli dulema-barmidele, abakalegi igarba negoearmalale.

<sup>33</sup> Geb degi, e-sapingan abin-sogdemalad:

—We-dulema-ichesulid-masgi-ogunnegala, ¿ar wede bia anmar neg-dulesulidgangi mas-ichesar animalosunna?

<sup>34</sup> Jesús e-sapinganga sogdebalid:

—¿Gwabigwa be madu nikmarsunna?

E-sapingan abin-sogded:

—Wis anmar madu-gwagugle (7) nikmalad, wis ua-burwi ichesaar nikbalid.

<sup>35</sup> Jesús dulema-bukidarmalad napagi sigega imaksad.

<sup>36</sup> Jesús madu-gwagugled-susgua, degi, uamar-susbargua, Bab-Dummadga dog-nuedye sogded. A-sorba, madu, degi, ua, bisge-bisge imaksagu, e-sapinganga ukded. Geb degi, e-sapingan dulemarga mimidmogad.

<sup>37</sup> Bela dulemar madu-guchamargu, degi, uaguchamargu, nue-immelesmalad. Jesús-sapingan mas-gwabgusad bela wesmargu, garba-gwagugle (7) enosmalad.

<sup>38</sup> Bela madu-guchamalad, degi, uaguchamalad, macherganbi milibake-mergu (4,000) daklealid. Omegan, degi, mimmigandi gwen obarilesulid.

<sup>39</sup> Degi, Jesús dulemar-barmisgu, urgi nakwis-sunnad. Geb degi, Magdala-yalaganse nadsunnad.

## 16

*Fariseo'mar, Jesús ega-ibmar-dakledisulid-  
imakbi abesad*

*(Marcos 8:11-13; Lucas 12:54-56)*

<sup>1</sup> Fariseo'mar, degi, Saduceo'mar, yamo Jesús-wilubdakega Jesús'se nonimalad. Jesús'ga sogdemalad:

—Be Bab-Dummad-ganguedba, ibmar-wilubgan-dakledisulid anmar-wagab be imake, adi, anmar mag be-dakoed, be Bab-Dummad-nuggi nue-daniye.

<sup>2</sup> Jesús amar-abin sogded:

—Wegi anmar-yargi neg-sedodele, be sokar-damalad: 'Mogir, ber ginnitibiid, degisoggu, neg-yolasaila guoed.'

<sup>3</sup> Degine, neg-wakdaradba be sokardamarbalid: ‘Emi mogir ber ginnitibiid, degine, gutumar yaisurbalid. Degisoggu, dii burwaba-mesa wioed.’ ¡Bemar wagar-darbodamalad-dulemalad! Ar dii-wioeddi magar be dakmalad. Degite, bemar-abargi ibmar-gunaidi, be aku dakmalad.

<sup>4</sup> ”We-dulemar-galagwensulidamalad, we-dulemar-negsichigi-galagwensuli-yolemalad Bab-Dummad-sogedba ibsasmalad. Amardi ega ibmar-wilubgan-dakledismalad oyobi abedamalad. Ar we-wilubgan ega bar oyolegosmalad. Unnila ega oyolegoedi, Bab-gayaburba-barsoged-Jonás-gusadyob, ega a-wilubgan oyolegoed, adi, wisgumalaga, an doadule gue.”

Jesús degi-sogsagu, emargi bangudsunnad.

*Fariseo-ibmar-odurdaked, igar-nuedsulid  
(Marcos 8:14-21)*

<sup>5</sup> Jesús e-sapinganmala mata-dummad-gaka-obakar mosgua, e-sapingan dakarmalad, madu iesmala.

<sup>6</sup> Jesús e-sapinganga sogdesunnad:

—Fariseo-madubur-inagi, Saduceo-madubur-inagi, nue salakarmar.

<sup>7</sup> Jesús-sapingan ulubgi binsadmalad. Sogdemalad:

—Anmar madu-searsulidba, Jesús anmarga deyob sogergebed.

<sup>8</sup> Jesús, e-sapingan madu-senonisulidgisunmakmalad mag daksagu, amarga sogdesunnad:

—¿Ar ibiga be sunmaknanai, anmar madu searsure? ¿Ar amba be an-benmarde?

<sup>9</sup> ¿Ar amba be nue-akusunna itomala? ¿Madu-gwaataledgi dulemar-miliatar (5,000) madu-guchamaladi be insasurmarsi? ¿Agi madu-obichad garba-gwaambe-gakabo-mergu (12) be wesmarbarsursi?

<sup>10</sup> Deginbali, ¿amba be insasurmarbali, madu-gwagugledgine (7) dule-milibake (4,000) madu-guchamalad? ¿Agi madu-obichad, garba-gwagugle (7) bemar wesmarbarsursi?

<sup>11</sup> ¿Ar ibiga bemar nue-akusunna itomala? Madu an bemarga obarsulid. Bemar Fariseo-madubur-inagi, degi, Saduceo-madubur-inagi nue salakarmarye an bega soged.

<sup>12</sup> Geb degi, Jesús-sapingan Jesús-ega-sogsadi, madubur-inagi nue salakarmarye, nue magar itosmalad. Madubur-ina-sunnadgi ega sunmaksulid. Ega sunmakedi, Fariseo-ibmar-odurdakedgi, degi, Saduceo-ibmar-odurdakedgi ega sunmaked, nue salakarmarye.

*Pedro, Jesús'ga sogsad, be Bab-Dummad-Machi-sunnadye*

*(Marcos 8:27-30; Lucas 9:18-21)*

<sup>13</sup> Jesús Cesarea-Filipos-neggwebur-walikgusgu, e-sapinganse egichialid. Ega sogded:

—Ani Dule-Machi, ¿wede doaye an-annik sog-mala?

<sup>14</sup> E-sapingan abin-sogdemalad:

—Gwenna-gwenna Diigi-dule-oged-Juan'ye benik sogmalad. Baigandi sogmalad, be Bab-Dummad-gayaburba-barsoged-Elías-nugadye. Baigan sogmarbalid, be Jeremías'ye. Baigan sogmarbalid, be Bab-Dummad-gayaburba-barsoged epenne-gudigusad-wargwenadye.

<sup>15</sup> Jesús e-sapinganga sogded:

—Bernardina, ¿doaye be an-annik sogmarmosunna?

<sup>16</sup> Simón-Pedro Jesús-abin sogded:

—Be Cristo, Bab-Dummad-dule-wargwen-barmidagoye-sogsad-dule, Bab-Dummad-Dula-Maid-E-Machi-sunnad.

<sup>17</sup> Geb degi, Jesús abin-sogdemogad:

—Simón, be Jonás-machi, begi nued binsalesad. Ar dule we-ibmar bega sogsasulid. An-Bab-nibneggi-maid, a bega we osanalosad, an Cristo'ye, an Bab-Dummad-Machi-sunnadye.

<sup>18</sup> Ani an bega sogsun: Be, Pedro'd. We-akwabirgi anba-nanaimalad an omelomai an imakoed. Burgwedi gwen egi obinosulid.

<sup>19</sup> Degine, ani an Bab-Dummad-e-negdakmaid-yabe an bega ukoed. Ar bela we-napneggi be-ibmar-sogsadba galenonikile, nibneggi bela galenonimogoed. Ar we-napneggi be-ibmar-sogsadba igar-egasale, nibneggi bela deyob igar-egalemogoed.

<sup>20</sup> Geb degi, Jesús e-sapinganga gandikidgi sogdesunnad:

—Melle dulemar-baiganga bipisaar be sogo, ani an Jesús, an Cristo'ye, Bab-Dummad-dule-wargwen-barmidagoye-sogsad-dule-sunnadye.

*Jesús e-burgoedgi sunmaksad  
(Marcos 8:31-9:1; Lucas 9:22-27)*

<sup>21</sup> A-iba-akale, Jesús, e-sapinganga e-burgoedgine sunmakded. Ede Jerusalén'se naergebye, Judío'mar-girmar-dummaganse nue-odurdaklegoye, dule-irwa-Bab-Dummadsegormalad-e-dummaganse nue-wilegoye, degine,

Garda-Narmaked-Dulemarse wilebaloye. Ede amarse oburgwilegoye, geb degi, ede ibapaagi gannar durguoye.

<sup>22</sup> Pedro, deyob-Jesús-sogsad-itosgu, bachikii Jesús-sesad, Jesús'ga sabsur-ibmar sogded:

—¡Dummad! Deyob be gued, sate. Ar bela we-ibmar-be-sogsadi, guosulid.

<sup>23</sup> Jesús, Pedro'sik aibiris-imaksagu, Pedro'ga sogded:

—¡Nia-saila-Satanás, wegi be nae! Ar bedi igar-isanagi an-egwanbi gudiid. Be-binsaedi, Bab-Dummad-Igar-Maidgi be binsasulid. Unnila dule-e-igarmar-mamaidginbi be binsaed.

<sup>24</sup> Geb degi, Jesús e-sapinganga sogded:

—Ar dule-wargwen an-sapinga gubiele, na dukin san iegergebed, bato burgwenadapidginakrus-semaiyob nanaergebed, geb a-dule anba dagodo, geb a an-sapinga guodo.

<sup>25</sup> "Ar dule-wargwen anba-naid-ular, burgwe-bisulir, e-san-burba ei yogguodo. Ar anba-naid-ular, burgwenonikirdi, adi, e-san-burba yogguo-surdo.

<sup>26</sup> Ar dule napneg-naid bela egadga imaksar, ar e-san-burbadi yoggusar, we-dulega, ¿ibi-nuedga ega gusar be insae? Gwen ega ibmar-nuedga guosulid. Deginbali, dule-gwensak e-san-burba mer ei yogguoga, ¿ibi na uksar be insae? Ibmarked, sate.

<sup>27</sup> "Ar Dule-Machi E-Bab-ganguedgi-yeerdaklegedgi, e-baliwiturmar-abargi we-napnegse danikoed. Geb agi, bela wala-walagwen-dulemarga, e-ibmar-imaksamaladba ibmar uknonikoed.

<sup>28</sup> Napira an bemarga soged, gwenna-gwenna wegi-bemar-bukwadi, burgosurmalad. Amba dula-gudiidgi Dule-Machi-negdakmaid dakedse-malad.”

## 17

*Jesús-e-san-gwagsad*

*(Marcos 9:2-13; Lucas 9:28-36)*

<sup>1</sup> A-ibanergwad-sorbali (6), Jesús, bachik Pedro, Jacobo, degine, Jacobo-e-urba-Juan, yar-birse sesad.

<sup>2</sup> Jesús amar-asabin yar-birgi-gwichi, Jesús-e-san-dakleged gwagdegusad, na e-wagar dad-ibeler-gaeyobi gadequsad, degine, e-mormala, bela ise-sipumakar, bela dagudik, gwallubayobi dakle-naded.

<sup>3</sup> Geb agi, Jesús-sapingan-warbaagwad dakdemalad, Jesús, Moisés'mala, degi, Elías'mala sunmakgwichi.

<sup>4</sup> Geb degi, Pedro Jesús'ga sogded:

—Dummad, we nueddo, anmar wegi gudisaed. Ar be abegele, anmar wegi neg-matargana-gwapaa sobmalodo: Gwagwen bega, baid Moisés'ga, geb baid Elías'garmo.

<sup>5</sup> Amba Pedro-sunmakgwichi, mogir mee emar-birgi nagononikid. Geb agi mogir-imbaba gayaburba gollalid, sogded: “We, An-Machi-sabedid. We-Machigi an yeer itoged. We-Machi nue be itomar.”

<sup>6</sup> Ar Jesús-sapingan degi-gayaburba-itosmargua, yog napase asgun-sindigar sigidmalad, bela nue-dobe-ito nadmalad.

<sup>7</sup> Geb agi, Jesús e-sapingan-walik nonikid, geb ebunonikid. Ega sogded:

—Be gwisgumar, mer be dobgumar.

<sup>8</sup> E-sapingan nono-onakwidmargu, dakdemalad, unnila bato Jesús'bi walagwen gwichi.

<sup>9</sup> Jesús e-sapingan-warbaagwadmala yar-birgi-aidearmargu, e-sapinganga ise-sabsur sogded:

—Mer bipisaar bemar an-san-gwagsad dulemarga sogmalo. Geb ani Dule-Machi burgwisar, degi, gannar durgusad-sorba, geb be sogmalo.

<sup>10</sup> Geb degi, e-sapingan Jesús'se egichiarmar-sunnad:

—¿Ibiga degite, Garda-Narmaked-Dulemar sogmarsunna, Bab-Dummad-dule-wargwen-barmidagoye-sogsad-idu, Elías-inse nonigwelo?

<sup>11</sup> Jesús abin-sogded:

—Ar napiragwad. Elías-inse nonikoed. Bela dulemar Bab-Dummad-Igargi-binsaega igar-nudaknonikoed.

<sup>12</sup> Ar andi an bemarga soged, Elías bato nonikid. Nonikid akudaksa gusmalad. Ar dulemar, igi imakbi-gusmala, deyob Elías-imaksamalad. Amba deyob ani Dule-Machi, amarse an odurdaklemo-goed.

<sup>13</sup> Geb degi, e-sapingan Diigi-dule-oged-Juan'nik-ega-ibmar-soged mag itosmalad.

*Jesús, machigwa-niaburba-nikad nudaksad  
(Marcos 9:14-29; Lucas 9:37-42)*

<sup>14</sup> Jesús e-sapingan-warbaagwadmala dulemar-bukidar-bukmaladse aidenonimargu, dulewargwen Jesús'se nonikid. Yokorgi sindigar Jesús-abin signonikid, ega sognonikid:



<sup>15</sup> —Dummad, an-machi wis be wiledake. Ar an-machi nue-odurdaklediid. Ani burwa-saar-daed. Imbagwenale, soogi argwatedaed. Imbagwenale, diigi argwatedaed.

<sup>16</sup> Ar be-sapinganga an-machi an senoniknad, be-sapingan anga gwen nudaksasurmalad.

<sup>17</sup> Jesús abin-sogded:

—¡Be Babgi-bengumalad-dulemar! ¡Be Bab-igar-oakaloged-dulemar! ¿Ar bemarde an-suli geg be ibmar imakmarde? ¿Ar sana be ibmar durdakmaloe? Machigwa anga be sedamarsun.

<sup>18</sup> Geb degi, machigwa Jesús'se senonimargu, Jesús niaga binnasur ibmar sogded. Geb nia machigwagi noded. A-akale, machigwa nugusunnad.

<sup>19</sup> Jesús-e-sapingan Jesús'se bachikii ese gochamalad, ega sogdemalad:

—¿Ar ibiga anmardi geg niaburba ono gusmala?

<sup>20</sup> Jesús abin-sogded:

—Ar bemar ulubgi amba angi benmarsoggu, a-ular, geg be niaburba ono gusmalad. Ar napira an bemarga soged, ar bemar mostaza-gwagyob, wis bipi be angi bensurmalale, sunna be we-yarga sogsamalaled: ‘Wegi-siid be weba ainir,’ ar yar ainirisaled. Ar ibmar bela be imakedbimardo.

<sup>21</sup> [“An-emis-nia-onosadgiid-onogegala, yogasaar geg dule onoged. Unnila mas-gunsuli, degi, Bab-Dummadse-goledgi, geb bemar sunna wegiid-niamar onoged.”]

*Jesús ilabogus gannar e-burgoedgi sunmaksad  
(Marcos 9:30-32; Lucas 9:43-45)*

<sup>22</sup> Jesús Galilea-yargi e-sapinganmala bipirmakdimaladgi, ega sokalid:

—Ani Dule-Machi, an-isdarmalad an-ganonimaloed, dulemarga an-ukmaloed.

<sup>23</sup> Geb agi dulemar an-oburgwemaloed. Degi-inigwele, ibapaagi gannar an durguoed.

E-sapingan Jesús-deyob-ega-soge itoarmargu, nue-wile itodmalad.

*Jesús Bab-Dummadse-goled-negga-mani-galed bennuksad*

<sup>24</sup> Jesús e-sapinganmala Capernaúm'se modapmalad, dulemar-Bab-Dummadse-goled-negga-mani-galeded-weemalad Pedro'se nonimalad, ega sognonimalad:

—¿Ar bemar-odurdaked-saila, wede Bab-Dummadse-goled-negga-mani-galeded bennuksuli?

<sup>25</sup> Pedro abin-sogded:

—Anmar-odurdaked-saila bennuked.

Pedro negse dogdegua, Jesús-inse ega sunmakalid, ega sogded:

—Simón, be dakegua, reymar-we-  
napnegginmalad, ¿doamargi we-mani gadamar  
be insae? ¿E-sordamargine? ¿Dulemar-baigangine?

<sup>26</sup> Pedro abin-sogded:

—E-sordasurmaladgi mani galeded.

Jesús, Pedro'ga sogdesunnad:

—Degisoggu, e-sordamardi geg bennuksundo.

<sup>27</sup> Ar degi-inigwele, dulemar mer anmargi ur-wemalagala, mata-dummadse be nae, be ua-sona. Ua-gebe-be-sooedi, e-gaya be egaoed. A-e-gaya-yaba be mani-amioed. A-manigi bega, degi, anga, be mani-galeded bennukoed.

# 18

## 4b. Dulemar-daed-igargi Jesús sunmaksad

*(18:1-20:34)*

*¿Doa bur dule-dummadi?*

*(Marcos 9:33-37; Lucas 9:46-48)*

<sup>1</sup> A-ibagangi, deun Jesús-e-sapingan Jesús'se non-imalad, ega sognonimalad:

—Bab-Dummad-e-negdakmaidgi, ¿doa bur-dule-dummadi?

<sup>2</sup> Jesús machi-bipigwad-wargwense gochad. Emar-abargi ogwisgunonikid.

<sup>3</sup> Geb e-sapinganga sogded:

—Napira an bemarga soged, ar bemark machi-bipigwa-daedyob gusulile, Bab-Dummad-e-negdakmaidse geg be dogmalad.

<sup>4</sup> Ar degisoggu, dule we-mimmiyob na san-bipii imakele, a-dule, Bab-Dummad-e-negdakmaidgi dule-dummaddo.

<sup>5</sup> Ar dule an-nuggine we-mimmiyobid-wargwen ber nue-weligwar abingaele, ar an-abinganaiyob gunaido.

*Isguedgi-aimar-oichoged igar-buledid*

*(Marcos 9:42-48; Lucas 17:1-2)*

<sup>6</sup> Jesús sogdebalid: “Ar dule we-mimmi-burwigana-angi-bensurmalad-isquega-imakele, nue-dummad wilegoed. We-dule-deyob-emar-oichosad e-dukargi akwamuu-dummad-edilleged, degi, deyob, dii-wilagi-egwaleged bur-nabirid.

7 We-napneggi ibmar-galagwensuli Bab-Dummadgi-isguega-emar-imaked, doggus wilub-obichagusad, gwen bargalegosulid. Ar dule emar-gwage-ichodiiddina, duledar-wilesdo.

8 ”Degisoggu, ar be-argan isguega be-imakdibe, be-nag isguega be-imakdibe, bur be sike, begi-dikasur be mete. Ar argan-wargwen-nika degisadegudigued, bur nabirid. Ar nag-wargwen-nika degisadegudigued bur nabirid. Ar bur undarad, be argan-warbo-nika, degi, mali-warbo-nika, be soo-saila-geg-berguedse bur melleder.

9 Ar be-ibya isguega be-imakdibe, bur ibya be onoge, begi-dikasur-meted be imake. Ar bur-nabirsursi, ibya-gwagwen-nika dulagudigued. Ar bur undarad, ibya-gwabo-nika soo-saila-geg-berguedse melleder.”

*Sibad-wawaad-yoggusadgi burbar sunmakle-  
naid*

*(Lucas 15:3-7)*

10 Jesús sogdebalid: “Nue be salakarmar, mer ibgwensur we-burwigana be dakmalo. Ar napira an bemarga soged, ar nibneggi e-baliwiturmar an-Bab-nibneggi-maid-walik gudigumalad.

11 [Ar ani, Dule-Machi, an nonigu, dulemar-yoggus-gudimalad-abonogega an nonikid.]

12 ”Igi be binsamala. Dule-wargwen dulatar-nasibad-wawaad-nikad (100) ei wargwen yoggusale, ¿ar dulabake-gakambe-gakabakebakad (99) sapurba-obes nadsulir be insae, ei-wargwen-yoggusad aminaega? Obesale, ei-wargwen-yoggusad aminaegar.

13 "Napira an bemarga soged. Ar we-sibad-wawaad-wargwenad-aminonikile, sibad-wawaad-dulabake-gakambe-gakabakebak-yoggussulidba (99) bur weligwar itosaled.

14 Degisoggu, be-Bab-nibneggi-maid, sibad-wawaadyob we-bipigana-wargwensaar ei yoggubisur abemaid."

*Gwenadbo igar-naboged*  
(Lucas 17:3-4)

15 Jesús sogdebalid: "Degisoggu, be-gwenad begi nosale, ese be nao. Unnila bebo-apinni-siidgi nue ega be sogo, nue be angi nosye. Ar be-gwenad nabir be-itosale, be-gwenad be-aiga gannar gunonikoed.

16 "Ar be-gwenad be-itosulile, dule-wargwendibe, dule-warbodibe, beba be nidoed, adi, bela be-ibmar-sogoed, wemar bela be-itomarmogoed.

17 "Ar be-gwenad wemar-wagab be-itosulile, geb bela Jesús'ba-nanaimalad-abargi ega be ibmar sogoed. Ar be-gwenad amba amar-abargi be-itosulile, dule-Bab-Dummad-wissurmaladyob be we-gwenad-daksunnoed, degine, Roma-dummadga-mani-gaedgi-arbamaladyob be we-dule dakbaloed.

18 "Napira an bega soged, ar bela be we-  
napneggi be-ibmar-sogsadba galenonikile, nibneggi bela galenonimogoed. Ar bela be we-  
napneggi be-ibmar-sogsadba igar-egasale, nibneggi bela deyob igar-egalemogoed.

19 "Inniki an bemarga soged. Ar bemar-warbo we-napneggi Bab-Dummadse-ibmar-egisega, be

emarbi-binsamalale, ar ibu be egisbimala, an-Bab-nibneggi-maid a-ibmar bemarga imakoed.

<sup>20</sup> Ar bia bemar-warbo, warbaadibe, an-nuggi ambikunonimalale, an bato bemar-abargi gudiid.”

<sup>21</sup> Geb degi, Pedro Jesús’sē walikgunonikid, ega sogded:

—Dummad, An-gwenad-angi-nosadga, ¿ilabigwa angi nossulidyob an dakoe? ¿Ilagugledsega (7)?

<sup>22</sup> Jesús abin-sogded:

—Unnila ilagugleye (7) an bega sogsulid. An bega soged, dulapaagwad-gakambe-ilaguglese (77) be-gwenad begi nossulidyob be dakoed.

*Mai-gwensak, dule-egi-nosad-abingabi gussulid*

<sup>23</sup> Jesús sogdebalid: “A-ulale, Bab-Dummad-e-negdakmaididi, ar rey-wargwen e-maimar-egi-mani-ganikid-ebo igar-nabirogega ese gocha-gusadyobdo.

<sup>24</sup> Wargwen-egi-mani-ganikid ese nonigu, dak-leardo, mani-sibu-mili-miliba (10,000) egi ganiki.

<sup>25</sup> Ar we-dule mani-satesoggu, geg e-dummad-bennuked. A-ular, e-dummad ega sogdesunad, ‘Be-ome, be-mimmimar, degi, bela be-ibmar-nikad be manigi ukna, adi, agi be an-bennukoed.’

<sup>26</sup> ”Geb a-maide, yokorgi e-dummad-asabin sindigar sigis imaksad, egi wilenaigusad, ega sognaigualid: ‘Dummad, mer be dogadoga an-imakgwele. Bela an be-bennukoed.’

<sup>27</sup> Ar rey, wile na e-mai-dakdegu, ega sogdesunad: ‘Be angi bar mani ganisurdo.’ Degisoggu, e-mai-ollor-imaksad.

28 "Geb rey-e-mai, e-dummad-walik-sii nodgu, dule-ebo-arbaed egi mani-sibu-dulatar-ganikid (100) abingualid. Geb rey-e-mai a-dule-gammuyaa ganonikid, ega sogded: 'Angi be-mani-ganikid, be an-bennuk.'

29 "Geb agi ebo-arbaed egi wilenaigusanad, ega sognaigusanad: 'Mer doga-doga be an-imate. Bela an be-bennukoed.'

30 "Ar rey-e-mai, we-dule-ebo-arbaed-gwen-itobi gussulid. Aka esgaryase dule-egi-mani-ganikid-metedapid, adi, bela-egi-mani-ganikid e-bennukegar.

31 Rey-e-maibo-arbamalad deyob daksamargu, bukib binsadmalad. Geb e-dummad-reyga emarna-ibmar-daksamalad bela sogdapmalad.

32 "Geb degi, e-dummad-rey, e-mai-egi-mani-gani-gusadse gochad, ega sogded: '¡Mai, be dule-igana! Be angi wilenaigusgu, bela-be-angi-mani-ganikid an bela bega osulosad.

33 Ar igi an wile be-daksamoga, ¿ar be deyob bebo-arbaed geg be wile-dakmosi?'

34 Geb degi, e-dummad uludgu, we-mai-igana dulemar-sabsur-odurdakmaloedga urmaksasunad, adi, bela-egi-mani-ganikid e-bennukegar."

35 Geb degi, Jesús sogded: "Ar bemar bela gwagegi na be-gwenad-begi-nosad be ega sogsur-malar, igi-barsaye, deyobi an-Bab-nibneggi-maid bemar-sabsur-imakmarmoged."

## 19

*Jesús, ome-metedgi, degi, sui-metedgi sunmaksad*

*(Mateo 5:31-32; Marcos 10:1-12; Lucas 16:18)*

<sup>1</sup> Emi Jesús deyob-ibmar-sogsad-sorba, Galilea'gi bangudsunnad. Judea-yalaganba, degi, Jordán-diwar-obakar nade gusad.

<sup>2</sup> Dulemar-bukidar Jesús'ba nade gusmalad, agi Jesús dule-uellemalad onudaksad.

<sup>3</sup> Geb agi gwenna-gwenna Fariseo'mar Jesús'se nonimalad, yamo yardakega ese nonimalad. Ega sognonimalad:

—¿Wede yogsaar sunna ome-meteleye igar mai?

<sup>4</sup> Jesús abin-sogded:

—¿Ar bemarkede Bab-Dummad-Gardagi absodis-urmarsi?

Gebesailagi Bab-Dummad we-napneg-nasikargu,  
'macheded ome-ebo abirgunagwar  
ogwisnonikid.'

Génesis 1:27; 5:2

<sup>5</sup> Degi, Jesús sogdebalid:

—Bab-Dummad-Gardagi sognaibalid:

'A-ulale, macheded ome-nikusale, e-babgi bangu-  
doed, e-nangi bangudoed.

Geb macheded e-ome-ebo garmakdii guoed.  
Ebogwadi, san-wargwennagwadga gunon-  
ikoed.'

Génesis 2:24

<sup>6</sup> "Ar degisoggu, bar warbosulid. Unnila san-  
wargwenna gunonimarsunnad. Ar degisoggu,  
dule, Bab-Dummad-dule-abirgunagwar-  
imaksadi, gwen na metemalaga imakosur."

<sup>7</sup> Fariseo'mar, Jesús-abin sogdemalad:

—Ar degite, ome-metega, ¿ibiga Moisés ome-  
meted-garda-imakoye igar-mesissunna?

<sup>8</sup> Jesús abin-sogded:



—Ar Moisés bemar-gwage-dutusulidba, ome-metega, sunna bemar ome-meted-garda imakye bemarga igar mesisgusad. Ar iduardi, deyob igar maisulinad.

<sup>9</sup> Andi an bemarga soged, ar doa-dule, unnila e-ome e-dikarba-nosardi, nabir meted. Ar degisulirdi, we-machered ome-baid-nikusale, ome-dikarba negsichigi yolediid. Ar doa-dule, ome-melleded-nikusale, we-dule, negsichigi yoledimogad.

<sup>10</sup> Jesús-sapingan Jesús'ga sokarmarsunnad:

—Ar weyob macheredga ome-nikuedsik ega igar maile, mer bur ome-nikued nabirsundo.

<sup>11</sup> Geb degi, Jesús e-sapingan-abin sogded:

—Suli, be noar sogmala. We-ibmar-soglenaid be aku itomalad. Unnila, Bab-Dummad, dulemarga-igar-uksadga, amarbi nabir ome-nikuosuli nana-maloed.

<sup>12</sup> Ar gwen-gwen gusgu muu-neg-akale, geg-ome-nikued danikid. Ar gwen-gwen yamo siamar-baisur-dakega alu-gwasuar imaklesmalad. Ar gwen-gwenbali, na dukin Bab-Dummad-e-negdakmaid-ular, mer-ome-nikued imaksamalad. Ar dule na unni omesuli nanao-itogele, omesuli-nanaed-igar na abingado.

*Jesús, mimmigangi nued binsasad  
(Marcos 10:13-16; Lucas 18:15-17)*

<sup>13</sup> Geb degi, Jesús'se mimmigan-senonimalad, e-argan mimmigan-nonogi mesega, adi, Bab-Dummadse ega golegar. Jesús-sapingan dulemar-mimmigan-senonimaladse uluarmalad.

<sup>14</sup> Jesús'di e-sapinganga sogded:

“Mer ese urwemar. Mimmigan anse daged be imakmar. Mer be igar gamala. Ar Bab-Dummad-e-negdakmaid we-mimmiganyob-damaladgadid.”

<sup>15</sup> Geb Jesús mimmigan-e-nono-birgi e-argan mesisgu, Bab-Dummadse ega gochad. A-sorba, Jesús nade gusad.

*Dule-mani-ibed Jesús'se nonikid*

*(Marcos 10:17-31; Lucas 18:18-30)*

<sup>16</sup> Geb degi, dule-wargwen Jesús'se nonikid, ega sognonikid:

—Odurdaked-saila-nued, burba-geg-bergued an nikuega, ¿ibi-nued an saergebe?

<sup>17</sup> Jesús abin-sogded:

—¿Ibiga dule-nuedye be anga soge? Ar dule-nued niksulid. Unnila Bab-Dummadbi wargwenna dule-nued gued. Ar burba-geg-bergued be nikubiele, Bab-Dummad-Igar-Mesisadba be nanaergebed.

<sup>18</sup> Dule abin-sogded:

—¿Igid-igarmala?

Geb Jesús abin-sogded:

—‘Melle be dule-oburgo.

Melle be be-abirginsulid-ebo galagwensuli nanao.

Melle be ibmar-atursao.

Melle be gakansaar aimargi sunmako.

<sup>19</sup> Be-bab-nug-odummodii, degi, be-nan-nug-odummodii be nanamalo.

Degine, na be dukin san-sabeyobi, emar be sabgumogo.’

Éxodo 20:12-16; Levítico 19:18; Deuteronomio  
5:16-20

<sup>20</sup> Sapिंगwa Jesús-abin sogded:

—Gusgu an sapingwagwad-akar bela we-Igarmar-Mamaidba an nanadiid. Emidi, ¿ibubi napi-imaked an abesunna?

<sup>21</sup> Jesús abin-sogded:

—Ar igar-napiragwadbi-imakdii be nanabiele, be-negse be nae. Bela be-ibmar-nikadi, manigi be uko. Geb a-mani, dule-wileganaga be mimio. Degiir, geb be nibneggi ibmar-nued nikuoed. Geb a-sorba, anba be dago, an-sapinga guegar.

<sup>22</sup> Sapिंगwa, deyoob Jesús ega soqe itosgu, naibi-ito naded, ar ade, dule-mani-ibedid.

<sup>23</sup> Geb degi, Jesús e-sapinganga sogdesunnad:

—Napira an bemarga soged, ibiyobi dule-mani-ibganga Bab-Dummad-e-negdakmaidse-doged igar dutusuli, ar ade, dogdar maniginbi binsamalad.

<sup>24</sup> Gannar an bemarga soged, moli-yargan-mureged bur-baisursunna iko-ibyagi doged, ar dule-mani-ibeddi bur beedse Bab-Dummad-e-negdakmaidse doged.

<sup>25</sup> Jesús-e-sapingan, Jesús-wegi-soqe-itosgu, nuegeger-ito nadmalad. Agala, sogdemarsunnad:

—¿Ar doa degite, sunna abonolegosunna?

<sup>26</sup> Jesús e-sapingan-dakdegu, ega sogded:

—Ar dulemargardi, geg ibmar gued. Bab-Dummadgardi, bela ibmar nabir guedbiid.

<sup>27</sup> Geb degi, Pedro abin-imakdegu, sogded:

—Anmardi beba-naega belagwapa ibmar obesad. Degite, anmardi, ¿ibu nikumarmogosunna?

<sup>28</sup> Jesús abin-sogded:

—Napira an bemarga soged, Bab-Dummad we-ibmar-bela-ogwaoed-ibagangi, ani Dule-Machi, an-ologan-yeerdaklegedgi an sigidapir, bema-anba-nagusmalad ologan gwaambe-gakabogwadgi (12) sigmarmogoed, adi, Israel-dorgan-sogambe-gakabogwadga igar-nabosii be gumalagar.

<sup>29</sup> "Ar doa-dule anba-naid-ular ibmar-metele, e-negmar-metele, e-gwenadgan-metele, e-bunmar-metele, e-bab, e-nan, e-ome, e-mimmigan, degine, e-nainumar-metele, we-dule ibmar-dulataledba (100) bur bule abingaoed, degine, burba-gegberguedi nikubaloed.

<sup>30</sup> "Ar bukidar emar-idudimaladi, emar-sorbalidga gumaloed. Bukidar emar-sorbarmaladdi, emar-idumaladga gumaloed."

## 20

### *Nainugi-arbamaladgi burbar sunmaklesad*

<sup>1</sup> Jesús sogdebalid: "Ar Bab-Dummad-e-negdakmaid weyobdo: Dule-wargwen neg-neguya-sediid, wakudar neggi nodgua, e-nainugi-ega-arbamalaga dule-ega-arbamalad aminaded.

<sup>2</sup> Dule-nainu-ibed arbamalad-ebo igar nabosad. Arbamaladga sogsad, ibagwena denario-gwagwen an be-bennukoye. Geb agi ega arbaega e-nainuse barmissunnad.

<sup>3</sup> "Dad-abar-dummad-gusgu, gannar nainu-ibed, nodbalid. Geb dakdapid, ibmar-ukleged-naba dulemar arbaedsuli binsa bukwa dakdapid.

<sup>4</sup> Agi nainu-ibed amarga sogded: ‘Ar bemar an-nainuse arbanamarmodo, ar sogedba an be-bennukmaloed.’ Amala, arbaegala, nade gusmalad.

<sup>5</sup> ”Yorukugusgua, nainu-ibed dulemar-amiega gannar nodbalid. Dulemar-amisgu, ega arbamalaga e-nainuse barmisbalid. Wachi-ilapaagi, amba deyob imaksabalid, degine amarga baiganga-sogsayob sogsabalid.

<sup>6</sup> Wachi-ilatargi, nainu-ibed gannar nodbalid. Dulemar binsa bukwa dakdapbalid. Amarga sogded: ‘¿Ar ibiga bemar arbasuli emi be osedosomal?’

<sup>7</sup> ”Abin-imakdemalad: ‘Ar dule anmarga arbaed uksumalad.’ Nainu-ibed amarga sogded: ‘Bemar an-nainuse arbanamarmoga, ar sogedba an bemar-bennukmaloed.’

<sup>8</sup> ”Neg-mutikgudgu, nainu-ibed ega-neg-dakedga sogded: ‘Arbamaledse be gole, ibagwen-arbasad-wilub be bennuk. Napisolabamodapmalad-inse be bennuko. Geb degi, wakudarad-akar-arbananaid napisolaba be bennuko.’

<sup>9</sup> ”Napisolaba-arbasmalad nonimargu, denariogwagwen bennuklesmalad.

<sup>10</sup> Wakudar-yalaba-arbadmalad nonimarmogu, binsasmalad, emardi bur melu bennuklegoergebye. Ar amar bennuklearmargu, amba denariogwagwen bennuklesmarmogad.

<sup>11</sup> ”Wakudar-yalaba-arbasmalad bennuklesmargu, nainu-ibedgi uluarmalad,

<sup>12</sup> sogdemalad: ‘Wemar-sorba-nonimalad, unnila wachi-irgwen wis arbasmalad. Anmardi bur

dummad-arbasad, dadba dummad-galitosad, degite, anmar-sunnaa bennuklesmarmogad.'

<sup>13</sup> "Nainu-ibed, amar-wargwen-abinsadgu, sogded: 'An-ai, an gwen begi dodossulid. ¿Ar bemarko igar an nabossursi, denario-gwagwen an be-bennukoye?

<sup>14</sup> Degisoggu, be-mani be sue, ar begadid. Be nae. Ar wemar-napisolaba-nonimalad bemarko-sunnaa an bennukbiele, an-itolegeddo.

<sup>15</sup> An-itolegedba an-mani an imakbier, ar wede akarsi. An dule-nued-daedba, ¿ar be angi nobsi?

<sup>16</sup> "Ar bukidar emar-idudimaladi, emar-sorbalidga gumaloed. Bukidar emar-sorbarmaladdi, emar-idumaladga gumaloed. [Ar ade, bukidar dulemarse gorleged, degite, unnila wis ichee dulemar sulegoed.]"

*Jesús ilapaagus na e-burgoedgi sunmaksad  
(Marcos 10:32-34; Lucas 18:31-34)*

<sup>17</sup> Jerusalén'se nadapmargu, Jesús na e-sapingan-ambe-gakabogwadse (12) bachikii gochad. Amarga sogded:

<sup>18</sup> "Emi anmar Jerusalén'se nadapid. Ani Dule-Machi, dule-irwa-Bab-Dummadse-gormalad-e-dummaganga, degi, Garda-Narmaked-Dulemarga an uklegoed. Amar anga igar-itosmalar, sogmaloed, oburgwemarye.

<sup>19</sup> Wemar-Judío-dummagan, Judío'surmaladga an-ukmaloed, adi, angi dodomalagar, an-bibyomalagar, degi, nakrusgi an-biokmalagar. Ar degi-inigwele, ibapaagi gannar an durguoed."

*Jacobo, Juan-ebo dummadga gubigusmalad  
(Marcos 10:35-45)*

<sup>20</sup> Geb degi, Zebedeo-machimala-e-nan, Jesús'se e-machimalamala nonikid. Yokorgi sindigar abin signonigu, Jesús'se ibmar egisnonikid.

<sup>21</sup> Jesús ega sogded:

—¿Ibu be abege?

Ome, abin-sogded:

—Be negdakmai-gusale, we an-masmala-warbogwad dummaganga be nugsao. Gwensak be-argan-nuedsik-siged be imako. Baid be-argan-sapiledsik-siged be imakbalo.

<sup>22</sup> Jesús sogded:

—Ibmar be egisnanaid, be wissurmalad ibu be egisnanaid. ¿Ar sunna be, an-nue-dummad-wilegoedyobi, be wilemarmogosi? Degine, ¿ar sunna be, an-dii-oglesadgi be oglemarmogosi?

Jesús-abin sogdemalad:

—Anmar sunna imakmala.

<sup>23</sup> Jesús abin-sogded:

—Be nabir sogmalad, ar be deyob gumarmogoed. Degi-inigwele, ar dummaganga-nug-imakeddi, adi, angi sisulid. Unnila an-Babgi siid. Bato an-Bab we-ganmargi-sigmaloed nug-imaksad.

<sup>24</sup> Jesús-e-sapingan-e-ambedi (10) wemar-warbogwad-dummaganga-gubimalad itosmalad. Degisoggu, wemar gwenad-warbogwadgi uludmarsunnad.

<sup>25</sup> Geb degi, Jesús e-sapinganse goted. Ega sogded:

“Be nue wismalad, we-napneggi dulemar-dummaganga-gudimaladi e-sordamarba bur dule-dummad na san-imakdamalad. Degine, bela ega ibmar imakbi abedamalad. Deginbali,

e-dulamala geg yogasaar ibmar imakdamalad, ar e-dummagan sabsur-gandikidba ega negsemaidaed.

<sup>26</sup> ”Bernardi mer deyob gumalo. Ar be dummadga-gubiele, maiyob be daergebed. Bela be dulemar-bendakergebed.

<sup>27</sup> Ar be dulemar-iduedga-gubiele, bela be dulemar-maiga be guergebed.

<sup>28</sup> ”Ar ani Dule-Machi, we-napnegse an non-ikidi, mai-nikuega an nonisulid. Maiyob dulemar-bendakega an nonikid, degi, an na-san-burba-ukega an nonikid, degine, dule-isgudimalad-anar-burgwega an nonikid.”

*Jesús, ibyasurmalad-warbo nudaksad*

*(Marcos 10:46-52; Lucas 18:35-43)*

<sup>29</sup> Jesús e-sapinganmala Jericó-neggweburgi-noarmargu, dulemar-bukidar eba armalad.

<sup>30</sup> Deun, ibyasurmalad-warbo, igar-dikarbasimalad. Amar, Jesús-nadapye-itosmargu, binnasur Jesús’s e gotemalad, sogdemalad:

—¡Dummad, Rey-David-wagwa! ¡Anmar-bendake, wile be anmar-dake!

<sup>31</sup> Boo sigmalaga, dulemar ese uluarmalad. Aka bur bule dule-ibyasurmalad binnasur Jesús’s e gotemalad, sogdemalad:

—¡Dummad, Rey-David-wagwa! ¡Wile be anmar-dake!

<sup>32</sup> Jesús, ibyasurmalad-itosgu, gwisgusad. Amarse goted. Ega sogded:

—¿Ibu bemarga imakbi be an-abemarsunna?

<sup>33</sup> Dule-ibyasurmalad sogdemalad:

—Dummad, mag-atake be anmar-imake.



34 Geb Jesús amar-wile-dakdegusad. Wiledakedba, amar-ibya-ebus imaksad. Agi ega ibya yog-nugar nadmalad. Wemar-warbo-ibya-nugusad Jesús'ba nadegusmalad.

## 5. JESÚS, JERUSALÉN'GI NAPI GUDIGUSAD

### 21

(21:1-23:39)

*Jesús, Jerusalén-neggweburgi reyyob dogsad  
(Marcos 11:1-11; Lucas 19:28-40; Juan 12:12-19)*

<sup>1</sup> Jesús e-sapinganmala Jerusalén-modanimargu, Olivos-yar-dikarba, Betfagé-neggwebur-walikgusgu, e-sapingan-warbo barmisad.

<sup>2</sup> Barmisgu, ega weyob sogsad:

—Neggwebur-bipi-anmar-asabin-siidse be namar. Agi be moli-uayasuid-atinnar-nai, degi, e-mimmi-e-dikarba-gudii be dakdapmaloed. Amolimar be esikmalo, geb be anse sedamalo.

<sup>3</sup> Ar dule-wargwen bemarga akar sokardibe, ega be sogmalo: 'Ar Dummad sogye, ede bina-sogye. Ebusad-sorba bega gannar yog-sear imakoye.'

<sup>4</sup> Ar we deyob bela we-ibmar-gusadi, igi Bab-Dummad-gayaburba-barsoged sogsagusa, deyob-guegala gunonikid, deun sogsagusgu:

<sup>5</sup> "Sión'gi-bukmaladga be soge:

'Be dake, be-Rey bese danikid.

Gwage-eikwaa, moli-uayasuid-bipigwad-birgi-sii danikid.

We-moli-bipigwad, moli-uayasuid-ibmar-berbegeg-e-mimmid.' "

## Zacarías 9:9

6 Jesús-sapingan-warbogwad nadmarsunnad. Jesús ega igi sogsa, deyob, imakdapmalad.

7 Jesús-sapingan moli-uayasuid, degi, e-mimmi, Jesús'se senonimalad. Geb degi, a-moli-birgi e-mormar ogichamargu, a-birgi Jesús sigisad. Jesús moli-birgi-sigisgu, Jerusalén'se nadsunnad.

8 Dulemar-bukidara, Jesús-iduar igargi e-mormar-ogitemalad. Abala ogob-gagangiid gwane-gwane imakdemalad, geb Jesús-iduar igargi mese-mese imaksamalad.

9 Ar dulemar-bukidar-idu-nadapmaladi, degi, sorba-danimaladi, binnasur gornadapmalad, sog-nadapmalad:

“¡Bab-Dummad-nug odummomar!

¡We, David-Wagwa!

¡We, Bab-Dummad-nuggi-danikid, bela ega ib-nuedga gusun!

¡Nibneggi e-nug odummomarbar!”

## Salmo 118:26

10 Jesús Jerusalén'se-dogdapgu, bela Jerusalén'ginmalad oimakdemalad, sogdemalad:

—¿Wede doasunna?

11 Dulemar-bukidarad-Jesús'ba-danimalad sogdemalad:

—We-dule, Jesús Bab-Dummad-gayaburbarbarsoged, Nazaret-neggweburginedid, Galilea-yarginedid.

*Jesús, Babse-goled-neggi ibmar-ukbukmalad onosad*

*(Marcos 11:15-19; Lucas 19:45-48; Juan 2:13-22)*

<sup>12</sup> Jesús Bab-Dummadse-goled-negse-dogdapgu, bela dulemar-ibmar-baknanaid, degi, ibmar-ukbukmalad sabsur-onisad. Degi, dulemar-mani-ogwabukmalad-e-mese binnasur-barbikiin meted, degi, dulemar nuu-ukbukmalad-e-gan barbikiin metebalid.

<sup>13</sup> Jesús amarga sogded:

—Bab-Dummad-Gardagi narmakar naid:

Bab-Dummad soged: ‘An-nega, anse-goled-negyeg nugguod.’

Isaías 56:7

”Ar emigindi bemardi atursamalad-negga imaksamalad.”

<sup>14</sup> Bab-Dummadse-goled-neggi, dulemar-ibyasurmalad, degi, dulemar-nue-gegnanamalad Jesús’senonimargu, Jesús amar belanudaksad.

<sup>15</sup> Deginbali, burwigana-bukidar Bab-Dummadse-goled-neggi oimakbukwad, sogbukwad:

“¡We David-Wagwa, e-nug odummomar!”

Geb dule-irwa-Bab-Dummadse-gormalad-e-dummagan, degi, Garda-Narmaked-Dulemar Jesús-ibmar-dakledisulid-imaknai-dakedba, degine, burwigana-oimakbukwa-itosmaladba, sae-itodmalad, Jesús’gi uludmalad.

<sup>16</sup> Amar Jesús’ga sogdemalad:

—¿Burwigana ibmar sogbukmalad be itoge?

Jesús, abin-sogded:

—Eye, an itoge.

”¿Ar bemar Bab-Dummad-Gardagi absodisurmarsi?

‘Burwigangi, degi, amba mimmigan-nunanaidgi,

amar-sunmakedgi be-nug-odummoged be imaksad.’ ”

Salmo 8:2

<sup>17</sup> Agi, Jesús, Judío-dummagan-mete naded, Betania-e-neggweburse nadequsad. Geb agi megidapid.

*Jesús higuera-sapi ukabsasad  
(Marcos 11:12-14, 20-26)*

<sup>18</sup> Oibosgu, Jesús wakdar Jerusalén-neggweburse-gannar-danigu, ukur itoalid.

<sup>19</sup> Igar-dikarba higuera-sapi-gwichi-dakargu, ese nadequsad. Ese modapgu, san sate dakalid, unnila e-gaganbi-nika dakalid. Jesús a-sapiga sogdesunnad:

—Bipisaale bar gwen be durbamakosur.

Agi higuera-sapi yog-dinguar naded.

<sup>20</sup> Jesús-e-sapingan higuera-sapi dingud-gusad-daksagu, geger dakdemalad, sogdemalad:

—¿Ar wede ibiga gwae-gwae higuera-sapi dingude?

<sup>21</sup> Jesús abin-sogded:

—Napira an bemarga soped. Ar bemar ibmar-imaknaid nue-bensulile, we-sapi-higuera-an-imaksayobi, be abi imaksasurmalaled. Ar sunna we-yarga be sogsamalaled: ‘Wegi be siid be ainir, demarse be nae,’ ar bemar-sogedba gusaled.

<sup>22</sup> Ar bela be nue-bensuli Bab-Dummadse-goledgi be egisele, be-ibmar-egised be abingaodo.

*Jesús’ga sogmalad: ¿Doa-nuggi be ibmar imakye?  
(Marcos 11:27-33; Lucas 20:1-8)*

<sup>23</sup> Jesús Bab-Dummadse-goled-negse-nonikid. Agi emar-odurdaksigu, dule-irwa-Bab-Dummadse-gormalad-e-dummagan, degi, Judío-girmar-dummagan ese nonimalad. Ega sogdemalad:

—¿Doa-nuggine wede be we-ibmar imakdii? ¿Ar doa bega igar uksasunna?

<sup>24</sup> Jesús abin-sogded:

—An bemarse ibmar-soggwen egismogodo. Bemar an-abin-imaksale, geb an bemarga sogmogod, an we-ibmar-imatega, wede doa anga igar-uksa.

<sup>25</sup> An bese egismosun, Diigi-dule-oged-Juan, Bab-Dummad-diigi-ogleged-imaksad, we, ¿bia daniki? ¿Bab-Dummad barmiali? ¿Dulemar barmiali? Anga be sogmalana.

Degi-itosmargu, Judío-dummagan muchub-muchub na sogdemalad: “Anmar sogmalale, Bab-Dummad Diigi-dule-oged-Juan-barmiarye, anmarga sogdagoed, ‘degite, ¿ibiga bemar Diigi-dule-oged-Juan-bengusmarsunna?’

<sup>26</sup> Anmar sogbalile, dulemar Diigi-dule-oged-Juan-barmiarye, anmarse neggwebur urwedagoed. Ar ade, bela sogmalad, ‘Diigi-dule-oged-Juan, Bab-Dummad-gayaburba-barsoged-sunnadye.’ ”

<sup>27</sup> Degisoggu, Judío-dummagan, Jesús-abin sogdemarsunnad:

—Anmar wissurmalad, doa Diigi-dule-oged-Juan barmiali.

Degi, Jesús, abin-imakdemosunnad:

—An bemarga sogosurmarmodo, wede doanuggi we-ibmar an imakdii.

*Machimala-warbogwadgi burbar sunmakle-  
naid*

<sup>28</sup> Jesús Judío-dummaganga sogded: “We-ibmar an bemarga-sogoedi be igi-binsamalodibe. Dulewargwen machimala warbo nikad. A-dulede e-machi-wargwenga sogded: ‘Machi, an-nainuse be arbana, uva eminae.’

<sup>29</sup> Machi, e-bab-abin-imakded, sogded: ‘Yapa an nae.’ Geb a-sorba, bukib-itoargu, nadegusad, arbanad gusad.

<sup>30</sup> Bab e-machi-baidse nadbalid, ega amba deyob sogdapbalid: ‘An-nainuse be uva eminae.’ E-machi-baid e-bab-abin sogded: ‘Baba, eye, an arbanao.’ Ar degite, we-machidi arbanadsurgusad.”

<sup>31</sup> Jesús Judío-dummaganse egisdesunnad:

—We-masmala-warbogwad, ¿doa bur e-bab-sogedba ibmar imaksa be insae?

Abin-sogdemalad:

—Machigwa arbaapid.

Jesús emarga sogded:

—Deyobdo. Ar napira an bemarga soged, dulemar-Roma-dummadga-mani-gaedgi-arbamalad, degi, omegan-gambasamalad, amar bur bemarka Bab-Dummad-e-negdakmaidse dogoed.

<sup>32</sup> Ar bemarse Juan igar-napiragwadgi sunmaknonimar-inigwele, bemarka eba ib-imbaksasurmalad. Ar Roma-dummadga-mani-gaedgi-arbamaladdi, degi, omegan-gambasamaladdi, e-sogsad bengussurmalad. Ar bemarka a-ibmar daksamarmo-inigwele, bemarka

we-igar abingamogaga, degite, gwagegala, be-  
isguedga gwen bukib be itossurmalad.

*Arbamalad-isganagi burbar sunmaklesad*  
(*Marcos 12:1-12; Lucas 20:9-19*)

<sup>33</sup> Jesús Judío-dummaganga sogdebalid: “Igar-  
burbar-baid-maid be itomarbalo: Ibagwengi  
dule-wargwen-nainu-ibedi, e-nainugi na uva-  
digsad. Geb bela egi galu eberis-imbaksad. A-  
abargi uva-egured sobsabalid. Geb degi, bela  
nainugi nakulegegala, aila-matusulid sobsabalid.  
Dule-nainu-ibed dulemar-arbamaladga e-nainu-  
urmaksad, adi, a-dulemar nainugi uva-wealir, e-  
ibedga wis ukmogagar. Deyob ebo igar mesisad.  
Geb nainu-ibeddi neggwebur-baidse dikasur  
nadsunnad.

<sup>34</sup> “Uva-weed-ibagan-mosgu, nainu-ibed uva-  
na-egadid-suega, e-nainugi-arbamaladse e-  
maigan-barmisad.

<sup>35</sup> “Ar nainugi-arbamaladdi, nainu-ibed-e-  
maigan-ese-nonimargu, gasmalad. Geb gwensak  
sarsosmalad, baidi oburgwismalad. Mai-baidi  
akwagi maksamalad.

<sup>36</sup> A-sorba, nainu-ibed e-maigan-baigan bur  
melu barmidbarsunnad. Degine, amba deyob  
sabsur-imbaksamarbalid.

<sup>37</sup> “Napidgi, nainu-ibed e-machi-  
barmiansunnad, ar ade, binsaded: ‘An-  
machisoggu, gwen oakalogosurmar an insaye.’

<sup>38</sup> “Ar nainugi-arbamalad, nainu-ibed-machi  
dani dakarmargu, na ega sogdemalad: ‘We-  
dule-danikidi e-bab-burgwisar, nainu bela egadbi  
guoed. Degisoggu, anmar ei nainu suega, anmar  
we-machi oburgwemarsun.’

39 Machigwa-gasmargu, nainu-magaba metemalad, geb agi oburgwismalad.”

40 Jesús Judío-dummaganse egiseded:

—Ar nainu-ibed e-nainuse nonikir, ¿igi nainugi-  
arbamalad-imaknoniko be insae?

41 Jesús-abin sogdemalad:

—Ar nainu-ibed-nonikogu, bela sabsuli nainugi-  
arbamalad-isganamar-oburgwenonikoed. Na e-  
nainu, baigan-arbamaladga urmaknonikoed, adi,  
amar iba-sekalaa ega e-uva ukmalagar.

42 Jesús Judío-dummaganga sogded:

—¿Ar bemarkede Bab-Dummad-Gardagi absodis-  
urmarsi? Bab-Dummad-Garda soged:

‘Akwa dule-neg-sobmaladse-oballesadi,  
neg-sobleged-e-akwasailaga gunonikid.

Bab-Jehová deyob we-ibmar imaknonikid,  
anmarga geger-dakle gunonikid.’

Salmo 118:22-23

43 ”Degisoggu, an bemarga sogmar, Bab-  
Dummad-e-negdakmaid-bemargadid, be-annik  
sulemaloed. Dulemar-baigan-nabir-ibmar-  
nuegan-imakmaloedga uklegoed.

44 [Ar dule-wargwen we-akwa-nuedgi  
argwachale, we-dule bibisgoed. Ar we-akwa  
dulegi-argwachardi, we-dule ese ubigwar  
guoed.”]

45 Jesús we-igar-burbar-sunmaklemaladgi-  
sunmaksadi, dule-irwa-Bab-Dummadse-  
gormalad-e-dummagan, degi, Fariseo’mar, magar  
itosmalad, Jesús’de emargi sunmake.



<sup>46</sup> Amar, Jesús-gabi guarimalanad, degi-inigwele, oakalossurgusmalad, ar ade, neggweburdobgusmalad. Ar dulemarde we-Jesús Bab-Dummad-gayaburba-barsogedye-nik sogmalad.

## 22

### *Ome-nikued-ibagi burbar sunmaklenaid (Lucas 14:15-24)*

<sup>1</sup> Jesús, gannar igar-burbar-maidgi sunmakdebargu, Judío-dummaganga sogdebalid:

<sup>2</sup> “Bab-Dummad-e-negdakmaid weyob gubalid: Rey-gwensak e-machi-ome-nikunaidgi ibadummad onoalid.

<sup>3</sup> Rey dulemar-ibase-nonimaloedse-gornaega e-maigan-barmisad, adi, e-machi ome-nikusokalid-e-ibase dagmalagar. Ar a-dulemarse-gollesmalad ibase budar dage gusmalad. Gwen nonisurgusmalad.

<sup>4</sup> ”Geb agi rey e-maigan-baigan-barmisbalid, ega sogsad: ‘Dulemar-ibase-danimaloedga sogo: Emi wegine, guagwar bemarga an mas imaksamar, molisan, degine, sibat-wawaad-gwallu-ibegan an bemarga oburgwismar. Bato bemarga guagwar bukwad, degisoggu mer ikumalo, ibase dagmalo.’

<sup>5</sup> ”Ar ese-gollesmalad bai gwen itosurmar, aka ibmar-baid imaknadmalad. Gwensak e-nainuse arbanaded, baidi ibmar-uked-negse ibmar-uknaded.

<sup>6</sup> Bamaladdi, rey-e-maigan-sarsodmalad, geb oburgwiswalad.

<sup>7</sup> ”Rey wisguargu, ibase-dagega-ese-gollesmalad deyob e-maigan-imalsamarye,

nue-sae itoded. Geb e-sordamar-barmisad, bela e-maigan-oburgwismalad ogilosad. Deginbali, rey, bela ese-gollesmalanad-e-neggwebur ogumaksasunnad.

<sup>8</sup> "Geb degi, rey e-maiganga sogded: 'Ar an-machi-ome-nikued-ibagi masgunned bato guagwar siid. We-dulemar ibase-dagega-ese-gollesmaladdi, ibase-daged bar ega igar maisulid.

<sup>9</sup> Degisoggu, igarganba be namarsun, ar agi be dulemar-dakalir, masgunned-ibase-dagmalaga, ese be gormalo.'

<sup>10</sup> Rey-maigan igarganba nadmargu, dulemar-abingusmaladse bela gochamalad. Dule-nueganse, degi, dule-isganamarse-bakar, ese gochad. Degisoggu, ome-nikued-ibagi bela neg engussunnad.

<sup>11</sup> "Rey masgunned-ibase-dognonigu, dule-nonimalad-daknonikid. Agi dakalid, dule-wargwen ome-nikued-ibagi-mor-yoleged yoisuli.

<sup>12</sup> Rey a-dulega sogded: 'An-ai, ¿igi be ome-nikued-ibagi-mor-yoleged-yoisuli be dogsa?' Dule gwen abin-imalsasulid.

<sup>13</sup> "Geb degi, rey e-maiganga sogdesunnad: 'We-dule-ibe e-argan be edinmar, e-mali be edinmarbar. Magaba negsichidgi be metemar, agi dummad-wilesiidba bosii guoed, nugar-gorsii guoed.'

<sup>14</sup> "Ar Bab-Dummad bukidar dulemarse gochad, degi-inigwele, unnila ichee wis sulesmalad."

*Roma-dummadga-mani-galeged-igargi  
sunmaklenaid  
(Marcos 12:13-17; Lucas 20:20-26)*

<sup>15</sup> Jesús sunmaked-bergusgu, Fariseo'mar nadmalad. Geb igar amiarmalad, igi-saele e-sunmakedgi Jesús-gaodibeye.

<sup>16</sup> Degisoggu, Fariseo'mar, e-sapingan Herodes-sordamarmala, Jesús'se barmisad. Jesús'se nonimargu, ega sogdemalad:

—Odurdaked-saila, anmar be-wisdo, be dule-ibmar-napiragwad-soged-duled, igar-napiragwadba Bab-Dummad-igar be odurdaked, degine, baisur be itoged igi dulemar begi binsae, ar ade, bedi emarbi be dulemar-daked.

<sup>17</sup> Degisoggu, anmarga be sogena, emide, Roma-Dummad-César'ye-nugad anmargi-mani-gaed-bennuked, ¿we igar-nuedi? ¿Anmar bennukoe? ¿Anmar bennukosuli? ¿Igi be sogmosunna?

<sup>18</sup> Ar Jesús'di wemar-egi-isdar-binsananaid mag daksoggu, amarga sogded:

—¿Bemar wagar-darbodamaladid! ¿Ar ibiga bemar yamo an-wilubdakdanimala?

<sup>19</sup> Roma-dummadga-mani-ukleged anga be oyo-gena.

Geb Jesús'ga mani-gwagwen oyoarmalad.

<sup>20</sup> Geb degi, Jesús amarga sogded:

—¿Ar wede we-manigi doa-wagar-wilub sisunna, degine, doa-nug narmakar naibar-sunna?

<sup>21</sup> Jesús-abin sogdemalad:

—Roma-Dummad-César-wagar-wilub, degi, a-nug narmakarbald.

Geb degi, Jesús sogded:

—Ar ibmar César'gadir, César'ga be ukdo. Ar ibmar Bab-Dummadgadirdi, Bab-Dummadga be ukdo.

22 Dulemar-Jesús'se-ibmar-egisnonimalad weyob Jesús-ega-soge-itosmargu, geger abin itodmalad. Geb degi, emardi Jesús'gi bangudmarsunnad.

*Gannar-durgued-igargi sunmaklesad  
(Marcos 12:18-27; Lucas 20:27-40)*

23 Amba a-ibagi, Saduceo'mar Jesús'se nonimalad. Wemar sogmalad, dule burgwisale, gannar geg bar durguye. Agala, Saduceo'mar Jesús'se we-igar egichirmalad,

24 ega sogdemalad:

—Odurdaked-saila, Moisés sogsagusad:  
'Ia mimmi-nikussuli ome-idu burgwisale, e-urba a-ome-nikuoye,  
adi, e-iaga anagan-urbegar.'

Deuteronomio 25:5

25 "Anmar-abargi machimala e-gwenadgan-walagugle-na-gumaladi (7) weyob gusdo: Ia-dummad ome-nikusgu, anagan-urbissuli burgwisad. A-sorbalid, a-ome-nikunonimogu,

26 amba e-iayob mimmi-nikussuli burgwis-mogad. Geb degi, a-sorbalid, e-urba-baid amba a-ome-nikunonimogad. Deyob bela e-walagugled (7) a-ome nikusmaladbiid. Anagan-gwen-obessuli bela burgwismalad.

27 Geb a-sorba, ome burgwismosunnad.

28 "Ar dule-gannar-durguoed-iba-nonikile, a-omede, ¿doa-omega gunonikosunna, ar bela na e-gugle (7) nikusmaladbiid?"

29 Geb Jesús, Saduceo'mar-abin sogded:

—Bab-Dummad-Garda-narmakar-maid-wissulidba, degi, Bab-Dummad-gangued-wissulidba, be noar sogmalad.

<sup>30</sup> Ar ade, dulemar gannar-durgued-ibagi ome-bar-nikuosurmalad, degine, gannar ome sui-nikunai bar guosurmogad, ar ade, dulemar Bab-Dummad-baliwiturmar-nibnegginmaladyob gumaloed.

<sup>31</sup> Jesús Saduceo'marga sogdebalid:

—Ar dule-burgwismalad-gannar-durgued-igardina, be ¿Bab-Dummad-gayaburba-maide be absodisurmarsi? Ar Bab-Dummad Moisés'ga sogsa gusad:

<sup>32</sup> 'Ani an Abraham, Isaac, degi, Jacob, amar-e-Bab-Dummadid.'

Éxodo 3:6

"A-ular, Bab-Dummad, dulemar-burgwarmalad-e-Bab-Dummadsulid. Bab-Dummad, dulemar-dula-gudidimalad-e-Bab-Dummadid. Degisoggu, bemarkue-noar sogmalad."

<sup>33</sup> Ar dulemar weyob Jesús-dulemar-odurdaked-itosmargu, geger-dakmalad.

*Bab-Dummad-Igar-Mesisad-bur-birigined*  
(*Marcos 12:28-34*)

<sup>34</sup> Degi, Fariseo'mar wisguarmargu, Jesús nue-Saduceo'mar-abin-imaksaye, agi Fariseo'mar igar-itoarmalad.

<sup>35</sup> Geb Fariseo-wargwen Moisés-Igar-nue-wisidi, Jesús-yamo-wilubdakega, ese egisnonikid:

<sup>36</sup> —Odurdaked-saila, Bab-Dummad-Igar-Maidgi, ¿igid bur igar-biriginedi?

<sup>37</sup> Jesús, abin-sogded:

—'Bab-Dummad-be-Dummad, bela-belad be-gwagegi be sabguoed,

bela-belad be-san-burbagi, degi, bela-belad  
be-binsaedgi be sabguoed.’

Deuteronomio 6:5

<sup>38</sup> ”Gebegi, Bab-Dummad-sabguleged, bur igar-  
biriginedid, degi, bur igar-dummarbadbalid.

<sup>39</sup> Sogbogwadgi, amba deyobsaarbalid:

‘Ar na be-san na be sabguedyobi,  
dule-baid be sabgumogoe.’

Levítico 19:18

<sup>40</sup> ”Ar we-igar-warbogwadgi, bela igar-baigan-  
mamaidi, degi, Bab-Dummad-gayaburba-  
barsogmalad-sunmaksamaladi, ase bergusiid.”

*Cristo e-danikidgi sunmaked*

*(Marcos 12:35-37; Lucas 20:41-44)*

<sup>41</sup> Jesús, Fariseo’mar-danar-bukwadse  
egichialid,

<sup>42</sup> ega sogded:

—¿Cristo’gi bemar igi binsamarsunna? ¿Wede  
Cristo, doa-wagwasunna?

Abin-sogdemalad:

—Rey-David-wagwa.

<sup>43</sup> Jesús amarga sogdebalid:

—Ar degite, ibiga David Bab-Dummad-Burbaba  
Cristo’ga sogsunna, ‘An-Dummadye,’ deun soggu:

<sup>44</sup> ‘Bab-Dummad an-Dummadga sogsad: An-  
argan-nuedsik be sige,

be-isdarmalad an bela ogalakuedse be sige.’

Salmo 110:1

<sup>45</sup> ”Ar David Cristo’ga-sogedde, ‘Be an-  
Dummadye,’ degite, ¿igi Cristo e-wagwaga  
gubarsunnoe?”

46 Ar dule-wargwensaar gwen Jesús-abin-  
imaksasurmalad. A-iba-akale, dulemala, bipisaale  
Jesús'se ibmar gwen bar egisbi itossurmalad.

## 23

*Jesús, Garda-Narmaked-Dulemargi, degi,  
Fariseo'margi gwisgusad*

*(Marcos 12:38-40; Lucas 11:37-54; 20:45-47)*

<sup>1</sup> Geb degi, Jesús dulemar-bukidaradga, degi, e-  
sapinganga sunmakded. Ega sogded:

<sup>2</sup> "Ar Fariseo'mar, degi, Garda-Narmaked-  
Dulemar, Moisés-Igar-Mamaid bur nue-  
wismaladid, bur nabir odulomaladid.

<sup>3</sup> Degisoggu, bemar bela bemarga, Fariseo'mar  
Moisés-Igar-Maidgi bega-sunmakmaladba be  
damar, eba be imakmar. Ar Fariseo'mar-  
damaladbardi, mer be damalo, ar ade, unni nabir  
sunmakmalad, imakeddi eba geg imakmalad.

<sup>4</sup> Ar we-Fariseo'mar dulemarga beedse dutusur  
igar mesmalad. Ar degite, emardi igar-mesisadba  
bipisaagwale gwen imakbisurmalad.

<sup>5</sup> "Ar Fariseo'mardi bela ibmar-imakmaladi,  
yamo dulemar-e-dakmalaga imakmalad. Degine,  
amardi bebegi, degi, sakwagi, Bab-Dummad-  
Garda-saboged-sagu nasikdamalad. E-mor-  
dummad-duku-durbamakarmalad ise-sobar  
imakmaladid, adi, dulemar egi binsamalagar,  
nue Babba ibsadamarye.

<sup>6</sup> "We-Fariseo'mar ibagi-mas-gullealir,  
dummagan-gan-sigedginbi sigbidamalad, degine,  
Judío'mar-onmakedneggi dummagan-gan-  
sigedginbi sigbidamarbalid.

7 We-Fariseo'mar ibmar-ukleged-neggi dulemar bela ese goledbimalar yeer itodamalad. Degine, 'odurdaked-sailaye,' dulemar-ese-goled yeer itodamarbalid.

8 "Ar bemardi odurdaked-sailaye mer bese-gormalad na be imakmalo. Ar bemargardi, unnila Cristo'bi bemar-odurdaked-saila wargwenna maid. Ar bela bemar na gwenadgan gumalad.

9 We-napneggi, an-babye mer dulemarse be golo. Ar unnila wargwenna be bab nikamalad, ar a-Bab nibneggi maid.

10 Mer odurdaked-duleye na be bimalo. Ar bemargardi, unnila Cristo'bi bemar-odurdaked-dule wargwenna maid.

11 "Ar bemar-abargi bur-dummad-gudiidi, a-bela bemar-maiga guoed.

12 Ar dule-wargwen na nug-dummarba-imakele, a-dule-nug bur bipii guoed. Ar dule na nug-bipi-imakerdi, a-dule-nug bur odummolegoed.

13 "Bemar, Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemar, Bab-Dummad-e-negdakmaidse dulemar-dogbigudimalad-idu be yawagak edidimalad. Ar bembela ase dogsurmalad. Ar bemar, dulemar-ase-dogbigudimalad-gwendogega be imaksurmalad.

14 "Bemar Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemar yamo yardakar ammormar-ei-sui-burgwismalad-ibe neg atursadamalad. Degine,



dulemar yeer bemar-dakegala, bemar yamo suitii Bab-Dummadse gorgwisdamalad. A-ular, bemar, deyob damaladba bur bule sabsur be odurdakle-maloed.

15 "Bemar Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemar, dule-wargwen-e-gwage-ogwaega, bemarba-naguega, demar-ebirdimalad, degi, bela be yar-ebirdimalad. Ar dule bemarba-nagusale, aka be ilabo bur bule soo-sailagi-odurdaklegoedga be imakdimalad.

16 "¡Ar bemar duledar-wilesmar! ¡Bemar dule-idumalad-ibyasulidmaladid!

"Emide, be sogmalad: 'Ar dule-wargwen ise-sogar-sogsadibeye, Bab-Dummadse-goled-neg-nuggi napira an bega sogye, an ibmar imakoye. Degisogsadba-ibmar-imalsulir, gwen akarsurye. Ar dule Bab-Dummadse-goled-neggi-or-siid-nuggi ise-sogar-imakoye-sogsardi, adi, degi-sogsadba imakergebye.'

17 "¡Bemar gwen binsaed-nikasurmalad! ¡Ibyasulidyob be damalad!

"Ar biti bur sunsogedi, ¿or bur sunsogedi? ¿Bab-Dummadse-goled-neg bur sunsogedi? ¿Ar Bab-Dummadse-goled-neg, swilidikidga or-imalsursi?

18 "Ar bemar sogmarbalid: 'Dule-wargwen ise-sogar-sogsadibeye: Bab-Dummadga-ibmar-ogumakar-ukleged-aila-nuggi napira an bega sogye, an ibmar imakoye. Degisogsadba

imaksasulir, gwen akarsurye. Ar dule Bab-Dummadga-ibmar-ukleged-nuggi ise-sogar-sogsardi, na degi-sogsadba eba saergebye.’

<sup>19</sup> ”¡Bemar gwen binsaed-nikasurmalad! ¡Ibya-sulidyob be damalad!

”Ar biti bur-sunsogedi, ¿Bab-Dummadga-ibmar-ogumakar-ukleged-aila? ¿We-galu-birgi ibmar-ogumakar-uklegedi? ¿Ar Bab-Dummadga-ibmar-ogumakar-ukleged-aila, swilidikidga ibmar-ogumakar-ukleged imaksursi?

<sup>20</sup> Ar dule Bab-Dummadga-ibmar-ukleged-aila-nuggi ise-sogar-sogsale, napira an bega sogye, an ibmar imakoye, a-dule bato Bab-Dummadga-ibmar-ogumakar-ukleged-aila-nuggi, degisogsadba, ¿bela agi ibmar-ambikued eba galesmosursi? Bela eba galesmogad.

<sup>21</sup> ”Ar dule Bab-Dummadse-goled-neg-nuggi ise-sogar-sogsale, napira-an-sogye, an ibmar imakoye. Ar a-nugginbi sogsasulid, ar Bab-Dummad-a-negyaba-maid-nuggi bato ise-sogar sogsabalid, an imakoye.

<sup>22</sup> Ar dule nibneg-naid-nuggi ise-sogar-sogsale, an ibmar imakoye, bato Bab-Dummad-e-ologana-siged-nuggi sogsado, degine, Bab-Dummad-a-ganagi-siged-nuggi bato sogsabalid.

<sup>23</sup> ”Bemar Garda-Narmaked-Dulemar, Fariseo’mar, ¡be duledar-wilesmar! ¡Wagar-darbomalad!

”Ar bemar ibmar-gagan-burwiganase-bakale, be Bab-Dummadga ukdimalad, menta’ye-nugad, eneldo’ye-nugad, degi, comino’ye-nugad, amar

ambegi-gwensak (10%) be Bab-Dummadga ukdimalad. Ar degite, Moisés-Igar-Maidgi igar-bur-sunsoged-maiddi, be imakdisurmalad:

Dulega-igar-nudaked,  
dulemar-wiledaked,  
degi, nue-innikii-nanaed.

Amardi, gwen be imakdisurmalad.

"Ar bemar we-ibmar-imakmalad bur nabirid. Ar degine, amba ibmar-burwigana-be-imakdimalad be imakmarbalodo.

<sup>24</sup> "¡Bemar ibyasulidyob emar-idudimalad! Bemar ibmar-burwiganagi alamknanaimalad. Ibmar-dummagandi be gwen imaksurmalad. Ar gwii gobedgi-nairdi, nabir be sumalad. Degite, moli-yargan-mureged gobedgi-nairdi, be domalad.

<sup>25</sup> "Bemar Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemar asginbi-na-dule-nued-imakmalad-dulemalad. Ar bemar nog-asginbi-enuklegeyob gumalad, degi, bate-asginbi-enuklegeyob gumalad. Ar be-ulubgindi, ibmar-atursamalad gumalad. Igar-innikigwad-gwen-imaksurmalad, ibmar-isgana ena be sedidimalad.

<sup>26</sup> "¡Be Fariseo-ibyasulidid! Ar nog-enuklealir, degi, bate-enuklealir, e-yagi-inse be enukgwel-ergebed. Ar deyob-enuklegeyob na be ulubgi nue-nudaked bur nabirid, ar deyobi, asgine be nued guoed.

<sup>27</sup> "Bemar Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemar neg-uan-asgi-sipu-magaleyob gumalad. Asgindi, yeerdakleged, ar yabardi, garbi ena, degi, ibmar-isganabi ena bukwad.

<sup>28</sup> Ar bemar amba deyobmarmogad. Asgindi, ar nue be baiganse oyomalad, bemar igar-maidba-innikii-ibmar-imakmalad-dulemarye. Ar ulubgindi, be wagar-darbo damalad. Ulubgi galagwensulid-bukidar be sedimalad.

<sup>29</sup> "Bemar Garda-Narmaked-Dulemar, Fariseo'mar, ¡be duledar-wilesmar! ¡Wagar-darbomalad!

"Ar bemardi Bab-Dummad-gayaburba-barsogsamaladga e-neg-uan be sobmaladid, degi, innikii-dule-nanasmaladga be yeerdakle e-neg-uan-wilubgan imakmaladid.

<sup>30</sup> Be sogmalad: 'Anmar-dadgan-ibagi anmar gudigusana, Bab-Dummad-gayaburba-barsogmalad-oburgwenanai-gusmargua, anmardi eba gwen akassurmalanye.'

<sup>31</sup> Ar bemar dukin na be san oyomalad, bemarde we-dulemar-Bab-Dummad-gayaburba-barsogmalad-oburgwismalad-e-wagan gumarye.

<sup>32</sup> Degisoggu, be-dadgan ibmar-isgana-imalsamalad amba napidi, obelogejala, be deyob imakmarmosunna.

<sup>33</sup> "¡Naibe-buleganayob be isgana gumalad! ¿Ar igi na be soo-sailagi-odurdaklemaloedgi wakinno na be itomala? Be wakinnosurmala.

<sup>34</sup> Degisoggu, an bemarga Bab-Dummad-gayaburba-barsogmalad barmidagoed, binsaed-ibegan barmidagoed, degi, Garda-Narmaked-Dulemar an bemarga barmidagoed. Degi-inigwele, gwen-gwen be amar-oburgwemaloed,

nakrusgi biokmaloed, baigandi, be Judío'maronmakedneggi sabsur-bibiyomaloed, neggweburbaid-baidse be amar-baregindii gumaloed.

<sup>35</sup> "Deyob be imakmaloedgi, geb bemargi ataklenonikoed. Bela we-napneggi be-dadgan binsa dule-ibmar-oakalossurmalad oburgwismalad. Abel-dule-nued-akale, degi, Berequíás-machi-Zacarías'se, a-nukad bemargi bonigan yolenonikoed. Deun, be-dadgan, Bab-Dummadse-goled-neg-sunnad-siid, degi, Bab-Dummadga-ibmar-ogumakar-ukleged-aila-siid-abargi, Zacarías-oburgwisgusmalad.

<sup>36</sup> Napira an bemarga soged, we-dule-nuegan-oburgwilesmalad, emi, bemar-dulagudidimaladgi ataklemaloed."

*Jesús Jerusalén'ga bosad*  
(Lucas 13:31-35)

<sup>37</sup> Jesús sogdebalid: "Jerusalén-dulemar, Jerusalén-dulemar, Bab-Dummad-gayaburbabarsogmalad be oburgwedimalad. Bemarsebarmilearmalad aka be akwagi makdemalad. Ilabigwa bela be-mimmigan danar an na urbebi-gusana, ar igi gannir na e-sakan-urba e-mimmigan-urbedaedyob, an urbebi gusanad. Ar bemar abessurgusad.

<sup>38</sup> Degisoggu, be-neg, nega-dulesulidganyob gunonisunnoed, bei walagwen melledoed.

<sup>39</sup> Ar an bemarga sogsun, emigindi, bar be an-dakosurmalad. Ar bemar geb weyob-sogedse be an-dakmaloed:

'We, Bab-Dummad-nuggi-dule-danikid,  
Bab-Dummad egi nued-binsasun.' "

Salmo 118:26

## 6. JESÚS, NAPNEG-BERGUDANIKIDGI SUNMAKSAD

### 24

(24:1-25:46)

*Jesús sogsgusad, Bab-Dummadse-goled-neg ayaroye*

(Marcos 13:1-2; Lucas 21:5-6)

<sup>1</sup> Jesús Bab-Dummadse-goled-neggi-nodgua, agi bangudgu, e-sapingan ese walikgunonikid, geb ega Bab-Dummadse-goled-neg yeerdakle-siid oyoarmalad.

<sup>2</sup> Jesús e-sapinganga sogded:

—¿We-negmar be dakmala? Napira an bemarga soged, bela we-neg-bemar-dakedi, bipisaale neg-gwagwensaar bar sigosulid, bela ayaroedbiid.

*Neg-bergued-iduar-neg-wilubgan-guoed*

(Marcos 13:3-23; Lucas 21:7-24; 17:22-24)

<sup>3</sup> Jesús, Olivos-yarse naded. Agi sii, e-sapingan bachikii ese nonimalad, ese egisnonimalad:

—¿Sana degite Bab-Dummadse-goled-neg ayaro-sunna? Be-danikid-iduar, ¿ibi-wilubgan oyoledago-sunna? Neg-dukumosar, ¿igi neg gudagosunna? Anmarga be soqe.

<sup>4</sup> Jesús e-sapingan-abin sogded:

—¡Nue salakarmar! Mer dulemar be-yardaked be imakmalo.

<sup>5</sup> Ar bukidar yamo anyob imaknonimaloed, sognonimaloed: 'Ani an Cristo, Bab-Dummad-dule-wargwen-barmidagoye-sogsad-dule.' A-dule, dulemar-bukidar yardakoed, eba bukidar nagudmaloed.

<sup>6</sup> "Bila-onolegedgibi neg-naguar, be itoardibe, degine, bila-onoleged daniye, agibi sunmakarmar be itoarbardibe, nue salakarmar, mer surbinsa be itomalo, ar wegiid-igargan guedsegad. Degi-inigwele, negdi amba yoo dukumoed.

<sup>7</sup> Dulemar-yar-baid-baidgi-bukwamalad bila-ononanai gudamaloed, degi, reymar muchub-muchub egi yolenanai gudamarbaloed. Yar-baid-baidgi uellemalad-bukidar ainidagoed, ukud-dummad nagudabaloed, degine, negabandur-dummagan nagumai gudabaloed.

<sup>8</sup> Degi-inigwele, bela we-ibagan-bulegan, igi bunor sikwi-bakesokalile, e-bonigan-itoar-dae, deyob guoed. Ar a-sorbardi, bur bule ibagan-bulegan nonikoed.

<sup>9</sup> "Neg deyob gunonikile, dulemar bemark-sabsur-odurdaklegega, dummaganse be-ukmaloed, amar be-oburgwemaloed. Ar bemark-an-sapingansoggu, a-ular, bela-dulemar-yar-baid-baidgi-bukmalad isdar be-dakdemaloed.

<sup>10</sup> A-ibagangine, bukidar anba-naigusmalad angi bangudmaloed. Na muchub-muchub urmaknanai gumaloed, degine, muchub-muchub isdar-dake gumaloed.

<sup>11</sup> "Degine, yamo bukidar Bab-Dummad-gayaburba-barsogmaladyobi, na san imaknonimaloed, amar, eba-nagumalaga dulemar-bukidar yardakmaloed.

<sup>12</sup> Ar ibmar-iscana-yaisulidba, bukidar-anbanagusmalad-e-sabgued bergudoed.

<sup>13</sup> Ar ibagan-bulegan-berguedse, dule gwen galakussuliddina, adi, nue-bendaklegoed.

<sup>14</sup> "We-Bab-Dummad-e-negdakmaid-gayaburba-nued bela we-napneg-naidgi sunmaklegedsegad. Geb bela dulemar-yar-baid-baidgi-bukmalad Bab-Dummad-e-negdakmaid-gayaburba-nued wisgunonimalale, geb agi we-napneg bergunonikoed."

<sup>15</sup> Jesús sogdebalid: "Bab-Dummad-gayaburba-barsoged-Daniel, weyob narmaksagusad:

'Bab-Dummadga bela-bela-ibmar-iscana-guedi, ese-goled-neg-islidikidse dognonikogu, we-ibmar-iscana, e-neg-nued, neg-iscanaga imakoed.'

Daniel 9:27; 11:31

"Ani Jesús, an bemarga soged: Bemar deyob neg-dakalile, we-Bab-Dummad-gayaburba-barsoged-Daniel-sogsagusadba gunaido. Emi, be nabir-garda-absodimalad, nue be itomalo.

<sup>16</sup> Degisoggu, a-ibagi, Judea'gi be gudiile, yalaganba be wakinsun.

<sup>17</sup> Ar agi dule-wargwen neg-uas-birgi-siile, aide-alir, ibmar-oniega mer negyaba-dogedgi binsao, bur yog wakinnar imako.

<sup>18</sup> Ar dule-wargwen sapurba-gudiile, mor sudagega, mer gannar negse-dagedgi binsao, bur yog wakinnar imaked nabirid.

<sup>19</sup> "Ar ammormar-gurgin-nika-gudidimalad, degi, mimmigan-gwaru-onunanaimaladdi, a-ibangangi nue-wilemaload, ar ade, geg abarmak gumaload.



20 Bab-Dummadse be gormarsun, we-ibagan-bulegan mer dii-wied-ibagi guega, degi, obunnoged-ibagi mer guegarbar.

21 Ar a-ibagangi, naibi-itoleged-dummad naiguoed. We-ibagan-bulegana, Bab-Dummad-neg-obinnisad-akale, gwen itoledisulid, degi, a-sorba ayobid bar itolegosurbalid.

22 "Ar Bab-Dummad a-ibagan-wileged giar imaksasulina, dulemar a-ibagangi gwen wakinnosurmalanad, bela burgwemaloenad. Emigindi, Bab-Dummad na e-sordamar-bato-nugsaar-ese-gollesmalad-sabedba, a-ibagan giar nasiksad.

23 "Degisoggu, dule-wargwen bemarga sokardibe: '¡Be dakena, Bab-Dummad-dule-wargwen-barmidagoye-sogsad-dule wegi gudii!' Degi, bemarga sokarbardibe: '¡Be dakena, weba Cristo gudibar!' Degi-dule-bega-sogedba mer be ibsamalo.

24 Ar ade, yamo binsa Cristo'yob nonimaloed, degi, Bab-Dummad-gayaburba-barsogedyob nonimaloed. Amar dulemar-yardakegala, galagwensuli ibmar-wilubgan-dummagan imakdamaloed, degi, ibmar-dakledisurmamad imakdamarbaloed. Amba Bab-Dummad-sunnad-na-nug-imaksamaladse-bakar, sunna ese yardaklesmarmogaled.

25 Degisoggu, nue salakarmar, ar iduakwaa bato an bemarga sogsamalad, mer yardaklemaloye.

26 "Degisoggu, bemarga sokarmardibe: 'Cristo nega-dulesulidganba gudiiye.' Mer ase be namalo. Ar igi bemarga sokarmarbardibe: 'Cristo negyaba maiye.' Mer be itomalo.

<sup>27</sup> "Ar igi mar-ibyed ukiagwar bela neg-ibegwar nasiknonidae, debayobi, ani Dule-Machi, an-danikoed-iba guoed.

<sup>28</sup> Ar dulemar mulamar-danar-bukwa-dakele, na wismalad, agi san-burgwaled mai. Debayobi, an gannar we-napnegse danikile, dulemar mag dakmogoed."

*Jesús gannar-e-danikoedgi sunmaksad  
(Marcos 13:24-37; Lucas 17:24-36; 21:25-36)*

<sup>29</sup> Jesús sogdebalid:

" 'Ibagan-naibi-itoleged-sorba dad-ibeler bar gaosulid,  
nii bar gaosurbalid.

Niisgwamar-nibneggi-nanaid babatidagoed.

Nibneggi ibmar-dummagan-gala-nikananaid bela giglimakoed.'

Isaías 13:10; 34:4

<sup>30</sup> "Geb degine, ani Dule-Machi, an-danikoed-wilubgan mogir-imbaba dakledagoed. Geb degi, we-napneggi bela dulemar-baid-baid-danar-danar-bukmalad bukib binsadmaloed, degi, ani Dule-Machi, mogir-imbaba an-ganguedba, degi, an bela-bela-yeerdaklegedba-dani, bela an-dakdamaloed.

<sup>31</sup> Napneg-ugakaase, degi, bela nibneg-ugakaase, an-sordamar-nugsalesmalad-angaweenaega, an-baliwiturmar gala-binnasur-goled-abargi an barmidagoed. Geb degi, bela danar ambikunonimaloed.

<sup>32</sup> "Sapi-higuera-e-wilubgangi be durdakmar. Ar e-anagan dudumaksale, degi, e-gagan aramak-sale, bemar yor-omodanikid nue-wisid.

33 Amba deyobmodo, we-ibmarmar-an-bemarga-sogsamaladi, bela deyob bemar neg-guar-dakalir, bemar wisdo, ani Dule-Machi, an-danikid nue-omosad.

34 "Napira an bemarga soged, we-dulemar-gudidimalad-burgwed-idu we-ibmargan bela guedsegad.

35 Nibnegdi, napnegdi bela berguod. An-gayaburbadi gege bergued, degisadeguod."

*Jesús-danikoed-e-iba dule wissulid*  
(Lucas 12:42-46; 17:26-27)

36 Jesús sogdebalid: "Ar an-danikoed-ibadi, degi, a-wachidi, dule gwen wissulid. Baliwiturmar-nibnegginmaladse-bakar, gwen wissurmalad. Degi, an-bela wissurmogad. Unnila Bab-Dummadbi wisid, sana an danikoe.

37 "Ar igi Noé-ibagangi neg-gusa, deyobi, Dule-Machi-gannar-danikoed-ibagangi neg gumogoed.

38 Ar a-ibagangi, deun, dii-mured-iduar, mas gunbukwa, gobbukwa, ome-nikubukwa, degi, na e-sisgwaga sui-ukbukwa gusmalad. Geb Noé ur-dummad-sobsad-yaba-dogsadse, deyob gubukwa gusmalad.

39 A-dulemar magar gwen itossurmalad. Dii-muludgu, bela a-dulemar burgwismalad. Amba deyobi, ani Dule-Machi, an-danikoed-ibagangi neg gumogoed.

40 "A-ibagangi, dule-warbo sapurba-gudiidgine, wargwen nibnegse seledoed, baidi, obelegoed.

41 Omegan-warbo ibmar-gwag-nagnaidgine, wargwen nibnegse seledoed, baidi, obelegoed.

42 ”Degisoggu, nue salakarmar, nue atakmar, ar ade, bemar wissulid sana be-Dummad danikoe.

43 Ar wedi be nue wismalad, ar dule-neg-ibed wisina igi-wachigi dule-ibmar-atursaed danikoe, dule-neg-ibed edarbisaled. Ar ei-ibmar-atursaega imaksasuliled.

44 Degisoggu, be guagwar-gudii imakmar, ar ade, ani Dule-Machi, an-danikoed bemar wissulid. Ar ukiagwar an danikoed.”

*Mai-nuedgi burbar sunmaklenaid  
(Lucas 12:41-48)*

45 Jesús egisdesunnad: “Ar degite, ¿doa-mai-nuedi, binsaed-nikadaed, e-dummad-sogedba gudii? Mai-deyobdaedi, e-dummad, e-neguya-akwega onugsaed. Adi, mai-baiganga wachisekalaa mas-dakegar.

46 Ar we-mai nue-deyob-arbanai e-dummad daknonikile, egi nued binsalegoed.”

47 Geb degi, Jesús sogded: “Napira an bemarga soged, mai-e-dumjadi, bela na e-ibmar-nikad ega akwegala, we-maiga ukoed.”

48 Jesús sogdebalid: “Ar mai-isganadi, na e-gwagegi binsaded: ‘An-dummad amba yoggu-maid.’

49 Degidbali, geb mai-baigan-sabsur-imakdesunnad, dulemar-mumgumaladba akadsunnad, eba mas gutebarsunnad, degi, eba gobdebarsunnad.

50 Geb iba-edarbedisulidgi, wachi-edarbedisulidgi e-dummad danikile,

<sup>51</sup> e-dummad daknonikoed, mai galagwensur-gudii. Degisoggu, e-dummad sabsur e-mai-odurdaknonikoed. E-dummad, a-e-mai dulemar-wagar-darbo-damaladba esgaryagi metoed. Agi dummad-odurdaklesiidba bosii, degi, nugar-gorsii gusunnoed.”

## 25

### *Yagan-ambegwadgi (10) burbar sunmaklenaid*

<sup>1</sup> Degi Jesús sogdebalid: “Bab-Dummad-e-negdakmaid ome-nikunaid-ibagi-gusayob gued: A-ibagi yagana-ambegwad (10) ome-nikulenaid-ibase-naega, na gwallu egad-egad sesmalad, adi, suiga-guoed-abindaknaegar.

<sup>2</sup> Dakleargu, e-ataledi, nue-binsaed-nikaa damalad. Bamaladdi, gwen binsaed nikasurmalad.

<sup>3</sup> E-ataled-binsaed-surmaladi, gwallu-sesmargua, gwen e-gwallu-dii bute-baidgi enosurmalad.

<sup>4</sup> Ar e-atar-binsaed-nikadamaladdi, gwallu-sesmargua, bute-baidgi gwallu-dii sesmarbalid.

<sup>5</sup> Ar suiga-guoed amba yoggudsoggu, bela yagana gabed-itoarmargu, gabidmarsunnad.

<sup>6</sup> ”Nega-gabigwengi binnasur dule-gole itoarmalad: ‘¡Suiga-guoed dani! ¡Abin-daknamar!’

<sup>7</sup> ”Geb degi, bela yagana gwisguarmalad. E-gwallu gatik-nued-gaega, nudakarmalad.

<sup>8</sup> E-atar-binsaedsulidi, e-atar-binsaed-nikadamaladga sogdemalad: ‘Be anmarga wis gwallu-dii ukdage, ar anmar-ibe gwallu akinmaid.’

9 "Yagan-binsaed-nikadamalad abin-sogdemalad: 'Suli. Ar anmar bemarga gwallu-dii abar-ukye-sogele, anmarga galakuoed, degi, bemarga galakumogoed. Bur be dulemargwalludii-ukmaladse baknamala.'

10 "Geb yagan-binsaed-sulidamalad gwallu-dii baknadmargu, a-sorba suiga-guoedi nonikid. Yagan-binsaed-nikadamaladdi, guakwaabukmarsoggu, eba mas-gunnega dogdemalad. A-sorba, yawagak edilessunnad.

11 "Geb agi yagan-ataled-gwallu-dii-bakdimalad nonimarmogad. Suiga-guoedga wilesakwaa sognai guarmalad: '¡Dummad, anmarga be yawagak wis egae!'

12 "Ar dummad abin-imakdegu, sogded: 'Napira an bemarga soged, aku an bemark-daked.' "

13 Degi Jesús sogdebalid: "Degisoggu, nue nakulemar. Ar be wissurmalad ibi-ibagi, igi-wachigi Dule-Machi danikoe."

*Or-manigi burbar sunmaklenaid  
(Lucas 19:11-27)*

14 Jesús sogdebalid: "Ar Bab-Dummad-e-negdakmaid weyob gued: Dule-wargwen dikasur na e-neggi nasokargu, e-maigan-ega-ibmarakwega ese gochagusad. Degisoggu, amarga bela na e-ibmar-obes naded.

15 Mani-onogedsik e-maigan-gurgin-nikadbali, ega or-mani-mimis naded. Wargwenga or-manigwaatar ega uksad, baidga or-mani-gwabo uksad, degi, baidga or-mani-gwagwen uksamogad. Mani-ibeddi, dikasur nadsunnad.

16 "Dule-or-mani-gwaatar-abingasad naded. Geb mani-e-sangi mani-gwaatar onosbalid.

17 Ar dule-or-mani-gwabo-abingasadi, amba deyob imaksamogad, mani-gwabo egi onosmogad.

18 Ar dule-or-mani-gwagwen-abingasaddi, nadgu, napagi digdapid. E-dummad-mani napa-yaba odukusad.

19 "Undaradgine, we-maigan-e-dummad non-ikid, e-maigan-ebo mani-igar naboalid.

20 Dule-or-mani-gwaatar-abingasadi nonigu, baid-or-mani-gwaatar senonibalid. E-dummadga sognonikid: 'Dummad, or-mani-gwaatar be anga uksad, an baid-or-mani-gwaatar egi onosbalid. Degisoggu, or-mani-gwaambe (10) an bega sedanisunnad, be sue.'

21 "E-dummad ega sogded: 'Nued, be mai-nued, be gwen-galakussulid. Ar ibmar-ichesaaledgi gwen galakussuli be arbasad, ibmar-ichesur an bega uksun. Degisoggu, anba be wergudasun.'

22 "Ar dule-or-mani-gwabo-abingasad nonimogu, e-dummadga sognonimogad: 'Dummad, or-mani-gwabo be anga uksad, baid-gwabo an egi onosbalid. Degisoggu, or-mani-gwabake an bega sedanisunnad, be sue.'

23 "E-dummad ega sogded: 'Nued, be mai-nued, be gwen galakussulid. Ar ibmar-ichesaaledgi gwen galakussuli be arbasad, ibmar-ichesur an bega uksun. Degisoggu, anba be wergudasun.'

24 "Ar dule-or-mani-gwagwen-abingasad nonimogu, e-dummadga sognonimogad: 'Dummad, an be-wisdo, be dule-buledid. Be

ibmar-digasulidgi ibmar be weed, degine, be-arbasulidgi ibmar be weebalid.

<sup>25</sup> Degisoggu, an be-dobgusad. An nadgu, be-or-mani napa-yaba an odukusad. Ar begadid, an bega uksun.'

<sup>26</sup> "E-dummad, abin-sogdegu, ega sogded: 'Be mai-igana, mai-wiegala. Be wisinad, an-ibmar-digasulidgi an ibmar-weed, degine, an arbasulidgi ibmar an weebalid.

<sup>27</sup> Ar degisoggu, mani-onogosur be itogu, mani-urbemalad-negse be an-mani uknaenad, adi, an nonikogu, an-mani, degi, e-gaka, an na sunonikoenad.'

<sup>28</sup> "Dule-mani-ibed e-mai-baiganga sogded: 'Degisoggu, e-annik or-mani be sumarsun, dule-or-mani-gwaambe-nikadga (10) be ukmarsun.

<sup>29</sup> Ar dule-ibmar-nikadga bur bule ega ibmar uklegoed. Degisoggu, bur bule ibmar nikunonikoed. Ar dule-ibmar-sateddi, wis-ibmar-nikadsebakale, ei sulenonikoed.

<sup>30</sup> Ar we-mai-wissur-arbaedi, magaba negsichidse metnamar. Agi bosii guoed, dummad-wilesiidba nugar-gorsii guoed.' "

### *Dule-yar-baid-baidgi-bukwadga igar-itolegoed*

<sup>31</sup> Jesús sogded: "Ani Dule-Machi, an-ibadanikoedgi, bela an-baliwiturmar-gwage-swilidikmaladmala an-gangued-yeerdaklegedgi an danikoed. Geb an-ologan-yeerdaklegedgi an signonikoed.

<sup>32</sup> Geb degi, bela dulemar-yar-baid-baidgi-bukmalad an-asabin ambikunonimaloed. Agi



geb bachik-bachik an oambikuoed. Igi siband-wawaad-edarbed, siband-wawaad, degi, siband-ebo bachiki urbe, deyob an dulemar-imakmogoed.

<sup>33</sup> An-argan-nuedsiki, siband-wawaadmar an urboed. An-argan-sapiledsikdi, sibandmar an urboed.

<sup>34</sup> "Geb degi, an reyga-maidba, an-argan-nuedsik-bukmaladga an sogdagoed: 'Be dagmar, ar an-Bab-Dummad bemargi nued binsasad. An-Bab-neg-dakmaid-bemargadid be abingadamar. Ar we-napneg-nagusad-akale, bato bemarga nugsales nagusad.

<sup>35</sup> Ar an ukur-itosgu, masgi be an-oguchamalad.

An uku-uku-itosgu, be an-ogobsamalad.

An-neggwebursulidgi an gudigusgu, be an-akwismalad.

<sup>36</sup> An mor-sate-gudigusgu, mor be anga uk-samalad.

An uellesgu, an-bendakega be anse atakap-malad.

An esgaryagi-mellesigusgu, be anse arbimalad.'

<sup>37</sup> "Geb degi, dulemar-igar-napiragwadbadamalad an-abin-imakdemaloed, sogdamaloed:

'Dummad, ¿sana ukudmaada an be-daksamala? Masgi an be-oguchaye bede soked.

¿Sana be uku-uku-itodii an be-daksamala? An be-ogobsaye bede soked.

<sup>38</sup> ¿Sana be-neggwebursulidgi be gudigu, an-mar be-akwismala?

¿Sana mor-sate an be-daksagu, an bega mor yosmala?

<sup>39</sup> Be uellemaigu, be-bendakega, ¿sana anmar bese atakapmala?

Be esgaryagi-mellesigu, ¿sana anmar bese atakapmala?’

<sup>40</sup> ”Ani Rey, an abin-imakdoed: ‘Napira an be-marga soged, ar an-gwenadgan-binsarmaladse-bakar, deyob bemar bendaksasoggu, be deyob an-bendaksamalad.’

<sup>41</sup> ”Geb degi, dulemar an-argan-sapiledsik-bukmaladga an sogdagoed: ‘Angi be bangumar, bemar bato ukabsalesmalad. Nia-sailaga, degi, e-baliwiturmarga, soo-saila-geg-bergued bato guagwar-siidse be namar.

<sup>42</sup> Ar ade, ukudmaada an gudigusgu, gwen masgi be an-oguchasurmalad.

Uku-uku an itosgu, gwen be an-ogobsasurmalad.

<sup>43</sup> An-neggwebursulidgi an gudigusgu, gwen be an-akwissurmalad.

Mor-sate an gudigusgu, gwen be anga mor yossurmalad.

An uellemaigusgu, gwen be an-bendakapsurmalad,

degi, esgaryagi an mellesi-gusgu, gwen be anse atakapsurmalad.’

<sup>44</sup> ”Geb degi, amar an-abin imakdemarmogoed: ‘Dummad, ¿sana be ukudmaad-gudii, uku-uku-itodii, an be-daksamala?

¿Sana be be-neggwebursulidgi-gudii, mor-sate-gudii, an be-daksamala?

¿Sana be uelledigu, esgaryagi-mellesigu, anmar be-bendaksasuli?’

<sup>45</sup> "Geb degi, an wemar-abin-sogoed: 'Napira an bemarga soged, ar an-gwenadgan-binsarmaladga deyob bemar imaksasursoggu, anga bemar imaksasulid.'

<sup>46</sup> "Degisoggu, we-dule-isganamar, odurdakleged-neg-sadeguoedse barmiled-maloed. Dule-nuegandi, san-burba-geg-bergued-negse namaloed."

## 7. JESÚS'GA OBURGWILEGED-IGAR-MESISAD

### 26

(26:1-27:66)

*Jesús-oburgwega igar amiarmalad*

(Marcos 14:1-2; Lucas 22:1-2; Juan 11:45-53)

<sup>1</sup> Jesús bela-weyob-ibmar-sogsad-sorba, e-sapinganga sokalid:

<sup>2</sup> "Be wismalad, Oburgwilegoenad-Iba ibabose nagudoed. Agine, ani Dule-Machi, nakrusgi-an-biokmalaga an-gamaloed."

<sup>3</sup> Degine, dule-irwa-Bab-Dummadse-gormalad-e-dummagan, Garda-Narmaked-Dulemar, Judío'mar-girmar-dummagan-neggwebur-sedimalad, bela amar danar dule-irwa-Bab-Dummadse-goled-bur-dummad-Caifás'ye-nugad-neg-ibase ambikunonimalad.

<sup>4</sup> Yamo-yardakar-Jesús-gaega, degi, oburgwemalaga, agi igar itosmalad.

<sup>5</sup> Judío-dummagan-abar sogdemalad:

"Mer ibagi anmar Jesús-gamalo. Degiir, dulemar Jesús'bina urwedamaloed."

*Betania'gi Jesús-nonogi gwallu-wawad eolesad  
(Marcos 14:3-9; Juan 12:1-8)*

<sup>6</sup> Jesús Betania-neggweburgi gudiid. Simón-naibe-buna-yaa-maleged-nika-gudigusad-neggi siid.

<sup>7</sup> Agi Jesús mese-naba mas gunsigu, ome-wargwen ese nonikid. Ome, bute-akwa-alabastro-sobaledgi-sii gwallu-wawad-nuedi senonikid, geb Jesús-nonogi eononikid. A-gwallu-wawad gargerba bakleged.

<sup>8</sup> Jesús-sapingan ome-weyob-imaksad-daksamargu, uludmalad, sogdemalad:

—¿Wede ibiga binsarsunna we-ome we-gwallu-wawa-nued wiosa?

<sup>9</sup> Ar sunna we-gwallu-wawad mani-dummad uklegoenad, adi, we-mani, nabir dule-wileganaga ukegegar.

<sup>10</sup> Ar Jesús degi-sogmalad-mag-daksagu, sogded:

—¿Ar ibiga bemar omese-urwemala? Mer ese be gormar. Ar ome ibmar-nued anga imaksad.

<sup>11</sup> Ar dule-wilemaladdi, gusgu bemar-abargi-gudigu guoed. Andi bemarba-gudigu guosulid.

<sup>12</sup> ”Ar ome we-gwallu-wawad an-sangi-eosadi, an-diglegoed-iduar eosad.

<sup>13</sup> ”Napira an bemarga soged, bia we-napneggi an-gayaburba-nuedgi sunmaklegoe, we-ome-ibmar-imaksadgi sunmaklemoed, adi, we-ome-ibmar-imaksad ebinsamalagar.”

*Judas, Jesús-darba-uksad  
(Marcos 14:10-11; Lucas 22:3-6; Juan 13:21-30)*

<sup>14</sup> Jesús-e-sapingan-ambe-gakabogwad-wargwen (12), Judas-Isariote'ye-nugad, dule-irwa-Bab-Dummadse-gormalad-e-dummaganse nadegusad.

<sup>15</sup> Amarga sogdapid:

—An bemarga Jesús-ukmalale, ¿ibi be anga ukmaloe?

Judío-dummagan Judas'ga mani-sibu gwadulagwen-gakambe (30) uksamalad.

<sup>16</sup> Geb agi Judas igar-amiarsunnad, igi saele darba Jesús-ukodibeye.

*Bab-Jesús-burgwisad-ebinsaed-igar*

*(Marcos 14:12-26; Lucas 22:7-23; 1 Corintios 11:17-34)*

<sup>17</sup> Judío-ibagi, Madu-Inasuli-Gulleged-Iba-gebe-onodedgi, e-sapingan Jesús'se nonimalad, ega sognonimalad:

—Oburgwilegoenad-Ibagi-masgulleged-gunnega, ¿bia anmar bega neg amimaloe?

<sup>18</sup> Jesús amarga sogded:

“Neggweburse be namar. Dule-gwensak-negse be namar. A-dulega be sogmalo: ‘Odurdaked-saila sogye: An-ibagan omosye. Be-neggine, an-sapinganmala, Oburgwilegoenad-Iba an dakmaloye.’ ”

<sup>19</sup> Ar igi Jesús e-sapinganmarga sogsa, e-sapingan deyob imaksamalad. A-neggi, ibagi mas-gunmalaga, bela ibmar guagwar urbismarsunnad.

<sup>20</sup> A-ibagi, neg-mutikgudgu, Jesús e-sapingan-ambe-gakabogwadmala (12) mese-naba masgunnega signonimalad.

<sup>21</sup> Mas gunbukmargu, Jesús sogded:

—Napira an bemarga soged, bema-gwensak darba an-ukoed.

<sup>22</sup> A-ular, e-sapingan nue-wile itodmalad, na wargwen-wargwen Jesús'ga sogdemarsunnad:

—Dummad, ¿ani an be-ukoe? Andi suli.

<sup>23</sup> Jesús abin-sogded:

—Ar dule-wargwen e-argan bategi anba odo-  
goedi, a darba an-ukoed.

<sup>24</sup> Napira an bemarga soged, ani Dule-Machi, ar igi Bab-Dummad-Gardagi angi narmakar nai, ar deyob an guoed, an burgoed. Ar dule-darba-an-ukoeddina, sabsur-odurdaklegoedba nue wi-  
legoed. A-dule gwalulesulina, bur nabirinad.

<sup>25</sup> Geb degi, Judas, darba-Jesús-ukoedi, Jesús'ga sogded:

—Odurdaked-saila, ¿ani an be-ukoye?

Jesús ega sogded:

—Eye. Ar bato na be sogsad.

<sup>26</sup> Mas gunbukmargu, Jesús madu-susgua, Bab-Dummadga dog-nuedye sogsagusad. Geb a-sorba, Jesús madu bisge-bisge imaksad, e-sapinganga ukded, sogded:

—Be sumar, be gunmar, we-madu, an-sanad.

Jesús e-sapinganmala we-madu guchamarsunnad.

<sup>27</sup> A-sorba, Jesús nog susbalid. Bab-Dummadga dog-nuedye-sogsabargu, e-sapinganga ukdebalid, sogdebalid:

—Bema bela we gobmar.

<sup>28</sup> We, an-abe. An-abe Bab-Dummad dule-marbo igar-bini-mesnaid-wilubganad, degi, an-abe, isgued-eliega, dulemar-bukidar-ular mile-goed.

29 An bemarga soged, emigindi, vino'di we-sorba bar an gobosulid, geb an-Bab-negdakmaidse an bemarkabargi an gobdapbaloed.

Jesús e-sapinganmala we-vino gobsamarsunnad.

30 Geb Bab-Dummad-nuggi namaksamaladsorba, Olivos-yarse nadmarsunnad.

*Jesús, Pedro-e-osulogoedgi sunmaksad*

*(Marcos 14:27-31; Lucas 22:31-34; Juan 13:36-38)*

31 Geb agi, Jesús e-sapinganga sogded:

—Belagwapa emi-mutik bemarkangi bangudmaloed, ar ade, Bab-Dummad-Gardagi narmakarnaid, sognaid:

'Sibad-wawaad-edarbed an oburgoed,

Geb agi sibad-wawaadmar bela duurmakdoed.'

Zacaría 13:7

32 Jesús sogdebalid:

—Geb gannar-andurgusadsorba, bemarkaidu Galilea'se an naoed.

33 Pedro, abin-sogded:

—Bela begi bangudmalale, andi begi gwen banguosulid.

34 Jesús, Pedro-abin sogded:

—Napira an bega soged, emi-mutik, gannirnamaked-iduar, ilapaa be an-osulogoed.

35 Pedro, abin-sogded:

—Ar an beba burgweye sogele, amba an besulosulid.

E-sapingan-baigan bela degibi sogdemarmogad.

*Jesús, Getsemaní'gi Bab-Dummadse gorsii gusad*

*(Marcos 14:32-42; Lucas 22:39-46)*

<sup>36</sup> Jesús e-sapinganmala Getsemaní-neg-nugadse nonimarsun. Agi Jesús e-sapinganga sogded:

“Wegi bemar ambikumar, andi weba Bab-Dummadse gornagwelo.”

<sup>37</sup> Pedro, degi, Zebedeo-machimala-warbogwadbi eba sesagusad. Geb agi, Jesús na nue-wilegoedba nue-wile itoalid, degi, nue-surbinsa itoarbalid.

<sup>38</sup> Geb degi, Jesús e-sapingan-walapaagwadga sogded:

—Andi an ulubgi nue-bukib-itogedba sunna an burgwisar-itoleged. Wegi be ambikumar, nue atakmalo, Bab-Dummadse be gormalo.

<sup>39</sup> Jesús sikwas nadgu, napagi asgun megdapid. Geb Bab-Dummadse-gotegu, sogded: “Baba, anidu igar-buled naid, sunna be anga osulogena gadin. We-igar, ina-gagbid-gobedyob beedse an egi wilegoed. Degi-inigwele, melle be an-sogedba be imako. Unnila be-sogedbarbi be imako.”

<sup>40</sup> Geb degi, Jesús Bab-Dummadse-gorsiid-bergusgu, na e-sapinganse nonikid, daknonikid, bela gabmamai. Geb degi, Jesús Pedro'ga sogded:

“¿Ar Babse-golega wachi-irgwensaar wis ataksii geg be gude?”

<sup>41</sup> Nue atak, Bab-Dummadse be gole, adi, isguedgi-wilubdakleged mer bemarse warmakegar. An wisi, Babse golega, bemarkurbadi guagwar gudiid. Bemark-sandi degisulid, nolloo gued.”



<sup>42</sup> Jesús gannar nadbargu, gannar Bab-Dummadse gotebalid, sogdebalid: “Baba, an-idu igar-buled naid, ina-gagbid gobedyob beedse an egi wilegoed. Geg be anga osulogele, igi-barsa. Degisoggu, be-sogedba be imaksun.”

<sup>43</sup> Jesús Bab-Dummadse-gorsiid bergusgu, gannar e-sapinganse-nonibargu, gabmamai daknon-ikid. Ar gabed nue egi obin itomalad.

<sup>44</sup> Degi, Jesús e-sapingan-gabmamai obesad. Geb gannar nadbalid. Degi, ilapaagi Bab-Dummadse gotegu, gannar-idu-sogsadgii sogdebalid.

<sup>45</sup> Geb degi, Jesús e-sapinganse gannar nonikid, ega sognonikid:

“¿Amba be gabmamaide? ¿Amba be obunnomamaide? Emigindi, wachidi omossun. Ani Dule-Machi, an-oburgwemalaga, dulemar-isgudidimaladse darba uklesokarsun.

<sup>46</sup> Degisoggu, be gwisgumarsun, namarsun. Be dakmar, dule-darba-an-uksokalidi bato anmar-walikusad.”

### *Jesús-galesad*

*(Marcos 14:43-52; Lucas 22:47-53; Juan 18:1-11)*

<sup>47</sup> Jesús amba e-sapinganga sunmakgwichi, e-sapingan-warambe-gakabogwad-wargwen (12), Judas'ye-nugad, ese nonikid. Aba dule-irwa-Babse-gormalad-e-dummagan, degi, Judío-girmar-dummagan-neggwebur-sedimalad dulemar-bukidar barmiargusmalad. We-dulemar-bukidar es-suidyalaba, degi, suarmar annik-annik, Judas'ba duurmakdani gusmalad.

<sup>48</sup> Judas Jesús-darba-ukoedi, dulemar-nonimalad-ebo igar-nabosad, ega sogsad: “An dule-e-wagar-uoed, an ega sogoedi, be nued sogeye, a-dule be-mar gaoed.”

<sup>49</sup> Geb Judas yog Jesús'se naar imaksad, ega sogded:

—Odurdaked-saila, ¿be nuedi?

Geb degi, ei wagar usa imaksad.

<sup>50</sup> Degi, Jesús, Judas'ga sogded:

—Gwenad, ¿ibiga be daniki?

Geb degi, dulemar Jesús'se nonimalad. Geb Jesús'se achadmargu, Jesús-gasmarsunnad.

<sup>51</sup> Ar e-sapin-wargwen Jesús-naba-gwichidi, es-suid-onosgu, dule-irwa-Babse-gormalad-burdummad-e-mai naibi imaksad. E-uaya ei siksad.

<sup>52</sup> Geb degi, Jesús e-sapinga sogded:

—Be es-suid e-uka-yaba be odo. Ar bela dulemar-es-suid-ebumaladi, es-suidgi burgoed.

<sup>53</sup> Ar emisbinne, mili-miliba baliwiturmar anga barmidagega, ¿geg an-Babse an gor be ebinsasi? Ar an gotele, anga barmialiled.

<sup>54</sup> Ar deyob gusale, degite, ¿igi Bab-Dummad-Gardagi narmakar-naidba bar gusarsunna? Ar a-Gardagi sognaid, an burgwergebye.

<sup>55</sup> Geb agi, Jesús dulemarga sogded:

—¿Ibiga bemar dule-isgana-ibmar-atursaedyob an-gadanimala? Emide, es-suidyalaba, suarmarylaba, bemar an-gadanimalad. Bane-bane bemarba an gudigusad, Bab-Dummadse-goled-neggi dulemar-odurdakdii an gusad. Degite, agindi bemar gwen an-gassurmamad.

<sup>56</sup> Ar emigindi, igar-maidbali, Bab-Dummad-gayaburba-barsogmalad-narmaksadba-guegala, deyob gunonikid.

Deği, Jesús-sapingan Jesús-wargwen-mete, e-idu bela duurmakdemarsunnad.

*Jesús, igar-nabiromalad-dummaganse selesad  
(Marcos 14:53-65; Lucas 22:66-71; Juan 18:19-24)*

<sup>57</sup> Dulemar-Jesús-gasmaladi, dule-irwa-Bab-Dummadse-gormalad-bur-dummad, Caifás'ye-nugadse Jesús-sesmalad. Agi Garda-Narmaked-Dulemar, Judío'mar-girmar-dummagan igar-itogega bukmalad.

<sup>58</sup> Pedro'di bannabasaar Jesús'ba nadapgusmogad, dule-irwa-Babse-gormalad-bur-dummad-neg-ibase warmakdapid. A-neg-ibase dogsagua, suar-ibedmar-abargi sigdapid, adi, dakega, igi Jesús-imakmalodibeye.

<sup>59</sup> Dule-irwa-Babse-gormalad-e-dummagan, degi, bela Judío-dummagan-igar-nabiromalad, igar-aminanai guarmalad, igi-saele Jesús'gi yolemalodibeye, igi-yamo-gakansaale Jesús-oburgwemalodibeye.

<sup>60</sup> Degite, ar bukidar yamo-gakansaar sunmaknonimar-inigwele, Jesús-nodiid gwen amissurgusmalad. Geb dule-warbo yamo-gakansaar-ibmar-soged nonimalad.

<sup>61</sup> Dule-warbgowad weyob sognonimalad:

—We-dule weyob sunmaksad: ‘An sunna Bab-Dummadse-goled-neg-siid an earye, degi, iba-paagi sunna gannar an sobbarye.’

62 Dule-irwa-Babse-gormalad-bur-dummad gwisgusgu, Jesús'ga sogded:

—¿Be dulemar-abin-imakosuli? Begi-sunmaknanaidgi, ¿igi be sogmosunna?

63 Ar Jesús'di bipisaar gwen abin-imaksasulid. Geb degi, dule-irwa-Babse-gormalad-bur-dummad ega sogdesunnad:

—Bab-Dummad-Dula-Maid-nuggi an bega soged, anmarga be soqe, ¿ar be Cristo, Bab-Dummad-Machi-sunnadi?

64 Jesús abin-sogded:

—Ar bede soged. A-uki an bega sogbalid, emigi ani Dule-Machi, Bab-Dummad-Bela-Gangued-Nikad-e-argan-nuedsik dule-dummadga an sii be an-dakmaloed, degine, nibneggi mogir-imbabandaniki be an-dakmarbaloed.

65 Geb degi, dule-irwa-Babse-gormalad-bur-dummad e-mor na siir irmaksad, oyogegar, Jesús-degisogsad ede sae-itoye. Degine, geb dummaganga sogded:

—¡Bab-Dummad-nuggi we, dados! ¿Ar ibiga e-barsogmalad anmar bar abesunna? Ar bemarkunad, emiskwaa be itosmalad, we-Jesús Bab-Dummad-nuggi dadosad.

66 ¿Igi be itomarmosunna?

Dummagan-igar-itobukmalad abin-imakdemargu, sogdemalad:

—Oburgwilegergebed.

67 Geb degi, dummagan Jesús-wagargi wiakdemalad, argan-olor sarsodmarbalid, degine, baigan wagargi Jesús-bibyodmarbalid.

68 Ega sogdemalad:

—Cristo, bela be ibmar-wissoggu, anmarga be soqe, ¿doa be-bibyossunna?

*Pedro, Jesús-osulosad*

*(Marcos 14:66-72; Lucas 22:54-62; Juan 18:15-18, 25-27)*

<sup>69</sup> Pedro neg-imbagi sii, bunagwa-mai-wargwen ese nonikid, ega sognonikid:

—Be, Jesús-Galilea'ginedba gudii an be-daksamogad.

<sup>70</sup> Pedro, bela dulemar-asabin osuloded, sogded:

—Aku an itoged, ibu be anga obare.

<sup>71</sup> Pedro yawagakse-nadgu, bunagwa-baid Pedro-dakarbalid. A-bunagwa, dulemar-bukmaladga sogded:

—We-dule, Jesús-Nazaret'ginedba gudii an dak-samogad.

<sup>72</sup> Pedro gannar osulodbalid, sogded:

—Bab-Dummad-nuggi napira an bemarga soged: Andi, an we-dule-akudaked.

<sup>73</sup> Degine, sikwas sanargusadgine, walik-bukmalad Pedro'se-nonimargu, ega sogdemarmogad:

—Napira an bega soged, be Jesús-sordamogad, ar be-sunmaked mag-itoleged, be a-sordamogad.

<sup>74</sup> Geb degi, Pedro ukabsaar ibmar sokalid, degi sogdebalid:

—Bab-Dummad-nuggi napira an bemarga soged: Andi, an we-dule-akudaked.

Geb degidgine, yog gannir namakaled.

<sup>75</sup> Geb degi, Pedro ebinsaas naded, igi Jesús ega ibmar sogsa, “gannir-namaked-iduar, ilapaa be

an-osulogoye.” Degi, Pedro magaba-nadgu, nue-ise-boar nadsunnad.

## 27

### *Jesús Pilato'se sesmalad*

(*Marcos 15:1; Lucas 23:1-2; Juan 18:28-32*)

<sup>1</sup> Wakdargusgu, bela dule-irwa-Babse-gormalad-e-dummagan, degi, Judío-girmar-dummagan-neggwebur-sedimalad igar-itosmargu, igar-mesismalad, Jesús-oburgwemaloye.

<sup>2</sup> Edinnar neggwebur-dakmaid-Poncio-Pilato'ye-nugadse Jesús-sesmalad. Jesús'ga igar-itogega aga ukdapmalad.

### *Judas na dukin oburgwisad*

<sup>3</sup> Geb degi, Jesús-darba-uksad-dule-Judas, Jesús-oburgwilego-daksagu, bukib-binsaded. A-ular, Judas mani-sibu-dulagwen-gakambegwad (30) gannar dule-irwa-Babse-gormalad-e-dummaganse, degi, Judío-girmar-dummaganse senonikid.

<sup>4</sup> Amarga sognonikid:

—An dummad-nosad, dule-ibmar-gwen-oakalossulid binsa darba an uksad.

Ar dummagandi, abin-imakdemalad:

—¿Ar anmargardi baisi? ¡Ar wedi, begindo!

<sup>5</sup> Geb degi, Judas Bab-Dummadse-goled-neggi mani-mide nadsunnad. Geb agi na dukin gammu gadapid.

<sup>6</sup> Dule-irwa-Babse-gormalad-e-dummagan, Judas-mani-mided-wesmargu, sogdemalad:

“We-mani anmar Bab-Dummadga-mani-sabogedgi uker, igar-nuedsulid, ar ade, we-mani

bato ukabsalegaled, dule-gindakega-imakoed-manid.”

<sup>7</sup> Geb dummagan igar-itosmargu, napsa-ibmarga-sobleged-nainu baksamalad, adi, agi dulemar-ainebarmalad-burgwisar, digmalagar.

<sup>8</sup> A-ular, a-nainu amba emi-ibase bileged: “Ablis-Nainuye.”

<sup>9</sup> Ar deyob gunonikid, igi Bab-Dummad-gayaburba-barsoged Jeremías’ye-nugad, deun sogsagusgu:

“Mani-sibu-dulagwen-gakambe (30) susmalad,  
dule-nued-uklesad-e-mani,  
Israel-dulemar-an-uksad-mani.

<sup>10</sup> A-mani napsa-ibmar-sobed-nainu-bakega uk-samalad,  
ar igi Bab-Dummad anga sogsa, aba igar imaklesad.”

Zacarías 11:12-13

*Pilato, Jesús’ga igar-itosad*

*(Marcos 15:2-15; Lucas 23:2-5; Juan 18:28-19:14)*

<sup>11</sup> Dule-dummad-negdakmaid-Pilato’ye-nugad-asabin Jesús gwisgudapid. Pilato Jesús’s e egichialid, ega sogded:

—¿Ar be Judío’mar-E-Rey?

Jesús, abin-sogded:

—Ar bede soged.

<sup>12</sup> Dule-irwa-Babse-gormalad-e-dummagan, degi, Judío-girmar-dummagan ar Jesús’gi sognanai-guarmalad, we, igar-isgana imakdiye. Ar Jesús’di gwen abin-imaksasulid.

<sup>13</sup> Geb degi, Pilato Jesús’ga sogded:

—¿Begi-sunmaknanaid be itosuli, bede ibmar-isgana imakdiiye?

<sup>14</sup> Ar Jesús'di bipisaale gwen abin-imaksasulid. Degisoggu, Pilato nue-geger daksunnad, ar ibiga wede Jesús dulemar-abin-imaksuli.

*Pilato, Jesús'ga burgwed-igar mesisad  
(Marcos 15:6-15; Lucas 23:13-25; Juan 19:15-16)*

<sup>15</sup> Emide dakleargu, iba-onolealile, Pilato gusgu Judío'mar-abemaladba dule-wargwen-esgaryagi-mellesiid ega onodaed.

<sup>16</sup> Deunni, a-ibagangine, dule-Barrabás'ye nugad esgaryagi mellesiid. We-dule, dule-isgana-nug-nikagwadid.

<sup>17</sup> Dulemar-bukidar ambikunonimargu, Pilato amarga sokalid:

—¿Doa bemarga onobi be an-abemarsunna? ¿An bemarga Barrabás-onoge? ¿Jesús, Cristo'ye-nugad an onoge?

<sup>18</sup> Ar ade, Pilato wisid, Judío-dummagan nobed-bali ega Jesús-uksamala.

<sup>19</sup> Pilato igar-naboged-gangi-sigu, e-ome ese gaya barmialid: “We-dule, dule-nuedid, dule-isgudisulidid. Mer egi be yolemogo. Emi an ichakwa-gabdakmai oibosad, an egi gabdaksadgi nue-nunmak an itodiid.”

<sup>20</sup> Ar dule-irwa-Babse-gormalad-e-dummagandi, degi, Judío-girmar-dummagan yamo dulemar-binsaed gasmalad, adi, Pilato'se Barrabás-egismalaga, ega onogega, Jesús'di oburgwemalagar.

<sup>21</sup> Pilato gannar dulemarga sogdebalid:



—¿Doa bur wemar-warbogwad bemarga onobi be an-abemala?

Emar abin-sogdemalad:

—Barrabás bur be anmarga onoge.

<sup>22</sup> Geb degi, Pilato dulemarga sogdesunnad:

—Ar degite, Jesús, Cristo'ye-nugad, ¿igi an imakosunna?

Bela abin-sogdemalad:

—¡We-duledi be nakrusgi bioke!

<sup>23</sup> Pilato dulemarga sogdebalid:

—¿Ar degite, we-dulede ibu ibmar-isgana wede imaksasunna?

Agi dulemar bur bule oimakdemalad, sogdemalad:

—¡We-dule nakrusgi bioke!

<sup>24</sup> Pilato dakdegu gwen igar nabolessuli, aka bur bule dulemar oimakbukwa, bormogi dii-susgua, na e-argan dulemar-wagab enukded, sogded:

—Bemar we-dule-nued-oburgoed, anginsurdo, bemargindo.

<sup>25</sup> Bela-dulemar abin-sogdemalad:

—We-dule-oburgwilegoed anmargi naguoe, degi, anmar-mimmigangi nagumogoe.

<sup>26</sup> Geb degi, Pilato, Barrabás-onossunnad. Pilato, Jesús-sabsur-bibyosad-sorba, nakrusgi Jesús-biokmalaga, suar-ibmalaga uksasunnad.

*Suar-ibmala Jesús'gi dodosad  
(Marcos 15:16-20; Juan 19:2-3)*

<sup>27</sup> Degi, Pilato-e-suaribmala, Pilato-neg-Pretorio'ye-nugadse Jesús-sesmalad. Agi suar-ibmala, degi, e-sordamar bela-danagwenad, Jesús-ebilis ambikunonimalad.

28 Suar-ibmala Jesús-ibe mor-esusmargu, reymor-ginnid-yoedgiid Jesús'ga yosmarsunnad.

29 E-nonogi iko-sobaled-gurgin ega sismarbalid, ega masargiid gaapoledyob e-argan-nuedgi ega uksamarbalid. Geb degine, Jesús-asabin yokorgi-sindigar sigisdamalad, yamo egi dodonaigusdamalad, ega sogdedamalad:

—¡Be Judío'mar-E-Rey, suibaksaar be ani gudigusa sana gadin!

30 Suar-ibgan Jesús'gi wiaksadamarbalid, masargiid e-annik sudamalad, geb agi e-nonogi sarsodamarbalid.

31 Suar-ibgan Jesús'gi-dodosmalad-sorba, mor-ginnid ega esusmalad, gannar ega e-mor yosmalad. Geb degi, nakrusgi-biokmalaga Jesús-sesmarsunnad.

*Jesús nakrusgi bioklesad*

*(Marcos 15:21-32; Lucas 23:26-43; Juan 19:17-27)*

32 Roma-dulemar-suar-ibgan Jesús-nakrusgi-biokegala, Jerusalén-neggweburgi nodmargu, dulewargwen-Cirene-neggweburgined Simón'ye-nugad dakarmalad. A-dule, Jesús'ga nakrus-seega ise-barmiar imaksamalad.

33 Gólgota'ye-neg-nugadse modapmalad. Gólgota sogleged, Dule-Nonogar-Negye.

34 A-negse modapmargu, suar-ibgan vino inagagbidbo-oburaledgi Jesús-ogobdemalad, adi, dog mer bar nunmaked itogegar. Ar Jesús'di wisitosgua, yapa abin-gobgusad.

35 Suar-ibgan Jesús-nakrusgi-bioksamargu, Jesús-morgi dodoarmalad, doa suoeddibeye. Wilub-dakar Jesús-mor mimismarsunnad. Deyob gusad,

adi, Bab-Dummad-gayaburba-barsoged-epenne-sogsadyob guegar, deun sogsagusgu:

“An-mormar mimismarsunnad,  
degi, an-mor-suega, egi wilubdaknanai gus-  
malad.”

Salmo 22:18

<sup>36</sup> Degine, geb Jesús’gi-nakulemalaga suar-  
ibgan sigismalad.

<sup>37</sup> E-nakrus-birgi narmaksamalad, sogega, ibiga  
Jesús burgwenai. Narmakaled weyob sognaid:

WE-JESÚS

JUDÍO’MAR-E-REYD

<sup>38</sup> Geb degi, suar-ibgan dulemar-atursamalad-  
warbo nakrusgi bioksamarbalid. Wargwen,  
Jesús-argan-nuedsik ogwichisad, baidi Jesús-argan-  
sapiledsik ogwichisbalid.

<sup>39</sup> Dulemar-Jesús-dikarba-nasdamalad ise-dodoar  
egi nasdamalad, yamo ega nono-ege-ege-gunadap  
nasdamalad,

<sup>40</sup> ega sogdedamalad:

—Ar be Bab-Dummadse-goled-neg be earoye  
sogsad, degi, ibapaagi gannar sobbaloye be  
sogsad. Emigindi, na be dukin bendakdo. Ar  
be Bab-Dummad-Machile, nakrusgi-naid be  
aidedage.

<sup>41</sup> Amba deyob, dule-irwa-Babse-gormalad-  
e-dummagan, Garda-Narmaked-Dulemar,  
Fariseo’mar, degi, Judío-girmar-dummagan, amar  
bela Jesús’gi dododmarmogad, sogdemarmogad:

<sup>42</sup> —We-Jesús, dule-baigandi nabir bendaksad,  
edi dukin geg na bendaked. Ar Jesús Israel-  
Dulemar-E-Reyle, nakrusgi-naid aidedadeen, geb  
agi anmar egi benguosulid.

<sup>43</sup> We-dule Bab-Dummadgi-gwen-bengusurye-sogedde, Bab-Dummad nabir e-dakye-sogele, degite, Bab-Dummad e-bendakdado. ¿Ar na sogsasursi, ‘Ani an Bab-Dummad-Machiye?’

<sup>44</sup> Amba deyob atursamalad-Jesús’ba-nakrusgi-bioklegar-naimalad Jesús’gi-dodonanai gusmar-mogad.

*Jesús-burgwisad*

*(Marcos 15:33-41; Lucas 23:44-49; Juan 19:28-37; Hebreos 9:1-28)*

<sup>45</sup> Dad yorukugusgu, bela we-napa-naidgi nega-sichid nagunonikid, wachi-irbaase naigusad.

<sup>46</sup> Wachi-irbaa-gusgu, Jesús binnasur goted, sogded:

—Elí, Elí, ¿lama sabactani?

A sogleged: ‘¡An-Bab-Dummadye, an-Bab-Dummadye! ¿Ibiga be an-obacha?’

Salmo 22:1

<sup>47</sup> Abar Jesús-nakrus-walik-bukmalad Jesús-degi-soge-itosmargu, sogdemalad:

—Wede Elías’sé gornaid.

<sup>48</sup> Degine, dule-wargwen, yoga-abarmakar naded, ibmar-butad-butad-susgua vino-gagbidgi owardikusad, geb suar-dukugi edichagu, wis gobega Jesús’ga uksad.

<sup>49</sup> Ar baigandi sogdemalad:

—Mer ese achamar, dakmalo bule Elías odenon-ikodibe.

<sup>50</sup> Geb Jesús gannar binnasur-gotebargu, agi ya-suu naded.

<sup>51</sup> Deyob-gunaidgine, Jerusalén’gi, Bab-Dummadse-goled-neggi, Neg-Islidikid-irwa-mornaid siir naded. Niba-akar urbalidse achirmakde

gusad. Degine, napneg giglimakded, akwadummagan mamaridbalid.

<sup>52</sup> Neg-uanmar argadbalid, bukidardule-gwage-swilidikmalad-burgwismalad durgudmalad.

<sup>53</sup> Amar neg-uangi-mamaid ainidmalad. Wemala, Jesús-gannar-durgusad-sorba, geb Jerusalén-neggwebur-islidikidse dognonimalad. Dulemar-bukidarse magarosmalad.

<sup>54</sup> Roma-suar-ibed-sordamar-dulatar-sediid (100), degine, e-sordamar, Jesús-edarbebukmalad, negabandur-nagusad-daksamargu, degi, bela ibmargusad-daksamargu, bela nue-dobe-ito nadmalad, sogdemalad:

—We-dule, nue-Bab-Dummad-Machi-sunnadid.

<sup>55</sup> Agi bukidar-omegan bannabasaar Jesús-dakbuk-gusmarmogad. Ar a-omegan Galilea-akar Jesús'ba bipirmakdanimalad, ega ibmar-imakdii gusmalad.

<sup>56</sup> A-omegan-abargi María-Magdalena gwichid, degi, María-gwichimogad. A-María, Santiago-e-nanad, degi, José e-nanad. Deginbali, Zebedeo-machimala-e-nan gwichi gusmogad.

*Jesús-diglesad*

*(Marcos 15:42-47; Lucas 23:50-56; Juan 19:38-42)*

<sup>57</sup> Neg-sedodgu, mani-ibed-wargwen, José'yenugad nonikid. We-dulede Arimatea'ginedid, Jesús-e-sapinga gusmogad.

<sup>58</sup> We-dule, Pilato'se nadegusad, Jesús-mui neguanse-dignaega egisdapid. Geb degi, Pilato, José'ga-Jesús-mui-ukmalaga igar uksad.

<sup>59</sup> José, Jesús-mui-nakrusgi-naid-odesgu, atued-binidgi nue-obipirmaksad.

<sup>60</sup> Geb degi, José na e-neg-uan-binidgi Jesús-mesisad. A-neg-uande akwa-imbaba nuesaale akwiargalad. Geb José neg-uan-doged-eduega egi akwa-dummad obaparmaksad. Geb agi nadsunnad.

<sup>61</sup> José, Jesús-mui-dignaigu, María-Magdalen, baid María'ye-nugbalid, neg-uan-asabin bukwa gusmarmogad.

*Suar-ibgan neg-uan-edarbismalad*

<sup>62</sup> Banedgine, Judío'mar-obunnoged-ibagine, dule-irwa-Bab-Dummadse-gormalad-e-dummagan, degi, Fariseo'mar Pilato'se nonimalad,

<sup>63</sup> ega sogdemalad:

—Dummad, anmar insado, we-dule-yardakegwad amba dula gudigu, sogsagusad: 'Ibapaagwad-sorba gannar an durguoye.'

<sup>64</sup> Degisoggu, neg-uangi mer dule yogasaar-dogega ibapaa-wilub be igar mese. Ar abakalegi, e-sapingan mutik Jesús-mui atursanonimalale, geb dulemarga sokarmalale: 'Burgwar-mamaimalad-abargi Jesús durgusye.' Ar degiir, bur bule idualedba dulemar-yardakoed.

<sup>65</sup> Geb degi, Pilato amarga sogded:

—Nabir. Ar degiile, wegi-suar-ibmala-bukwad be neg-uanse sedmar. Na be-itogedba be imakmarsun.

<sup>66</sup> Geb degi, amar neg-uanse nadmarsunnad. Dulemar mer neg-uan egamalaga, akwa-yawagakgi-siidgi Roma-saila-wilub nasik-

samalad. Degine, neg-uan edarbemalaga, suar-ibmala ogwichismarbalid.

## 8. JESÚS GANNAR DURGUSAD

### 28

(28:1-20)

(*Marcos 16:1-8; Lucas 24:1-12; Juan 20:1-10*)

<sup>1</sup> Obunnoged-iba-nasgu, itoged-iba-geb-naguded-oiboargu, María-Magdarena, degi, María-baid, neg-uan-dakega nonimalad.

<sup>2</sup> Degi, negabandur-dummad nagononikid, ar ade, Bab-Dummad-e-baliwitur-nibneggi-danikid, napnegse nonikid. A-baliwitur, akwa-dummad neg-uan-yawagak-idu-siid onirnonikid, geb a-akwa-birgi sigisad.

<sup>3</sup> Baliwitur-e-dakleged mar-gaedyob dakleged, degine, e-mor ise-sibudik, dakuu daklebalid.

<sup>4</sup> A-dobedbali, suar-ibmala wawanmakdemalad, burgwisayob nadmalad.

<sup>5</sup> Ar baliwiturdi omeganga sogded:

—Mer be dobgumar. Ar bema Jesús-nakrusgi-bioklegusad-amidanimalad an wisid.

<sup>6</sup> Jesús wegi bar maisulid. Ar igi bemarga sogsgusa, deyob gusad. Jesús gannar durgusad. Be dakdamar, Dummad-Jesús-mai-gusad-e-gannar be dakmar.

<sup>7</sup> Be gwae namar, e-sapinganga be sognamar: ‘Emi, Jesús burgwar-mamaid-abargi gannar durgusy. Bema-idu Galilea-yarse nadmarye, agi be dakmaloye.’ Bato be wismarsoggu, be sognamar-sun.

<sup>8</sup> Degi, omegan neg-uangi-nodgu, Jesús-sapinganga Jesús-durgusye-sognamalaga, dobed-abargi, degi, nue-weligwar-itogedgi, abarmakdemalad.

<sup>9</sup> Degin, omegan gayaburba-nued sognadmargu, egi Jesús noalid, ega sogded: “¡Na, degite!” Degi, omegan ese walikgunonimargu, e-mali angaagwar gasmalad, degi, Jesús-nug odummodmarsunnad.

<sup>10</sup> Geb degi, Jesús amarga sogded:

—Mer be dobgu, be namar. Angwenadmarga gayaburba-nued be sognamar, adi, Galilea-yarse namalagar, agi an-dakmalagar.

*Suar-ibmala, ibmar-daksad-sogsamalad*

<sup>11</sup> Ar omegan nadapmargu, suar-ibmala-abar, bela neg-uangi-ibmar-gusad dule-irwa-Babsegormalad-e-dummaganga-sogega neggweburse nadmarmogad.

<sup>12</sup> Dule-irwa-Babsegormalad-e-dummagan, Judío-girmar-dummaganse gochamargu, igar itosmalad. Degi, Judío-dummagan, suar-ibmalaga mani-ichesur uksamalad.

<sup>13</sup> Amarga sogsamalad:

—Bemar sogo: ‘Anmar gabmamaigu, Jesús-sapingan mutikidba nonimarye, Jesús-mui atursasmarye.’

<sup>14</sup> Ar Roma-dummad-negdakmaid degi-itoalile, anmar-ebo sunmakoed, mer be-oakalomalagar.

<sup>15</sup> Suar-ibmala mani-susmargu, ar igi Judío-dummagan ega sogsamala, deyob imaksamalad. Ar deyob, Judío’mar-abargi we-gaya amba emi-ibase soglediid: “Suar-ibmala-gabmamaigu, Jesús-esapingan Jesús-mui atursasmarye.”



*Jesús e-igargi-sunmakega igar-uksad  
(Marcos 16:14-18; Lucas 24:36-49; Juan 20:19-23)*

<sup>16</sup> Jesús-e-sapingan-ambe-gakagwensak-guedi (11), Galilea'se nadmalad. Bia Jesús ega sogsagusa, a-yar-mulluse be naoye, ase nadmarsunnad.

<sup>17</sup> E-sapingan Jesús-dakarmargu, e-abin sindigar sigidmalad, e-nug odummodmalad. Amba gwenna-gwenna e-sapingan egi bengusmalad.

<sup>18</sup> Jesús e-sapingan-walikgunonigu, amarga sogded:

—We-napneggi-negdakega, degine, nibneggi-negdakega, Bab-Dummad bela gangued anga uksad.

<sup>19</sup> Degisoggu, be namar, bela-dulemar-yar-baid-baidgi-bukwamalad an-sapinganga gued be imaknamar. Amar Bab-Dummad-nuggi, Bab-Dummad-Machi-nuggi, degi, Bab-Dummad-Burba-Isligwaled-nuggi, Bab-diigi-ogleged-igargi-oglegega, be imaknamar.

<sup>20</sup> An bemar-odurdaksadba bela eba nuanamaloye be amar-odurdako. Napira an bemarka soged, an emi bemarka we-napnegberguedse, bane-bane an gudiguoed. Be itogua.

**Bab-Dummad-Garda-Islidikid**  
**The Holy Bible in the San Blas Kuna language of**  
**Panama**  
**La Santa Biblia en el lenguaje de San Blas Kuna de**  
**Panamá**

copyright © 2014 Wycliffe Bible Translators, Inc.

Language: San Blas Cuna (San Blas Kuna)

Translation by: Wycliffe Bible Translators, Inc.

**Copyright Information**

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Kuna, San Blas

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-03-31

---

PDF generated using Haiola and XeLaTeX on 18 Apr 2025 from source files dated 29 Jan 2022

eb5c3a84-7a8b-5f2f-8344-21a6af7506b8